

NATIONAL ASSEMBLY OF SEYCHELLES

Tuesday 05th October, 2021

The Assembly met at 09am

National Anthem

Moment of Reflection

Mr Speaker in the Chair

MR SPEAKER

Bonjour tou Manm Onorab e bonjour nou telespektater e oditer a lekout, byenveni pou sa travay lasemenn avek nou.

Bon lo *Order Paper Communications*, mon ti a kontan pran Lokazyon *Teachers Week* pou rann en omaz bann edikater e ansennyan dan nou pei antye. Sa i enn bann group ki nou swazir pou anvoy en mesaz spesyal pou zot sak lannen.

E si nou fer sa se akoz zot annan sa rol spesyal dan nou sositete. Bann ansennyan i vin koman nou dezyenm paran. Zot ganny konfye avek formasyon nou zanfan depi en tre zennaz. Annefe konmela laz ki zanfan i ganny met dan lanmen ansennyan in vin bokou pli ba ki i ti abitye, menm i komans 3an e 4an.

Donk i pa sirprann nou ki nou ekspekte ki sa bann ansennyan i annan en lenfliyans lo lavi nou zanfan ziska ler zot vin adilt. Alor mannyer zot fer zot travay, mannyer zot servi zot vokasyon i determinan pou lavi nou pep e osi pour sa ki nou pei i vini.

Konbyen fwa nou tann dir ki ledikasyon i lakle pour tou progre? E konbyen fwa nou menm nou, nou repet sa fraz? Alor napa ledikasyon san edikater e edikater i lakle dan ledikasyon ki nou gannyen.

Mon krwar lokazyon i apropriye pou nou swet tou nou bann *Sire Mis Lekol bon kouraz* dan zot travay. E pour nou donn zot sa solidarite koman paran, koman manm la kominote e koman Manm Lasanble Nasional pou nou donn zot sa sipor e sa lankourazman pou zot kapab deservi zot rol byen.

Donk avek sa de mo mon swet zot en bon lasemenn e osi en bon lannen ziska lannen prosen ler nou renouvele sa swe. Mersi.

E avek sa, ozordi *Leader Lopozisyon* pa la, so mon pou envit son Depite *Chief Whip* Onorab Lemiel, pour azout en pti mesaz lo sa ki mon'n dir, e mon a fer menm keksoz lo lot kote. Onorab *Leader*

Government Business in dakor pou donn sa privilez son *Chief Whip* li osi. Onorab Lemiel, ou ti a kontan met en pti mesaz?

HON SYLVANNE LEMIEL

Mersi Mr Speaker. Bonzour tou mon bann koleg manm Onorab, tou bann dimoun ki a lekout en bonzour spesyal tou nou bann ansennyan. Mersi Mr Speaker pou donn mwan sa loportinite pou dir de pti mo, ozordi i le 5 Oktob e ozordi i Lazournen Bann Ansennyan.

Mr Speaker *Brad Henry* ti quote; ‘A good teacher can inspire hope, ignite the imagination and instill a love of learning.’

A.P.J Abdul Kalam li i ti quote; “Teaching is a very noble profession that shapes the character, caliber and future of an individual. One teacher in a lifetime, may sometimes change a delinquent to a solid citizen.”

Mr Speaker ansennyan i en group dimoun ki spesyal. Zot sa group dimoun ki ankadre lezot e anrisir konesans. Ansennyan i devret ganny valorize pour sa travay nob ki zot fer, e zot devret pe toultan ganny ankouraze dan tou fason - enkli ganny bann *incentive* neseser pou touzour ankouraz zot e gard zot dan sa profesyon.

Dan letan COVID zot pa'n bes lebra. Zot in delivre e zanfan in anmenn rezilta. Alors paran en mesaz pour zot, annou kontinyen donn sa siper bann ansennyan.

O non nou Caucus mon oule profit sa lokazyon ki komemor zot lazournen ozordi pou mon swet tou ansennyan dan Sesel en bon lazournen e osi bonn fet.

Kontinyen anrisir e partaz konesans. Kontinyen donn bon gidans nou bann zanfan e nou dir zot mersi pou zot devouman anver zot profesyon, e osi mersi pou touzour esey donn lanmen pour gid nou bann zanfan lo sa bon semen, menm si nou konnen i pa touzour fasil. Ankor enn fwa bonn fet tou bann ansennyan. Mersi Mr Speaker.

(APPLAUSE)

MR SPEAKER

Mersi Onorab Lemiel. Onorab Sandy Arissol.

HON SANDY ARISSOL

Mersi Mr Speaker. Bonzour Mr Speaker. Bonzour tou Manm Onorab ek tou dimoun ki a lekout espesyalman bann ansennyan.

Mr Speaker pli gran ansennyan ki ti egziste lo later

sete Zezi li menm parey nou tou nou konnen. Sa deza i montre poudir ansenneyan i en louvraz nob e onnet. Alor pou sa lokazyon Mr Speaker mon ti a kontan dir 3 pti keksoz.

Premyerman mon ti a kontan dir mersi nou bann ansenneyan, edikater parey ou'n dir ou menm ou dezyenm paran nou bann zanfan. Nou anvi dir zot mersi bokou pou zot letan ki zot fer avek nou zanfan, ki souvandfwa nou koman paran nou pa neseserman ganny menm kantite letan ki zot, zot fer avek nou zanfan.

Alor ozordi i en lazournen nob parske zot, zot en group dimoun ki nob e pe fer en profesyon ki nob. Alor mon ti a kontan dir zot mersi.

Dezyenmman Mr Speaker mon ti a kontan osi dir mersi tou bann *non-teaching staff* dan bann lekol, parske zot osi zot siport nou ban ansenneyan pou fer sa louvraz nob e pou protez e kontan nou zanfan.

Trwazyenmman mon ti a kontan dir avek bann paran, mwan ki en paran, ou ki en paran, nou tou ki en paran ek tou bann etidyan pou nou apresye e kontan nou ban ansenneyan edikater.

Annou montre zot lanmour e respe zis parey nou koman kretyen nou monte sa

lanmour e respe pour nou zezi ki nou kontan.

Alor Mr Speaker mon ti a kontan swet tou bann ansenneyen en bonn fet e remersye zot pou sa louvraz nob ki zot pe kontinyelman fer. Mersi bokou.

(APPLAUSE)

MR SPEAKER

Mersi Onorab Arissol. Madanm Clerk nou a pran Prezantasyon Dokiman.

MADAM CLERK

Mersi Mr Speaker. Bonzour Mr Speaker. Bonzour tou bann Manm e tou dimoun ki a lekout. Bann Papye ki pe ganny prezante;

S.I. 84 of 2021 Land Reclamation (Retrospective Authority) Order, 2021

S.I. 85 of 2021 Alcoholic Drinks Control (Removal of Moratorium for Issuance of Licences for Manufacturing Alcoholic Drinks) Notice, 2021.

S.I. 86 of 2021 Public Debt – African Development Bank – Governance Economic Reforms Support Program (GERSP) 2021.

S.I. 87 of 2021 Beneficial Ownership Act (Compliance of Legal Persons and Legal Arrangements) Notice, 2021.

S.I. 88 of 2021 Road Transport (Omnibus Fares) (Amendment) 2021.

S.I. 89 of 2021 Public Persons (Declaration of Assets Liabilities Business Interest) (Amendment) Act, 2021 (Commencement) Notice, 2021

S.I. 90 of 2021 Education (Teachers Council of Seychelles) Regulations, 2021.

Mersi Mr Speaker.

MR SPEAKER

Mersi Madanm Clerk. E nou a pran egalman *First Reading Bills* Madanm Clerk.

MADAM CLERK

This Act may be cited as a Statute Law Revision (Miscellaneous Amendments) (No. 2) Act, 2021.

This Act may be cited as the Minor Offences (Fixed Penalties) (Amendment) Act 2021 and shall be read and construed as one with the minor offences (Fixed Penalties) Decree Cap 132 which is hereinafter referred to as a principal Act.
Mersi Mr Speaker.

MR SPEAKER

Mersi Madanm Clerk. Prezan nou pare pou komans avek bann kestyion. Madanm Reporter mon ava envit ou pou

apel Vis-Prezidan e son delegasyon.

Bonzour Vis-Prezidan Ahmed Afif ki isi pou bann kestyion bann Manm ozordi. E avek Vis-Prezidan bonzour e byenveni osi Mr Glenny Savy *Chief Executive Officer* pou IDC.

E nou a komans avek kestyion 92, Onorab Richard Labrosse.

HON RICHARD LABROSSE

Bonzour Mr Speaker. Mersi pou donn mwan laparol. Mr Speaker avan mon demann mon kestyion, parey bann lezot koleg in fer mon ti a kontan swet tou bann ansennyan dan Sesel partou, espesyalman bann ansennyan kot Lekol Plaisance Primer ek Segonder en bon lazournen ozordi.

E a lapar tou paran, a laper tou dimoun dan kominote, nou dir zot mersi pou tou sa ki zot pe fer pou nou bann zanfan grandi pou ganny sa ledikasyon.

Mr Speaker mon al direk lo mon kestyion; bi sa kestyion li menm li i bann konversasyon ki nou'n fer dan distrik avek mon *constituent*. E la mon ti a kontan ki Vis-Prezidan ti ava donn lenformasyon piblik pou tou dimoun tande. Mon kestyion 92 i al swivan;

Avek bi pour ankouraz prodwi alimantasyon lokal e redwir lenportasyon, eski Minis ki responsab pour Zil, i kapab eksplik sa Lasanble ki plan Gouvernman lo sa size devlopman enn de nou bann zil konman laferm lagrikiltir, legim ek fri? Mersi Mr Speaker.

MR SPEAKER

Mersi Onorab. Vis-Prezidan mon envit ou pou donn ou repons.

THE VICE-PRESIDENT AHMED AFIF

Mersi bokou Mr Speaker. Mr Speaker, *Leader of Government Business*, bann Manm Lasanble e tou dimoun a lekout permet mwan dabor pou osi pas mon meyer swe pou tou nou bann *teachers* dan pei ki pe fer en travay nob.

Mr Speaker ou osi ou'n enn mon bann ansenyan, alor pou ou osi ki'n travay dir dan sa profesyon, mon swet ou tou de bon e dir ou mersi pou tou sa ki ou'n fer. E pou tou bann *teachers* ki dan pei ki pe ede pou anmenn en meyer zenerasyon demen, mersi bokou pou zot travay.

Lo kestyon 92 Mr Speaker par Onorab Labrosse, les mwan dir tou dabor ki dan plan devlopman zil pou lannen 2018

a 2023. *IDC* in souliny tou ban proze devlopman lo bann zil anba son responsabilite. Parmi lezot proze, sa plan i osi enkli devlopman dan sekter lagrikiltir ki *IDC* i anvizaze fer pandan sa prosen 5an.

Alor mon akoz lo prodiksyon fri ek legim dabor. I annan 2an depi ki *IDC* pe fer bann lesey lo diferan prodwi agrikol lo laferm Desroches pou determinen ki varyete plant ki pou pou s pli byen dan lanvironnman zil. Kot later disab i zeneralman pli meg an term nitriyan.

Pou note ki *IDC* in bezwen fer sa bann lesey lo limenm, akoz konmela Mahe in nepli annan en sant ki fer resers lo bann plant ek bann teknolozi ki pli adapte pou zot prodiksyon. An konsekans tousala i bezwen fer lo zil menm. Alors lo Desroches *IDC* in tir en ektar later pou fer son bann lesey. Rezulta pe deza montre bann siny ankourazan.

IDC pe prodwi legim ki nou servi toulezour parey bred, piman, brenzel ek tomat parmi lezot ki ganny servi prensipalman lo zil. Si mon pran tomat koman en legzanp, pandan ki Mahe ek Praslin ti pe sibir konsekans pest *tutta absoluta* e Lotorite ti bezwen met mezir an pas pou anpes

propagasyon sa pes 2000 kilo tomat sorti Desroches tiourni marse Mahe pandan sa detrwa mwan.

Sa i akoz napa sa *pest* lo sil. Apard legim i osi annan bann fri ki ase rar lo marse lokal parey fig ki *IDC* pe prodwir. Bokou sa bann fri ek legim ki mon mansyonnen, i van direkteman avek Lotel *Four Seasons* Desroches. Sa i vedir ki lotel pa bezwen enport sa bann prodwi sorti Mahe, e kliyan i ganny bann prodwi fre sorti lo zil menm.

IDC pe osi sonny poul pou dizef Desroches ki i vann prensipalman avek lotel. Tou sa bann konesans e savwar fer pou ganny transfer lo en pli gran lesel lo Zil Coetivy.

Coetivy in ganny idantifye koman zil pli ideal pou sa kalite devlopman akoz zil i gran, vedir i annan plis lespas pou fer lagrikiltir e i annan en pli gran rezerv delo souteren pou irigasyon. E zil i pa to lwen avek Mahe.

Me pa fer sans pou *IDC* prodwi legim pou fer konpetisyon avek bann pti fermye Praslin ek La Digue. Si sa i arive, i pou annan en lenpak negativ lo devlopman lagrikol dan pei. Prodiksyon i bezwen koegziste e konplemant kanmarad.

IDC alor pou konsantre lo bann prodwi agrikol ki a ranplas lenportasyon par egzanp lavanniy, zonnyon ek zenzanm ki pa an konpetisyon avek okenn fermye lokal. Sa ki *IDC* pou osi kapab fer se prodwi legim ek fri, ki rar lo marse pandan serten sezon dan lannen.

Travay netwayaz lo zil an preparasyon pou komans devlop lagrikiltir Coetivy i dan en staz vreman avanse. *IDC* in osi rankontre e envit bann fermye pou form parti sa programm devlopman lagrikiltir lo Zil Coetivy.

I bon fer resorti Mr Speaker ki apard sa de zil kot lagrikiltir pou lo en gran lanpler tou lezot zil *IDC* i annan son prop zarden fri ek legim pou konsonmasyon bann travayer lo zil menm.

Prodiksyon poul;- akote lagrikiltir *IDC* i osi annan plan pou fer en lenvestisman ase konsekan dan lenfrastruktir pou prodiksyon poul lavyann lo Zil Coetivy. *IDC* in finaliz son letid fezabilite pou prodwi 1000 tonn metrik pou tou le lannen, sa i reprezent 20 a 25poursan konsonmasyon anyel lavyann poul lokalman.

Pou prodiksyon poul, *IDC* pou adopte en sistèm semi *free range* ki permet prodwi

meyer kalite lavyann poul, ki pli an bonn sante ki sa poul ki nou pe enporte dan pei ozordi. *IDC* pe eksplor bann posibilite finansman pou sa proze.

Aquaculture;

En lot konponan devlopman dan sekter lagrikiltir lo Zil Coetivy se *Aquaculture*. Sa proze i dan en staz avanse *IDC* in endike ki i pou prodwi de kalite kanmaron pou konsonmasyon lokal. Sa i apel *black tiger prawns*, sa menm kalite kanmaron ki *SMB* ti prodwi, e lot kalite i apel *white shrimp*.

Bann basen ki pou servi pou sa proze in fini ganny netwaye e i amelyore. *IDC* in rankontre serten retar avek fourniser pour serten konponan sa proze. I pe ekspekte bann liner sorti Lanmerik arriv dan pei an Desanm e bann premye kanmaron ava dan basen an Mars lannen prosenn.

Tou bann konponan sa plan pou devlopman lagrikiltir pe ganny diskite avek Minister Lagrikiltir. Komite Zil *IDC* in fer en propozisyon avek Lasanble Nasyonal, pour ki Komite Zil i ganny reetablir pour ki i annan plis kolaborasyon ant bann Manm Lasanble ek *IDC*.

Sa i a osi etablis en striktir pou bann Manm pli byen konpran travay ki *IDC* pe fer lo

bann zil. Vwala mon larepons Mr Speaker.

MR SPEAKER

Mersi VP. Onorab Labrosse ou annan siplemanter?

HON RICHARD LABROSSE

Wi Mr Speaker. Pa neseserman siplemanter, mon krwar VP in donn ase lenformasyon ki vreman ankourazan osi. Me lo mon kote la mon ti kapab dir osi met en sizesyon devan *IDC*, parey VP in dir zot pa pe compete avek bann pti fermye.

Me kekfwa la nou ti kapab osi parey ou'n dir bann prodwi ki nou servi plis, kekfwa zot ti a kapab vin parey en stok kot zot ler napa lo marse Mahe zot, zot ti kapab vin sa *second rescue* parey nou dir.

E la osi bann fermye osi mon'n tann VP fer sorti zot kapab osi konmans koste devan, get kote zot kapab osi antre dan sa lenvestisman.

E VP dernyen, zis en pti leklersisman, ou'n nonm sa prodiksyon kanmaron ki zot pe al ladan, kekfwa bann dimoun deor la pou demande.

So ki *IDC* pou anmennen ki nou konnen poudir *SMB* avan ti fer sa ti *fail*, so ki *IDC* pou anmennen ki pou fer sa prodiksyon li menm vin enn ki

valab ek parey nou dir pou nou pa gaspiy larzan? Mersi.

MR SPEAKER

Mersi Onorab. Vis-Prezidan.

THE VICE-PRESIDENT **AHMED AFIF**

Mersi Mr Speaker. Mr Speaker petet mon a pran sa dezyenm konponan ou kestyon sirtou akoz *IDC* e ki mannyer sa an relasyon avek sa ki Gouvernman in deza fer atraver *SMB*.

Mon krwar diferans se ki *SMB* sa letan ti ganny finanse par Gouvernman, e ler i ti pran bann *loan* par egzant pou al fer sa son bann *loan* ti garanti par Gouvernman Sesel. Alor e finalman i ti vin en fardo lo Gouvernman. Tandis ki dan ka *IDC* i pa pe pran okenn *loan* lo Gouvernman, i pe fer antyerman lo son plan lenvestisman e Gouvernman li i pa pe pran okenn risk ladan.

Sete enn bann rezon ki sa letan dan reform ekonomik, bann partener multilateral ti ensiste ki Gouvernman i tir bann risk dan tou sa ki pi pe fer. E se pour sa rezon ki sa letan e sa loperasyon li menm pa ti kapab ganny soutenir finansyelman e Gouvernman ti bezwen sibvansyonn li.

Se pour sa rezon ki Gouvernman ti pran sa desizyon sa letan ansanm ek tou son bann partener pou aret sa loperasyon. Me ozordi si ou annan en lorganizasyon ki lo li menm avek son prop resours i santi ki i kapab fer sa san okenn lasistans Gouvernman se pour sa rezon ki li i pe fer li. E nou, nou ankouraz li si i kapab fer li mars lo en lesel akseptab.

An sa ki konsern premye kestyon lo bann sizesyon ki ou'n mete, avek ou permision Mr Speaker mon ti a demann *CEO IDC* pou kapab reponn sa bann kestyon.

MR SPEAKER

Mersi *VP. CEO* wi ou kapab adres sa kestyon.

CEO IDC GLENNY SAVY

Mr Speaker. Manm Onorab bonzour. Onorab sa ki Vis-Prezidan in fer resorti se ki dan son papye se ki i enportan ki ler *IDC* i pran en desizyon lo kwa i pou al prodwi lo zil, i enportan ki nou fer sa an kolaborasyon avek Minister Lagrikiltir e an kolaborasyon osi avek sa ki pe pase lo Mahe, Praslin e La Digue.

Akoz ler nou to pe prodwi poul byen lontan pase, nou ti prodwi en gran kantite poul ti

ariv en sityasyon kot ler bann pti fermye lo Mahe Praslin ek La Digue ti bezwen kota pou zot fer poul osi nou, nou ti bezwen dimini nou kota pou kapab donn zot sa posibilite.

Donk nou oule fer sir sa voyaz ki i annan en pti pe plis planifikasyon dan sa ki pe ganny fer;- par egzant dan lasezon tomat normalman nou pa devret par egzant nou lo zil pe desann avek 5, 10, 15 tonn tomat, akoz i pou vin rann lavi bann fermye dan nou bann zil pros pli difisil.

Donk sa planifikasyon ki nou pou prodwi, kan nou pou prodwi set en keksoz ki nou pe diskite avek Minister Lagrikiltir. E parey in ganny dir se prensipalman serten legim dan bann lasezon difisil lo bann zil pros nou ava sey prodwi en pe lo bann zil elwanye pou alimant nou marse lokal.

Me ki pa pou an konpetisyon ki pou afekte bann pti fermye isi lokalman. Me pli gro problem ki nou annan ozordi zour, se pou rekomans fer bann *trials* parey lontan nou ti annan en stasyon resers Grand Anse ki ti fer sa bann *trials*, bann nouveau legren, bann diferan later eksatera.

Nou nepli annan sa lenfrastriktir donk nou bezwen komans apartir zero e

determinen egzakteman bann teknik e ban nouveau varyete ki pou adapte lo zil pour nou kapab fer sa.

Me *rest assured* parey nou dir ki nou bi se pour vin prodwi sa ki nou pei i bezwen. E evidaman i annan sa lot vole osi lo, i annan prodiksyon ki pou ranplas lenportasyon, par egzant zonnyon nou'n deza komans fer li Desroches e i pe mars ase byen, zenzanm, lay, e pi en gran plantasyon lavyann lavanniy ki ava pou leksportasyon.

E sa i ava ganny fer lo en gran lesel. Mersi Mr Onorab.

HON RICHARD LABROSSE

Ok, mersi Mr Speaker. Alor mon a dir IDC kontinyen sa bon travay. Thank you.

MR SPEAKER

Mersi CEO avek VP. Nou a pran kestyon siplemanter bann Manm. Onorab Waven William.

HON WAVEN WILLIAM

Mersi Mr Speaker. Bonzour tou dimoun ki a lekout. Mon osi mon oule profit sa lokazyon pou mon swet tou bann ansennyan bonnfet, i en moman refleksyon osi tou.

Mr Speaker mon kestyon i *comme* swivan; tou dabor mon oule demann avek Vis-Prezidan

ou CEO IDC, par lefe ki Vis-Prezidan ou'n mansyonnen dan ou prezantasyon ki IDC in osi antre e envit bann fermye pou form parti sa programm devlopman lagrikiltir lo Zil Coetivy.

Mon anvi demann avek Vis-Prezidan ki staz zot in arive avek sa bann diskisyon e ki vreman lentere ki bann fermye pe montre?

E mon santi poudir IDC ozordi in ariv en pwen devlopman kot i annan lekspertiz. E eski zot pe mazin osi antre dan *join venture* avek bann fermye par lefe ki IDC pe rod finansman bann fermye mon santi ki annan mwayer ozordi ti kapab antre dan bann *joint venture* dan sa bann proze ki ase enteresan? Mersi.

MR SPEAKER

Mersi Onorab. Vis-Prezidan.

THE VICE-PRESIDENT AHMED AFIF

Mersi bokou Mr Speaker. Mersi Onorab. Onorab sa bann kestyon i vreman vize lo sa ki IDC in deza fer e mon ti ava demann avek permisyon Mr Speaker pou permet Mr Savy koman CEO pou reponn sa de kestyon.

MR SPEAKER

Mersi VP. CEO.

CEO IDC GLENNY SAVY

Mersi Mr Chairman. Mersi Onorab. Onorab in annan plizer rankont ant *management* IDC avek bann lasosyasyon fermye a se pwen. E osi dan konsiltasyon an prezans Minister Lagrikiltir.

E IDC in met devan bann lasosyasyon bann posibilite ki annan lo Coetivy pou kapab fer lagrikiltir e envit zot ek zot bann fermye pou konsider fer prodksyon lagrikiltir lo Coetivy. I annan en bann demann ki bann fermye in fer avek Gouvernman e ki mon sipoze Gouvernman i a pe konsider lo la.

Me i annan serten demann ki zot pe demann nou koman IDC pou fer ki nou, nou war li ase difisil lo nou kote pou fer li, lefe ki nou en parastatal komersyal e nou pa en lorganizasyon ki depen oubyen ki pou al demann Gouvernman sibvansyon pou fer sa prodksyon lo Coetivy.

Nou bi se fer en prodksyon lo Coetivy ki komersyalman i kapab debout lo son de lipye. Byensir nou ekspekte ki parey dan tou pei lemonn ki annan Gouvernman i fer en serten kontribisyon dan prodksyon lagrikiltir.

Me fodre ki sa ki nou fini finalman lafen lazournen set en prodwi ki kapab, en devlopman ki pou soutenab e non pa pou depann lo Gouvernman lannen vini, lannen ale.

Avek bann lasosyasyon nou bann negosyasyon i ankor ouver, me i annan osi bann fermye prive ki'n apros nou endividelman ki pa neseserman dan bann lasosyasyon, pou vin fer lagrikiltir avek nou lo zil elwanye. E sa nou'n akeyir e nou pou al devan avek sa.

Ki sa avek bann lasosyasyon oubyen ki ban fermye prive pou nou say lagrikiltir an zeneral.

JV wi Mr Onorab nou napa okenn lobzeksyon pou nou konsider en *joint venture* avek okenn fermye ki ava *join* nou e mon pa pou koz zis lo kote plant, me osi lo kote aquaculture kot i annan bokou posibilite.

Donk *IDC* i ouver avek nenport ki sizesyon, ki okenn fermye ki anvi vin diskit avek li. Me evidaman nou pe koz plito lo bann prodiksyon gran lesel. Akoz parey ou konnen ou menm pou kapab fer keksoz marse lo zil ou bezwen fer li avek en serten *minimum* kantite akoz sinon i pou tro ser. *Thank you* Onorab.

MR SPEAKER

Mersi. Onorab William, Onorab ou annan klarifikasyon?

HON WAVEN WILLIAM

Yes Mr Speaker.

MR SPEAKER

Silvouple fer li vit mon annan lezot Manm ki pe atann, wi.

HON WAVEN WILLIAM

Mersi Mr Speaker *for your indulgence*. Mon anvi demann, avek ou permisyon, Mr Savy par lefe ki zot annan bann nouvo lapros e ou menm ou'n mansyonnen poudir lo kote resers ki enportan pou devlopman lagrikiltir.

Eski *IDC* pe mazinen travay an *close* kolaborasyon avek Minister Lagrikiltir? Akoz mon santi poudir lo Mahe i deza annan bann, bokou difikilte vizavi fer bann resers, eski i ava mazin lo la pou vreman travay an pros kolaborasyon pou benefis bann prodikter lokal? Mersi.

MR SPEAKER

Mersi Onorab. CEO ou adres sa silvouple.

CEO IDC GLENNY SAVY

Mersi Mr Speaker. Onorab toutafe dan tou nou bann

negosyasyon avek bann fermye e nou negosyasyon avek Minister pou bann lakantite keksoz e la kantite keksoz ki nou pe al prodwi i ganny fer ann etrwat kolaborasyon avek Minister Lagrikiltir. *Thank you.*

MR SPEAKER

Mersi. Onorab Aglae.

HON EGBERT AGLAE

Mersi Mr Speaker. Bonzour Vis-Prezidan e CEO. Mr Speaker mon oule swet osi tou nou bann *teachers* ozordi pou zot lazournen parey.

Minis ouswa *CEO* eski ou kapab petet eksplik mwan - mon konnen mon'n war sa portre ki zot pe sey penn pou vizyon *IDC* mon konnen dan lepase osi ti annan serten bann prezantasyon ki ti ganny fet lo size teritwar serten nou bann zil pou lagrikiltir.

Dan menm laliny en pe parey Onorab William, kot i konsern bann fermye ki annan lentere mon aprann zot ti envit bann fermye ki annan lentere pou fer serten devlopman.

Eski sa size bann teren lo zil i ankor lo latab pou *allocate* serten bann fermye, pou kapab fer serten prodiksyon tout avek gidans *IDC* byensir? Eski sa i ankor lo latab ouswa *IDC* li menm li pou zer tou sa bann

keksoz i pou al fer lo li menm?
Sa i enn.

Dezyenmman kot i konsern en pti pe la transparans, akoz bokou Sesselwa pa pe neseserman konpran aktivite *IDC* kot i konsern lagrikiltir. Eski Vis-Prezidan vi ki ou Minis Lenformasyon.

Zot pou rod en fason pou met Sesselwa azour byensir tou sa bann aktivite ki *IDC* i anvi antreprann kot i konsern lagrikiltir pou nou kapab konpran ki direksyon pei pe ale kot i konsern nou bann keksoz de baz.

Sirtou kot i konsern parey ou'n nom zonnyon, ou'n nom enn de bann konteks ki zot anvi substitute pou koup en pe lo *foreign exchange*, eski sa i kapab ganny fer? Mersi.

MR SPEAKER

Mersi Onorab. Vis-Prezidan.

THE VICE-PRESIDENT AHMED AFIF

Mersi Mr Speaker. Mersi Onorab Aglae. Wi sertenman mon dakor avek ou sizesyon avek ou ki kot nou kapab partaz plis lenformasyon, sirtou lo prodiksyon lokal bann keksoz ki tradisyonnelman pa pe ganny fer, mon krwar sa i devret partaze.

E byensir partaz osi leksperyans *IDC* lo zil, parske i pli difisil pou prodwi ler ou pli lwen avek Mahe.

Me zot in trouv fason pou fer li. Byen sir *IDC* i annan serten lavantaz lo nenport, en lot operator par lefe ki li in deza etablir pandan plizyer lannen. In deza annan lenfrastriktir ki deza in met an plas e alor pou li i annan sa lesel *economies of scale* parey mon dir, pou li kapab fer son loperasyon kapab vin bokou pli efikas, ki en dimoun konpletman an deor ki pou vin etablir.

Me pou reponn premye kestyon, ki mannyer i pe travay avek lezot fermeye, ki mannyer i pou regard lot loportinite osi pou zot osi. Avek ou permisyon Mr Speaker mon ti a permet CEO *IDC* pou reponn sa enn la. Mersi.

MR SPEAKER

Mersi VP. Wi CEO.

CEO IDC GLENNY SAVY

Thank you Mr Speaker. Onorab wi nou lentansyon sete pou met a la dispozisyon bann fermeye lo zil Coetivy, met a zot dispozisyon, later pou zot fer zot prodiksyon e la kantite later i pou depann en pti pe lo aktivite ki zot fer e la kantite zot bezwen.

Donk larepons i wi. Definitivman bi se pour pas sa bann later dwat li en bay pou en pti pe letan pou en dire letan pou fer zot korize sa ki zot pou anvi fer. Sa se en bi.

Dezyenmman nou plan devlopman lagrikiltir i dan nou *National Development Plan 5an*. I form parti sa. I lo nou *website* i lo nou plan devlopman. Set en plan devlopman ki'n deza ganny soumet, Gouvernman i aprouve.

Wi mon pran ou sizesyon, mon sey kekfwa eski *IDC* i kapab rod en fason pour fer konn en pti pe plis - mon pa tro sir si oule dir *public at large*, oubyen si ou pe dir ban fermeye direkteman. Me si ou pe dir bann fermeye direkteman sanmenm sa rezon nou ti envit tou bann lasosyasyon.

Akoz pou nou bann lasosyasyon i reprezent sa bann fermeye e tou sa bann fermeye ki dan lasosyasyon. E parey mon ti dir taler si en fermeye pa dan en lasosyasyon nou osi nou resevwar li koman en prive, me nou pran ou sizesyon pou gete ki fason nou a kapab devlop sa bann nide, e fer li en pe pli publik e dan ki fason ki nou ava gete *in-house* ki mannyer ki nou kapab fer sa.

Me parey mon dir nou bi, nou lentansyon se pour fer

lagrikiltir e met a la dispozisyon tou bann fermye sa later ki i pou bezwen pou li devlop son aktivite lagrikiltir. Mersi Mr Speaker.

MR SPEAKER

Mersi CEO. Onorab Gervais Henrie.

HON GERVAIS HENRIE

Mersi Mr Speaker. Bonzour tou dimoun. Mon annan 2 pwen. Baze lo statistik ki Vis-Prezidan in donn nou lo prodiksyon *IDC*. Par egzanp 2mil tonn tomat resaman ouswa lentansyon pou prodwi 1000 tonn poul. Mon anvi konnen ki mannyer sa i pou *clash* avek prodiksyon lokal, deza kot bann prodikter i kapab santi poudir *IDC* pe kwens zot.

So ki mannyer nou pou kree sa balans, donn *IDC* lespas me selman an menm tan posibilite pou bann prodikter agrikol lokal osi kapab ogmant zot prodiksyon? Sa i mon premye pwen.

Dezyenmman, mon vwar gran potansyel dan kreasyon lanplwa ler nou devlop lagrikiltir lo bann zil elwanye. E osi pou kapab soulaz programm reabilitasyon ki swa pou prizonnyen, bann kondannen plito e avek bann *drug addict*. Ki mannyer sa de zafer i antre

dan sa programm, kreasyon lanplwa avek programm reabilitasyon? Mersi.

MR SPEAKER

Mersi. VP, wi.

THE VICE-PRESIDENT

AHMED AFIF

Mersi bokou Mr Speaker. Mersi Onorab Henrie. Petet zis pou komanse, en pti koreksyon lo sa sif ki ou'n nonmen. Ler mon ti pe koz lo tomat, mon ti pe dir 2 mil kilo, pa 2mil tonn. 2 mil kilo. E alor i pa en kantite ki menas bann fermye lokal. E sirtou sa ti ganny fer dan letan kot *tutta absoluta* ti'n ravaz plizyer laferm lo Mahe, alors ti napa. Alors nou pa ti pe compete avek zot.

E lo kote prodiksyon poul, parey ou konnen. La an se moman i annan en problem prodiksyon zeneralman dan Mahe, akoz nou ankor pe enport en kantite. Alors i pa pe met en presyon enorm sa prodiksyon. Mil tonn, mon pa krwar i pe menas fermye lokal.

Me lo kote pou dezyenm kestyon ki, ki mannyer nou kapab mye servi bann resours ki si parey prizonnyen oubyen bann lezot dimoun tel ki bann adikt.

Mon ti a permet avek ou permisyon Mr Speaker, ki Mr

Savy i ava donn leksperyans e son pwennvi lo ki mannyer ou kapab servi.

Mon krwar i toulstan annan potansyel, me tousala i vain avek en risk. Me si ganny fer korekteman mon krwar i annan en fason devan. Me mon a permet avek ou permisyon Mr Speaker, k Mr Savy i a kapab reponn sa enn la.

MR SPEAKER

Mersi VP. CEO.

CEO IDC GLENNY SAVY

Thank you, Mr Speaker. Onorab, zis pou azout en pti git lo sa ki Vis-Prezidan in dir, pou ozordi zour, an fen *pre-COVID* konsonmasyon poul lo nou mase lokal i apepre 5 mil tonn par an. E ozordi zour nou prodksyon apenn si i tous mil tonn par an. Donk i annan en gran gap pou nou fermye Seselwa, pou nou ranpli avan ki nou ariv lo lakantite ki nou bezwen pou nou konsonmasyon.

E si *IDC* demen i antre dan en prodksyon kot nou pou fer ant 1000 a 1200 tonn par an, i pou reprezent zis apepre 20 poursan prodksyon total. E nou pe target sa. Epi nou ava vwar ki mannyer bann fermye lokal, afen bann zil pros pe devlope pou ranpli sa gap ki

pou reste ankor apepre 300 mil a 3500 tonn ki nou pou bezwen prodwi. Sa se en premye pti pwen klarifikasyon.

Dezyenmman Onorab, lanplwa se enn nou pli gro *challenge* ki nou annan lo nou bann zil elwanye. Nou annan en kantite plas pou anploy en kantite dimoun. Me vreman dan mon 40an tann servis se bann pli gro *challenge* ki mon'n gannyen. Se pou ganny dimoun ki anvi al travay lo zil.

Pli resaman avek Minister Lanplwa nou'n fer en kantite zefor lo kote *recruitment*, eksetera, eksetera. Me ki nou pe vwar, se ki laplipar nou bann dimoun ki vin rod en plas travay, *either* i annan en problem labi sibstans ki anpes zot al lo zil.

Ou dezyenmman zot ganny, mon pa dir forse, me zot pran en louvraz pou al travay lo zil e vreman, zot leker pa ladan e ler zot ariv laba apre detrwa semenn zot komans ganny en kantite problem zot oule retour Mahe.

Lo kestyion, i pou reste en *challenge*. I pou reste en *challenge* me nou pa ou bes lebra. Nou pe gannyen detrwa, i pe ogmante, but *very, very slow* parey nou dir.

Lo kote reabilitasyon avek prizonnyen. Nou annan en

programm aktyelman avek prizon, kot nenport ki prizonnyen ki oule al travay lo zil i annan sa posibilite pou fer li. I annan detrwa kondisyon ki prizon in etabli. Setadir ki fodre se en prizonnyen ki *drug free* e si i anvi ale, i annan problemm drog, i al dan en programm. Koman i fini sa programm i vin lo zil avek nou.

Mr Speaker, mon krwar nou pou dezapwente ozordi zour ler nou pou dir, malerezman i annan zis apepre 5 dimoun ki'n vin devan, ki'n anvi al lo zil pou al travay lo zil. E nou ti annan apepre 7, annan 2 in deside retournen, e nou annan 5 dimoun. Me sa programm i ouver.

E lo kestyon reabilitasyon enn fwa ki Gouvernman, sa Lazans ki ansarz sa, i ava donn sa posibilite pou nou kapab anmenn dimoun lo zil ki'n deza ganny *detox* - akoz evidaman i annan en problemm medikal pou anmenn en dimoun lo zil ki ankor anba lenfliyans sibstans akoz nou napa sa swen medikal ki i pou bezwen.

Me moman ki sa in pare, evidaman nou pou aksepte e nou pou pran sa bann dimoun akoz nou byen bezwen mendev lo zil. Mersi Onorab.

MR SPEAKER

Mersi CEO. Onorab Sophola.

HON NOLINE SOPHOLA

Mersi Mr Speaker. Bonzour Mr Speaker. Bonzour tou dimoun a lekout. Mr Speaker, koman en ansenyan par profesyon, mon pa kapab les sa loportinite pase, san swet tou ansenyan, espesyalman ansenyan lo La Digue bonn fet. *Keep up the good work !*

Mr Speaker, VP in koz devlopman lagrikiltir lo sa serten zil *IDC*, eski i kapab dir Lasanble ki devlopman agrikol ki annan pou zil Silhouette, akoz i annan plizyer konsern lo sa size? Mersi Mr Speaker.

MR SPEAKER

Mersi. VP si ou kapab adres sa.

THE VICE-PRESIDENT AHMED AFIF

Mersi Bokou Mr Speaker. Mr Speaker, mon konnesans me mon a permet avek ou permisyon *CEO IDC* pou reponn lo Silhouette, se ki i en zil ki difisil pou lagrikiltir, prensipalman akoz son zeolozi, i en zil ki montannye, napa bokou plato. Me avek ou permisyon mon a permet Mr Savy ki'n fer en pe lesey lagrikiltir lo zil pou partaz son leksperyans. Mersi.

MR SPEAKER

Mersi Vis Prezidan. *CEO.*

CEO IDC GLENNY SAVY

Thank you, Mr Speaker. Onorab Mersi. Silhouette dan lepase, byen lontan pase se en zil ki ase fertil, ki ti prodwi en pe prodwi lagrikiltir e an realite dan lepok *IDC* nou tir prodwi en kantite poul avek denn lo sa zil. Me sa *site* kot nou ti pe fer lagrikiltir, azordi zour i annan en lotel 100 lasanm.

Akoz nou ti bezwen aret fre poul lo Silhouette. Arive en serten moman akoz parey mon ti eksplike, mon'n deza eksplike, nou ti annan demann pou pas sa *quota* avek bann pti fermye lo Mahe, Praslin ek La Digue. E nou ti sanz nou stratezi e nou ti devlop lotelri, tourizm pou ranplas sa prodiksyon poul ki nou ti pe fer lo Silhouette.

Dezyenmman, fodre nou pa blyie ki 95poursan later Silhouette i anba *National Park status*. Setadir lo sa *Nations' Park*, later *National Park* nou pa kapab fer okenn prodiksyon.

Later ki reste, i reste en pti bout later lo kote Grand Anse avek Gran Barbe, i vreman limite pou kapab fer lagrikiltir. Nou annan en pti zarden Silhouette ki prodwi en pti pe legim pou nou bann zabitant e

lotel, me nou napa sa volim later kot nou pou kapab prodwi legim lo en pli gran kantite, parey nou ti pe fer avan ler nou ti annan sa bout later kot lotel in ganny fer.

Silhouette i annan en potansyel fer en pe fritye dan montanny. Me se en keksoz ki nou pou bezwen al negosye avek Minister Lanvironnman ek Minister Lagrikiltir pou permet nou met en pe fritye dan montanny, me ki pou tonm dan *National Park*. E sa se en diskisyon ki nou pou al fer avek bann Minister konsernen. Mersi Onorab.

MR SPEAKER

Mersi *CEO*. Nou pe depas letan ki'n *allocate* pou sa kestyon. Me selman vi lentere, mon a kontinyen e petet nou a koup lo lezot kestyon apre pli tar. Onorab Cosgrow.

HON WALLACE COSGROW

Mersi Mr Speaker. Bonzour Mr Speaker, bonzour VP, Bonzour *CEO*. Mr Speaker, mon premye kestyon, *CEO* in eksplik en pti e pa bann aktivite ki zot oule fer Coetivy. A mon avi sa bann aktivite se bann aktivite tre teknik. Sirtou *aquaculture*, e si zot oule osi fer lagrikiltir lo en baz komersyal, i pou nesesit annan serten teknik, serten

dimoun ki konnen ki mannyer i fer sa bann aktivite.

Alors eski *IDC* i annan sa bann lekspertiz or i annan lekspertiz lokal ki zot kapab servi pou kapab fer sa aktivite la letan zot pe demare, sirtou an term *aquaculture*?

Dan menm laliny, eski *IDC* i kapab lo li menm pret larzan pou fer sa bann aktivite, akoz ou konnen i *very, vey capital intensive*. Ouswa eski *IDC* Pou kree en *subsidiary company* ki pou kapab prete e envestir dan sa bann aktivite? E lekel ki pou bann konpozisyon sa lakonpannyen?

Dezyenm kestyon Mr Speaker, eski, petet sa ti devret mon premye kestyon - eski prodksyon lagrikiltir lo sa bann zil, eski i vreman vyab, ouswa *IDC* i pe antre dan sa bann aktivite pou sey soulaz en pti pe marse lokal akoz, konmsi pou en bon pe letan *IDC* pa'n neseserman antre dan *commercial agriculture*, me in focus plis lo *tourism*. So, eski i vreman vyab pou *IDC going forward*? Mersi bokou.

MR SPEAKER

Mersi Onorab. VP wi.

THE VICE-PRESIDENT AHMED AFIF

Mersi Mr Speaker. avek ou permisyon mon a permet *CEO IDC* reponn sa.

MR SPEAKER

CEO, wi.

CEO IDC GLENNY SAVY

Thank you Mr Speaker. Onorab, detrwa keksoz. premyerman prodksyon krevet, *prawns* lo Coetivy nou pe fer li avek. Nou annan en lakor avek en lakonpannyen *Belgique* ki ti osi enplike avek *SMB* pou fer marse sa *prawns*. Setadir prensipalman son teknik prodksyon e son, kot sa ki konsern son kalite manze ki ganny servi.

E sa menm lakonpannyen i annan bann prodksyon *prawns* en pe partou dan lemonn, eksetera. Se menm lakonpannyen ki nou pe servi pou pas nou sa lekspertiz. Sa se premye keksoz.

Dezyenm keksoz, nou'n an kontak avek plizer dimoun ki ti travay avek sa proze *prawns* ki aletranze ozordi zour, e i annan osi apepre 3 ou 4 Seselwa ki ti enplike, ki pou travay ek nou lo sa proze *prawns*.

Prodksyon *prawns* ozordi zour in bokou devlope. Parey ou konnen dan Lazi, Lenn eksetera prodksyon *prawns* se

en keksoz ki'n ogmant enormeman e son teknik i pa paret osi difisil ki i ti ete dan lepok, letan pase. Sa se premye larepons. Donk nou pa tro enkyet lo sa kestyon lekspertiz akoz nou pa pe al re envant keksoz, me nou pe al senpleman fer sa ki tou dimoun pe fer.

Dezyenmman, eski *IDC* i annan kapital pou pret dimoun pou al fer devlopman lo zil? Onorab larepons se ki ozordi zour non, *IDC* dan son manda nou napa sa vokasyon pou pret. Nou pa en *landing institution*. Nou menm, apard ki nou sey finans laplipar nou bann proze atraver nou bann profi. E ler mon pe koz finans nou bann proze, nou pa pe koz zis lagrikiltir.

Me *IDC* i finans tou son bann, son prop lenfrastriktir ki swa erport, ki swa delo, ki swa elektrisite, ki swa *sewage*, ki swa semen. Ki swa bato, ki swa avyon, eksetera, lakaz. Se nou ki finans sa.

E i annan serten proze, par egzanp ler nou aste en avyon, nou pret en pe larzan avek labank eksetera. Donk, nou menm nou pe pret larzan pou fer serten proze. Donk mon pa krwar ki *IDC* dan limedya i annan sa posibilite pou finans dimoun pou fer proze lo zil.

Me *IDC* mon sir i ava annan sa lapeti pou fer *joint ventures* ek dimoun ki anvi vin fer biznes avek nou lo zil. Sa definitivman se en keksoz ki nou kapab get ladan.

Trwazyenm pwen mon krwar ou'n souleve ki valab. Tre valab Onorab, se sa kestyon eski nou pe fer sa prodwi lagrikiltir, eski i pou pli bonmarse? Mon krwar la i annan de fason pou vvar sa. Premyerman se sa kestyon *food security* pou pei.

Parey mon'n dir, mon krwar napa en pei dan lemonn kot son Gouvernman pa sibvansyonn lagrikiltir. E mon krwar isi Sessel, Gouvernman, me i devret fer li lo en fason ki son prodiktivite. Mon pe koz lasistans ki i anmenn ver fermye baze lo prodiktivite, baze lo rezulta e non pa zis sa ki mwan mon apel *handouts*.

Donk, *IDC* i oule zwe en rol dan sa ki konsern *food security* e *food imports substitution*. Setadir otan si nou kapab demen par egzanp prodwi nou prop zonnyon, zenzanm, nou devret fer li.

Akoz se bann prodwi debaz ki demen si nou annan en problem, omwen nou konnen nou annan en serten kantite ki ganny prodwi isi

lokal. En ka klasik par egzant se Moris.

Moris i prodwi en pe ponm de ter, i prodwi en pe zonnyon, en pe zenzanm, eksatera. Me i pa prodwi la totalite son konsonmasyon. I prodwi en par. Konmsa si demen i annan problemm lo lenportasyon, i annan en maladi deor i pa kapab fer vini zonnyon, omwen i annan en pe zonnyon e i tonm dan sa ki nou *apel food security*.

Donk, serten keksoz nou ava kapab prodwi atraver *mechanization* ki ava vann li en pe pli bonmarse pou fer ki par egzant Mahe. Apre i annan osi serten prodwi. Par egzant lavanniy kot i annan en pri lo marse enternasyonal ki tre enportan e ki Sesel i devret kapab fer konpetisyon e i kapab eksporte. *And earn sa foreign exchange* ki evantyelman i ava ganny servi pou enportasyon sa ki nou pa kapab fer.

Eski i pou fyab? Onorab mon personnelman, si ou pran *food security* an kont, ou pran lanplwa ki i pou kree evantyelman, *lifting port substitution*, ou met tousala ansanm, Larepons sete si i fyab.

Akoz mon krwar fransman desizyon ki nou ti pran, mon krwar an 2012 si mon pa tronpe, lo kestyon devret enport

tou keksoz akoz i pli bonmarse, ti en move desizyon. E i ti, in koz nou sa problemm ki nou annan ozordi zour kot nou annan en problemm dan prodiksyon lagrikiltir.

E avek tou senserite, mon krwar ki kekfa komersyalman i pou touzour pli bonmarse pou enport en legim. Me mon krwar ler nou get li *from the national point of view*, wi i fyab. *Thank you Onorab.*

MR SPEAKER

Mersi CEO. Onorab Gill.

HON CHURCHILL GILL

Mersi Mr Speaker. Bonzour VP, bonzour CEO, bonzour tou Manm. Mon premye kestyon se boner CEO in mansyonn *quota* prodwi pou fermye ki Praslin ek Mahe. Me selman si *IDC* pe mazin vreman al dan prodiksyon pou *sustain*, pou kapab *deal* en pe ek lenportasyon, mon santi ki *quota* ozordi i ankor tre feb. Mon krwar sityasyon kot nou devret avek se lenportasyon.

Eski nou Polisi lenportasyon, VP pou mazinen ki a en serten pwen nou pou bezwen revize, akoz menm si *IDC* pe fer lagrikiltir, lezot zil pe fer, mon pa santi ki sa zafer *quota pour lemoman* li ki problemm, mon krwar nou

lenportasyon. Nou devret atak sa.

So, zis ou les nou konnen si a en serten pwen nou pou bezwen revwar en kou nou Polisi lenportasyon anmezir ki prodksyon i monte.

Apre dezyenm;- parey nou konnen *IDC* i annan bokou devlopman an term touristik ki lo plizyer zil. Eski inisyalman sa ban prodksyon i pou vize ver *supply* sa bann letablisman touristik ziska en moman kot i ava annan sirplis, apre pou dekoul isi lo Mahe?

Eski inisyalman sa pou lentansyon. Akoz mannyer ou'n eksplik nou, la inisyalman napa sa kantite prodksyon ki pou kapab dekoul direkteman Mahe ler zot pe komanse la.

Apre dernyen, eski *IDC* pou lonterm i pe mazinen pou ogmant *level of production* ler ki bann keksoz in tom an plas, maksimonm ki posib. E ki sa i ava kapab ed bann fermye isi ki pe *supply* bann Lendistri Touris isi lo Mahe ek Praslin ki an se moman zot pa kapab *supply* li antye.

E si a en pwen lonterm *IDC* pe mazin li osi vini pou donn lanmen, e sa an e retour nou lenportasyon i a kapab koup maksimonm posib. Mersi.

MR SPEAKER

Mersi Onorab. Vis Prezidan.

THE VICE-PRESIDENT AHMED AFIF

Mersi bokou Mr Speaker. Mersi Onorab Gill. Mon pou reponn enn parmi sa 3 kestyon e senn la konsern *quota*. Onorab mon antyerman, mon dakor avek ou ki lo kote *quota* i enportan ki nou, enport desizyon ki nou pran nou bezwen asire ki nou kapab otan ki nou kapab permet prodksyon lokal.

Parske parey in ganny dir, i enportan pou *food security*. I enportan dan kreasyon lanplwa, i enportan pou adapte avek bann nouvo teknolozi. E fer ki finalman ki sa ki pe ganny konsonmen isi Sesel i en keksoz ki nou satisfe avek.

Souvandfwa

lenportasyon, nou pa konnen ki mannyer in ganny prodwi. Napa vreman en sistenm kontrol lo kalite e alors i annan en danze pou pei. E en danze lasante.

Alors mon antyerman dakor avek ou, pou ki Gouvernman i devret an kolaborasyon avek Minister Lanvironnman ek Lagrikiltir osi. Revwar tou bann sistenm kot nou ankouraz olye met limit lo prodksyon lokal. Parske se sa fason ki nou'n prouve pour

ki nou kapab prodwi ler nou prodwi i annan benefis ekonomik e benefis lasante. Alors serten keksoz ki mon krwar nou devret ankouraze ki ankouraz prodiksyon otan ki nou kapab. Mersi Onorab.

E avek ou permisyon Mr Speaker, Mr Savy i ava reponn sa de lezot kestyon ankor an konpetisyon.

MR SPEAKER

Mersi Vis-Prezidan. CEO.

CEO IDC GLENNY SAVY

Thank you Mr Speaker. Onorab mon krwar mon'n sey konpran the gist of your, pou ou kestyon. Ou'n lev en pwen ki tre, tre valab dan lesans ki eski IDC pou konsantre prensipalman, (si mon konpran byen) se prodiksyon pou nou vann lo marse lokal, oubyen eski nou pe fer prodiksyon pou van plito avek letablisman touristik?

Well, ok premyerman sete nou premye bi se prodwi pou nouri bann zil e bann aktivite ki lo bann zil. Par egzanp, evantyelman Silhouette osi nou kapab supply lotel Silhouette out of Desroches, eksetera.

Me nou konnen osi i annan par egzanp serten pti fermye isi ki pe *supply* Silhouette avek serten legitim. E

nou bi sete pa pou anpes sa pti fermye Mahe *supply* Silhouette.

Me par egzanp, mon a donn ou en legzanp enn ki aktyelman. Nou'n komans prodwi dizef. Bon ou pou dir mwan be i annan en kantite fermye ki prodwi dizef Mahe. Wi, i vre. Me ler bann lotel i demann en dizef ki *free range*.

Akoz son kliyan i demann en *free range egg* eksetera. Se la ki nou napa sa e se sa ki Desroches pe fer aktyelman. Nou pe fer en dizef ki ganny prodwi *semi free range* ki bann lotel pe demande.

Donk nou pe *target* en pti pe sa bann prodwi ki nou bann fermye *inter islands*, Mahe ek *inter islands* i annan difikilte pou zot kapab fer li. I pa vedir ki pli tar zot a dan sityasyon kot zot kapab fer. E nou koman en lenstitisyon Leta, parey nou'n fer dan lepase, *if we have to back off* pou donn possibilite sekter prive pou fer en keksoz, *it is something* ki nou a kapab get ladan.

Me sanmenm sa donk, lo komansman letan nou komanse la nou oule fer sir nou pou ki pa afekte nou bann pti fermye. *Ok?*

Me pa vedir par egzanp, annou pran par egzanp tomat. Si nou kapab lo serten zil avek serten teknik prodwi par

egzant tomat dan letan vann norwa, kot nou annan en kantite difikilte pou nou fer sa isi lokalman. Nou ava sey fer li. Me i annan ankor en bon pe resers ki pe ganny fer Desroches lo sa pou nou kapab arriv lo sa staz.

Me wi, nou prodiksyon i plito *gear towards* bann gran konsonmater e bann dimoun ki ava annan en bezwen spesifik ki zot bezwen. I annan serten nou bann lotel pe vin en pti pe pli sofistike akoz sa ki zot pe demande. Zot pe demann ou tomat en serten *size*. Zot pe demann ou zepis serten kalite eksetera. Donk, nou, nou pe get plito dan sa laliny ki dan sa laliny tradisyonnou legim debaz. Mersi Mr Speaker.

MR SPEAKER

Mersi CEO. Nou a termin la pou sa kestyion. Mon a remersi CEO Glenny Savy pou son partisipasyon e mon a envit li pou li fer son depar.

Nou a pran en ti poz teknik pou *sanitize*, si nou lekip transmisyon i zis donn nou sa pti poz e apre nou a kontinyen. Mersi CEO.

(technical break)

MR SPEAKER

Nou a re pran travay. Bonzour e byen venire Mr David Andre. Mer Lavil Victoria pou nou prosen kestyon e kestyon 93, Onorab Waven William.

HON WAVEN WILLIAM

Mersi Mr Speaker. Bonzour Mer Lavil. Eski Vis-Prezidan lo lapar Mer Lavil i kapab eksplik ki, la ki frontyer in ouver e touris pe vini, me kritik ki Victoria i mor, e leokri par artis pou ofer touris zot prodwi pe kontinyen, vreman ki plan kourt, mwayen e lonterm Departman Kiltir i annan dan sa direksyon. Mersi.

MR SPEAKER

Mersi Onorab. Vis-Prezidan.

THE VICE-PRESIDENT AHMED AFIF

Mersi bokou Mr Speaker. Mersi Onorab William. Le mwan dir dabor ki biro Mer Lavil Victoria e Departman Kiltir, i annan son plan pou li gard lavil vivan. Byensir zot pa fer li e nou pa fer li nou tousel. Fodre rapel ki bann biznes osi i bann partner vreman kle pou gard lavil vivan.

Me i enportan pou nou fer rapel ki Sesel ozordi i ankor dan en peryod *COVID*, e ki Departman Lasante in met an plas bann konsider sanniter ki nou tou nou bezwen respekte.

Alors sa bann aktivite i ganny malerezman bokou restrikte.

Me fodre fer remark ki i annan serten aktivite ki'n repran. Par egzant restoran pe vwar en pe plis kliyan, e serten pe menm kapab annan en pti group mizisyen pou met en pti lanbyans. Bann artizan pe re ouver zot bann *kiosk*.

Otan ki mon konnen, nou tou nou pe adapte avek sa ki ozordi nou sa novo normal. Mon konnen i pa fasil, sirtou pou bann artis. Me mon kapab dir zot ki bokou artis pe met zot pare e pe espere ki bann restriksyon i ganny retire oubyen ganny *relax* e bann konser e lezot aktivite ava re pran a ler apropriye.

COVID in enpoz lo nou e se selman avek en bon stratezi lasante ki osi vin ek regroupman limite ki nou bouz de lavan. Mon esper ki nou travers sa peryod difisil ansanm e atrap lanmen kanmarad tou dilon sa parkour. Mersi Onorab.

MR SPEAKER

Mersi VP. Onorab William ou annan siplemanter.

HON WAVEN WILLIAM

Yes, mersi Mr Speaker. Mr Speaker, mon anvi demann avek Vis-Prezidan par lefe ki sa

mwan la nou pe selebre Festival Kreol e mon anvi demann avek Vis-Prezidan, si. Par lefe ki nou konnen ki bann viziter zot apresye nou kiltir. Eski i annan keksoz spesyal ki Mer Lavil pe mazin organize, an kolaborasyon byensir avek bann artis pou egey en pti pe nou lavil, pa neseserman aswar me dan lazournen.

E finalman, zot in toulstan dir bann distrik pran linisyativ. Mon anvi demann avek Vis Prezidan ouswa Mer Lavil, si en endividé ouswa en Lotorite Distrik, i anvi pran serten linisyativ pou egey son distrik. Par egzant si en dimoun i deside pou en *pick-up* met en lanmizik dan en landrwa piblik a en serten moman pou en serten selebrasyon, ki bann prosedir fodre i sivre pou li kapab fer sa. Pa neseserman ki i anvi *disturb* distrik, me kree sa lanbyans par lefe ki Seselwa i kontan en pti pe lanbyans dan sa bann moman parey. Mersi.

MR SPEAKER

Mersi Onorab. VP, wi.

THE VICE-PRESIDENT

AHMED AFIF

Mersi Mr Speaker. Mersi Onorab. Avek ou permision Mr Speaker, mon ava permet Mr

Andre, Mer Lavil pou li kapab reponn sa de kestyon.

MR SPEAKER

Mersi VP. Mr Andre.

MAYOR OF VICTORIA

MR DAVID ANDRE

Mersi. Bonzour Mr Speaker. Bonzour tou Onorab. Mersi bokou pou sa kestyon. Definitivman nou annan plan pou fer bann aktivite pou Festival Kreol. E parey VP in mansyonnen, sa i byensir si nou ganny lotorizasyon Minister Lasante.

Me mon asir zot tou ki pou annan bann aktivite Festival Kreol kot dimoun pou vwar vreman ki menm nou dan lepok COVID, lo restriksyon, Nou pou annan serten aktivite ki pou fer, ki pou fer nou selebre nou kreolite.

Pou annan bokou bann aktivite *virtuel*, me osi fizik anvil pou annan bann legzibisyen. Lavil osi pou ganny serten dekorasyon ki pou montre serten sa lanbyans ki nou pe kree.

Me en keksoz enportan osi ki ou'n dir, se nou pe travay osi an etrwat kolaborasyon avek bann distrik. I annan PS Perin kot *Local Government* ki nou pe lyez avek li direkteman e dan sak distrik bann dimoun pou

ganny enformen, zot annan bann linisyativ ki pe ganny kree.

Ki en mannyer Festival Kreol i pa neseserman zis anvil dan Victoria. I pou partou. Savedir nenport ki landrwa dan Sesel. Mahe, Praslin, La Digue. Okenn dimoun ki anvi fer okenn aktivite, byensir fodre i anliny avek bann konsiny ki Minister Lasante i donnent.

Nou, nou pe *welcome* sa e nou pe travay avek tou bann distrik, avek tou bann dimoun, avek tou bann artis. E mon reasir ou ki menm si sa sityasyon i difisil, nou pou vwar en diferans e Victoria pou selebre son Kreolite.

MR SPEAKER

Mersi Mr Andre. Nou a pran kestyon lezot Manm, siplemanter. Onorab Vidot.

HON AUDREY VIDOT

Mersi Mr Speaker. Bonzour Vis- Prezidan avek Mer Lavil. Tou Manm Onorab, tou dimoun ki a lekout. En bonzour spesyal pou bann ansenyan, espesyalman kot bann lekol Plaisance Primer, Segonder, lakres Manmelle e osi byen ki *Exceptional School*. Bonn fet zot tou.

Mr Speaker, mon kestyon pou Vis-Prezidan. Prenon an

kont bann problemm ki bann artis i rankontre dan sant lavil, spesifikman dan lari bazar kot touris ek bann lokal i frekant bokou.

Ki garanti ki bann artis pa pou ganny persekiter letan zot pe promot lanmizik atraver bann aktivite mizikal dan lavil letan bann restriksyon pou ganny retire.

Eski Gouvernman dan sa laliny pe mazin met okenn limitasyon pou okenn bann artizan kapab servi lavil pou zot kapab promot zot lanmizik e osi egey lavil Victoria. Mersi.

MR SPEAKER

Mersi Onorab. Vis-Prezidan.

THE VICE-PRESIDENT AHMED AFIF

Mersi bokou Mr Speaker. Mersi Onorab. Onorab mon premye pwen se Sesel i en pei ki nou krwar dan *rule of law*. E nou osi krwar ki tou dimoun i devret ganny tou son sans pou li kapab fer son biznes, pou li kapab ganny son lavi.

Me dan *rule of law*, premyerman la nou dan en peryod COVID e byensir i annan restriksyon ki aplike an term dimoun ki kapab regroupe.

Ou kestyon se enn fwa sa bann restriksyon i ale, eski

dimoun pou kapab vin dan lavil pou fer regroupman eksétera?

Larepons se anba bann gidans ki deza egziste. Par egzanp i annan Lalwa lo lanvironnman ki kontrol kantite tapaz ou kapab fer dan serten landrwa. Ler ou ganny en *licence* pou zwe lanmizik, i annan son landrwa, i annan son fason pou fer li.

Si ou anvi zwe lanmizik dan en landrwa ki piblik i annan son fason ki ou fer li, kot ou respe dwa lezot akoz ou dwa i annan son balizaz e son balizaz i aret kot ou pe mars lo dwa en lot dimoun.

Alors si ou dan lavil par egzanp e en lot dimoun ki osi pe fer en biznes, me ki ou tapaz i sitan for ki i anpes sa lot dimoun kapab fer biznes oubyen son aktivite, son drwa osi pe ganny afekte.

Alors bezwen annan en balans ki apropriye. E Lalwa i fer provizyon pou sa e nou tou nou bezwen respe kanmarad. E alors nou pou permet byensir, parski se en pei ki ganny Gouvernen par *rule of law*.

E byensir tou dimoun i annan drwa pou al anvil, pou vann keksoz anba tou Lalwa ki egziste e si en artis i anvi al anvil, i anvi al fer en keksoz. Kot i demontre son lanmizik, son kalite eksétera, mon asire i

kapab ganny fer avek serten kontrol. Me nou bezwen respe dwa tou dimoun.

Mon pa konnen Mr Speaker, si petet avek ou permisyon mon a permet Mer Lavil ki annan leksperyans pou li *handle* sa bann keksoz koumsa, pou donn lezot leksplikasyon. Mersi Mr Speaker.

MR SPEAKER

Mersi VP. Wi Mr Andre. Si ou le azout keksoz?

MAYOR OF VICTORIA

MR DAVID ANDRE

Mersi Mr Speaker. Mon kapab reasir tou dimoun, tou Onorab isi dan Lasamble e piblik ki sa lespri ki nou pe krwar artis pe ganny persekiter, zot pa pe kapab zwe zot lanmizik i pa vre, i pa egziste. I kapab annan serten malantandi ki'n arive. Me selman sa sityasyon i pa egziste.

Mwan personnelman, mon an kontak avek tou bann artis e mon'n diskit avek zot tou e tou dimoun in konpran, tou dimoun i konnen ki zot kapab fer, ki zot pa kapab fer. Ki kote zot kapab zwe zot lanmizik e koman zot pou kapab *advertise* zot lanmizik.

I annan bann landrwa ki ansanm nou'n demarke, ki

nou'n dir, sa i en landrwa spesifik, nou kapab fer sa, nou kapab donn zot tou sipor posib.

Mon reasir zot ki ozordi la sa *issue* i pa en keksoz ki problematik. Tou keksoz in ganny rezourd, tou dimoun i kapab fer keksoz dan fason ki fodre an respektab Lalwa. Vwala. Mersi.

MR SPEAKER

Mersi Mer Lavil. Onorab Roucou.

HON MICHEL ROUCOU

Bonzour. Mersi Mr Speaker. Bonzour VP, Mer Lavil, Bonzour *welcome*. Mr Speaker, mon osi mon pa pou rat sa sans pou mwan anvoy mon swe pou bann *teachers*, espesyalman sa 5 lekol ki tonm dan mon distrik, mon swet zot bonn fet bann *teachers*.

Mr Speaker, mon kestyon pou VP i koumsa. Se ki pou vi ki mwan mon distrik i enn bann distrik ki baliz avek lavil, e nou anvi konnen en pti pe ki langazman ki son lofis, Mer Lavil pe anmase pou nou bann distrik pou antre ladan, parey la nwel pe vini.

Eski Mer Lavil pou angaz bann biznes ki lo semen, pou zot osi tou pou antre pou dekor en pti pe bann laboutik pou met sa lanbyans. Mersi.

MR SPEAKER

Mersi Onorab. VP.

**THE VICE-PRESIDENT
AHMED AFIF**

Mersi bokou Mr Speaker. Mersi Onorab. Avek ou permision mon a permet Mer Lavil reponn sa direkteman.

MR SPEAKER

Mersi. Mr Andre.

MAYOR OF VICTORIA**MR DAVID ANDRE**

Mersi. I toultan nou lentansyon e nou'n travay toultan parey mon'n eksplike avek tou dimoun dan lavil, dan bann distrik. Akoz en keksoz fodre pa nou oubliye, lavil Victoria i pa zis pou biro Mer Lavil.

Lavil Victoria i pou dimoun ki dan lavil e laplipar bann dimoun ki dan lavil se bann dimoun ki annan biznes. E nou travay an etrwat kolaborasyon toultan avek tou bann biznes, tou bann dimoun, bann distrik pou fer sir ki okenn aktivite ki ganny fer, tou dimoun i enplike ladan e sa lannen i pa pou en eksepsyon osi. Vwala.

MR SPEAKER

Mersi Mer Lavil. Wi Onorab Loizeau, nou a pran ou kestyon.

HON NORBERT LOIZEAU

Mersi Mr Speaker. Bonzour VP. Bonzour Mer Lavil. Mr Speaker, an vi ki pli gran parti lavil i tonm dan mon distrik Bel Air, alors i enportan ki mon demann en kestyon. Mr Speaker, an vi avek bann SOPs, bann *guidelines* ki Minister Lasante in met an plas, mon trouve ki i annan bokou bann letablisman zot pe fer zot bann aktivite an swivan bann *guidelines*.

Barrel i deborde, bann *casino* i plen, *Buckingham Palace*, Au Cap pa koz lo la, deborde menm. Alors vi ki annan sa bann *guidelines* pou organiz sa bann keksoz, alors mon anvi demann Mer Lavil ki difikilte ou pe gannyen pou ou kapab organiz en pti keksoz anvil, an servan sa bann *guidelines* parey sa bann lot letablisman pe fer.

Mon ti a kontan demann ou sa kestyon, mersi.

MR SPEAKER

Mersi Onorab. VP ou a pas sa avek Mr Andre? wi Mer Lavil.

MAYOR OF VICTORIA**MR DAVID ANDRE**

Mersi. Ou'n nonm bann legzanp. Ou'n nonm *Barrel*, ou'n nonm *Buckingham Palace*

eksetera. *Barrel i anvil e Barrel i annan son bann aktivite ki i fer e i annan son bann guidelines ki i swiv, napa problemm.* I annan *Dolce Vita osi ki ouver, i annan son guidelines e tou bann restoran anvil kot dimoun i kapab vini asize, vin pran en pti manze, en pti drink, entertainment.* Be napa problemm, i marse. I annan zis en restoran ki pa pe fonksyonnen dan sant lavil, tou larestan pe marse.

Bann aktivite ki nou pe ganny, ki restrikte si ou kapab dir se bann aktivite ki pou kapab anmenn en gran kantite dimoun dan en sel lesspas. Parey dan semen, dan *music stadium*, dan bann landrwa koumsa. Sa i bann aktivite ki nou pa pou kapab fer toultan nou pa ganny permision Departman Lasante. E se sa ki mon pe koz lo la.

E dan letan Festival Kreol normalman par egzanz nou annan bann gran kansere nou pa kapab fer bann gran konser la pour enstan. Parkont i annan bann posibilite ki nou kapab fer bann konser dan bann lasal, sa nou ankor pe esper otorizasyon Minister Lasante.

Parey Teat Nasyonal, pe al re ouver byento, travay in fini fer. *ICCS Conference Center li*

osi i en lasal ki nou kapab fer konser, oubyen lezot aktivite. E le moman ki nou ganny serten, si nou ganny *go ahead* avek Departman Lasante, nou a kapab fer bann konser *indoors*, nou pou fer li e vwar la. Setou ki nou gran difikilte *right now*. Mersi.

MR SPEAKER

Mersi Mer Lavil.

HON NORBERT LOIZEAU

En pti zafer Mr Speaker, vi ki mwan mon zwenn bokou bann artis solo. *Monsieur le Maire* in viv Lafrans, i konnen. Parey dan bann stasyon tren, en landrwa kot bann dimoun i vini ek son pti lenstriman i zwe pou 1 erdtan. En lot i vini i zwe pou 1 erdtan, i ale.

Mon konnen i annan *La Passerelle* laba, me *La Passerelle* sa bann artis zot pa neseserman zwe pou dimoun vin debout gete. Zot pe *entertain*. Selman i annan sirkilasyon dimoun. Me *La Passerelle*, napa sa sirkilasyon lazournen.

Mwan mon pe mazin par egzanz en legzanz, mon pa pe koz Lari Bazar, pe dir pe *disturb* bann biznes. Parey en legzanz mon pe donne. Ki Mer Lavil gete ki i kapab organize. Sa bann artis ki'n dir mwan. Par

egzant kot lapos, eski pa in ler pou zot petet komans organize ki i ava annan bann artis ki vini par erdtan. Mwan mon vini mon tap de pti zafer. Mon ale, lot.

Egzakteman parey i arive Langleter dan bann stasyon tre, dan bann landrwa. *Monsieur le Maire* mon krwar ou okouran sa. Sa i zis en pti propozisyon mon ti a kontan ou donn ou komanter lo la.

MR SPEAKER

Mersi Onorab. *VP* ou a les Mer Lavil adres sa pwen.

MAYOR OF VICTORIA

MR DAVID ANDRE

Mersi, sa bann keksoz ki ou pe dir i bann keksoz ki zisteman nou'n propoze ek bann artis e nou'n propoze avek Departman Lasante. Le moman ki nou ganny *go ahead*, nou fer li. I annan serten landrwa ki nou'n komans fer, par egzant kot Cafe Lansiv, anvil. I annan serten pti animasyon ki'n ganny fer.

Kot *National Library* obor sa galeri ki donn lo larivyer la. I annan en *cafeteria*, semenn pase ti annan en group, bann group *Saturn* ki ti pe fer en pti animasyon. Parey ti annan Elijah ki'n vin fer en pti animasyon.

So, bann landrwa kot nou'n ganny serten permision pou nou kapab fer sa bann keksoz nou fer li, e le moman ki nou ganny permision pou nou kapab fer li lezot landrwa. Nou pou fer li. Bann artis pe met zot pare, le moman ki nou ganny *green lights then nou go ahead*, napa problem. Mersi.

MR SPEAKER

Mersi Mer Lavil. Nou pou termin la pou sa kestyon e nou a pran en poz la e nou a re pran travay 11er. Mersi bokou Mer Lavil e bonn restan lazournen. *VP* nou a re vvar ou dan en demi erdtan.

(BREAK)

MR SPEAKER

Bonzour e byenveni Kolonnel Michael Rosette, Sef Lafors Defans ki'n zwenn *VP* pou sa prosen kestyon, nimero 94. Onorab Rocky Uranie.

HON ROCKY URANIE

Mersi Mr Speaker. Bonzour *VP* avek Mr Rosette. Bonzour tou koleg Onorab. Mr Speaker, i annan en *saying* ki dir, "*Once a teacher always a teacher.*" Alors mon koman en *teacher* mon oule swet tou bann *teachers* avek *support staff* Sesel en *Happy Teachers Week*.

E pli partikilyerman bann *teachers* lo La Digue.

Mon kestyon i lir koumsa;- I annan spekilasyon ki bann zofisyen militer ki'n termin zot kontra pa pe ganny tou zot benefis. Eski VP i kapab eksplik nou Lasanble ki benefis i annan pou ankouraz zwenn zwen lafors militer e ki prosedir peyman benefis letan zot kontan i fini.

Konbyen zofisyen ki'n termin zot kontra e ki pa pe renouvele zot kontra e ki pa'n ganny peye tou zot benefis? Mersi

MR SPEAKER

Mersi Onorab. Vis-Prezidan.

THE VICE-PRESIDENT AHMED AFIF

Mersi bokou Mr Speaker. Mersi Onorab. Onorab mon pa krwar mon devret pe reponn okenn spekilasyon. Isi nou travay lo bann fe e bann kestyon direk avek bann kestyon ki kler.

Pou komanse Mr Speaker, an term militer nou annan diferan klasman ran. Bann zofisyen ki'n kondisyonnen, sa i bann ran koman Segon Lyetnan ziska Brigadye. Nou adres zot koman bann zofisyen. Dezyenmman nou annan lezot ran depi Prive ziska Serzan Mazor, nou adres zot koman

bann non-commissions officers. Zofisyen eski pa'n ganny komisyonnen.

Alors pou premye parti ou kestyon dan SPDF nou annan en lekip ki annan latas spesifik pou *recruit* bann sivilien pou antre dan militer. Bann manm sa lekip i ganny antrennen dan diferan lapros pou atir dimoun dan sa profesyon militer.

Zot in prezan dan bann diferan *job fairs*, fer bann kozrid an bann lekol segonder e menm dan bann lekol possegondier. Zot osi servi nou *website* pou met bann *video promosyonnel* e edikasyonnel.

En zenn *recruit* ki antre lo *training* i ganny peye en saler debaz e en *allowance* siplemanter ziska i sermente e vin en *private soldier*. En solda prive. La i benefisyen bann saler ek benefis ki annan dan nou *Scheme of Service*.

SPDF i pey en lapey debaz ki diferan pou tou ran. Sa i en motivasyon pou solda pou zot travay dir pou zot ganny zot promosyon. Enkli ek sa SPDF i pey sa bann diferan *allowance*. Premyerman *allowance* pou spesyalizasyon, sa solda.

Sa louvraz spesifik ki i pe fer. Sa i kapab an term teknik, depi Dokter ziska sa ki vin kwizinyen, ki travay lo bato par egzanp.

Allowance pou zot bann sertifika edikasyonnel, *allowance* pou transpor. Sa i ganny peye ek zis ran Prive ziska Serzan Mazor selman. Tou solda i osi ganny peye en *duty allowance*. Sa *Scheme* i fer provizyon pou peyman bann lezot *allowance* pou latas spesifik tel ki *sea time allowance, ceremonial allowance, fly hours allowance*.

Tou solda i osi benefisyé sa bann benefis swivan. Konze anyel e peyman konze ki akimile letan son kontra i fini. Peyman gratwite, peyman konpansasyon letan solda pe kit lafors lo *ground* ki i pe pran son retret or oubyen i pa pe renouvre son kontra.

Peyman konpansasyon ek konze akimile si en sold in ganny permision pou kas son kontra. Peyman konpansasyon pa ganny fer si solda in ganny zize e son kontra in ganny terminen pou bann lofans disipliner ki klasifye koman tre grav.

An plis ki bann benefis monneter, *SPDF* i osi fer en provizyon pou sa bann cityasyon swivan. Rasyon solda. Son *breakfast*, dezennen ek dinen. Liniform ki enkli tou son akseswar, *training* avanse, spesyalize dan bann domenn Militer osi dan bann domenn

profesyonnel. Lasistans *welfare*, nou annan en sistem ki fer sir ki solda son bann laspe sosyal i ganny zere byen pou fer sir ki son leta lespri i annord letan i pe fer son diferan responsabilite.

Prosedir pou peyman en solda, 3 mwan avan son kontra i fini i ganny kriye dan son *unit* e la i fer prosedir pou renouvre son kontra. Dan sa menm peryod i fer son tes medikal ki pou determinen si i fit pou li re angaz li ankor dan militer.

Prosedir pou kont son benefis i ganny fer lo dernyen *pay slip* sa solda akoz ki pandan a 3 mwan i kapab annan sanzman dan saler ki kapab annan lenpak finansyel lo son benefis.

Ordinerman sa bann prosedir *SPDF* pa pran plis ki 1 mwan pou kalkile pey solda son benefis ki son kontra pe ganny renouvre e menm si i pe kit lafors. Avek sitasyon *COVID* nou prosedir kot *SPDF* in sanze depi 2020, kot *SPDF* i nepli pey par tyek, me benefis ganny depoze direk dan kont sa dimoun.

Solda i ganny enformen par let ofisyel sorti kot *HR*, lo detay son benefis an term kwa ki in ganny peye. Sa i gratwite, konze ki'n akimile pou en Solda ki'n renouvre son kontra,

gratwite konpansasyon e konze akimile pou en solda ki'n konplet son kontra e ki pa'n oule renouvre. *Pro rata gratuity*, koze akimile konpansasyon pou en solda ki bezwen arete lo bann, pou bann rezon medikal. Konze akimil, selman pou en solda ki'n ganny dismis dan lafors.

Pou dezyenm parti kestyion Onorab. Mr Speaker, dan rikord *SPDF* nou annan zis en zofisyen ki'n pran son retret ki pa ankor ganny pey son benefis. Sa i akoz li in met son ka devan Lakour e in refize pran peyman son konpansasyon. Nou napa lo rikord okenn zofisyen militer ki'n kite e ki *SPDF* i ankor dwa li okenn peyman benefis.

Mon oule fer sorti ki Solda i annan sa loportinite pou kestyonn son peyman e demann leksplikasyon kot i pa asire. Sa i en prosedir ki'n etabli e ki pe ganny servi an se moman. Mersi Mr Speaker.

MR SPEAKER

Mersi Vis-Prezidan. Onorab Uranie ou annan siplemanter.

HON ROCKY URANIE

Wi, mersi. Mersi VP pou ou larepons. VP mon ti oule konnen par egzanp bann zenn ki sorti lo zil pros ki anvi zwenn

lafors militer, nou annan detrwa ki'n zwenn e nou annan ankor ki anvi zwenn. Me zot pe mazin par egzanp lozman ki zot ganny difikilte ki anpes zot prezan antre dan lafors militer. Ki zot, zot fer pou ed sa bann zenn? Mersi.

MR SPEAKER

Mersi Onorab. Vis-Prezidan.

THE VICE-PRESIDENT AHMED AFIF

Avek ou permision mon ti a demann *CDF* ki la prezan pou kapab reponn senn la.

MR SPEAKER

Mersi, wi. Kolonnel Rosette, wi.

CHIEF OF DEFENCE FORCES COLONEL MICHAEL ROSETTE

Bonzour Mr Speaker e bonzour tou lezot Manm Onorab. E Onorab mersi pou sa kestyion. An se ki konsern bann zenn ki sorti Praslin, La Digue ki zwenn lafors nou konnen i annan sa issue lozman ler zot vin Mahe.

Nou'n deza diskite plizyer fwa avek Onorab ki ti La Digue avan. E *SPDF* nou annan nou serten flat ki pou *SPDF* ki Perseverance e nou rezerv en pe ki nou met bann manmay Praslin, La Digue ladan. Bann

ki annan 3 lasanm, si zot kapab *share*, nou met zot ladan.

I annan lezot ki fer bann laranzman. Swa zot annan fanmir ou zanmi isi ki zot kapab reste avek. Pour le fitir nou pe sey fer provizyon osi pou nou annan facilite militer lo Praslin avek La Digue, ki nou kapab *deploy* sa bann Solda ki sorti Praslin, La Digue direkteman lo sa de zil.

An plis ki sa osi i annan bann lezot solda ki opte petet pou reste annan dan barak. Nou fer sa provizyon pou donn sa loportinite pou reste anndan dan barak si zot napa vreman en lot mwayen lozman isi Mahe. Mersi Mr Speaker.

MR SPEAKER

Mersi Kolonel. Onorab Letourdie.

HON JANY LETOURDIE

Mersi Mr Speaker. Bonzour tou dimoun. Mr Speaker, mon kestyon i mon pou *do away* avek sa bout spekilasyon akoz mon lo mon kote *at least* i annan 3 zofisyé ki'n apros mwan. Me selman mon krwar mon'n byen konpran kestyon. I dir bann ki'n termin zot kontra.

Me selman sa 3 ki'n apros mwan Mr Speaker, zot in dir zot pa'n ganny zot bann

konpansasyon, swa zot in fer 4an, 5an oubyen 5an edmi.

Si VP ti a kapab eksplike egzakteman kan ki ou ganny ou bann rekonpans? E apre dezyenm parti, si zanmen i annan ki'n fini konplet tou son kontra, me selman i pa'n gannyen, ki ou *advice* li pou li fer? Mersi.

MR SPEAKER

Mersi Onorab. VP ou ava adres bann kestyon. I annan serten ki ou'n tous lo la deza.

THE VICE-PRESIDENT AHMED AFIF

Mersi bokou Mr Speaker. Mersi Onorab. Onorab in mansyonn serten ka spesifik e mon ti ava envit avek ou permision Mr Speaker, CDF pou adres sa bann detay spesifik lo ki mannyer sa peyman i ganny fer.

E petet mon sizere lo ka spesifik, kekfwa nou pa pou le nonm non la, kot sa bann detay i ganny donnen e ou a kapab ganny en larepons pli detaye, spesifik lo sa bann dimoun. Mersi Mr Speaker.

MR SPEAKER

Wi Kolonel.

CHIEF OF DEFENCE FORCES COLONEL MICHAEL ROSETTE

Mersi Mr Speaker. Mersi Onorab pou ou kestyon. Parey in fer resorti dan larepons VP, si kontra pa'n ganny terminen i annan plizyer rezon. I posib petet sa dimoun li menm in kit volonterman, i pa'n termin son kontra. Dan sa ka i pou ganny peye zis son konze e i pa pou ganny peye antye son gratwite.

Si in ganny kite lo *ground* medikal, dan sa ka osi i pou ganny peye son konze e enkli son gratwite *pro rata* ziska ler in arete. E i annan bann ka kot lofans in ganny komet, aksyon discipliner in ganny pran.

E si son gratwite in ganny koupe pandan sa santans ki'n pas lo li, i pa pou gannyen son peyman gratwite e son konze i pou gannyen, si i annan konze ki dwa. Mersi.

Si i annan okenn lezot ka spesifik ou kapab refer avek nou *HR*, Bel Eau, nou ava kapab donn en repons. Mersi Mr Speaker.

MR SPEAKER

Mersi Kolonel. Onorab Adelaide.

HON FRANCOIS ADELAIDE

Mersi Mr Speaker. Dabor Mr Speaker, les mwan felisit tou bann ansenyan dan Sesel an zeneral, prensipalman bann ansenyan dan lekol Baie

Lazare. E dezyenmman yer ti lafet le 4 Oktob. So, mon oule swet tou zabitan e tou zanmi Baie Lazare e bonn feT le 4 Oktob. Espanon ki zot vin bann Anbasader lape.

Mr Speaker, mon kestyon pou Vis Prezidan. Dabor bonzour Vis-Prezidan avek Mr Rosette. Mon kestyon pou zot se ki nou'n trouve poudir tou resaman i annan vreman bann o zofisyen larne ki'n fini zot kontra. Swa zot in arete.

Petet mon pe demande pou lentere piblik, ki pli gro sonm ki zot in peye pou konpansasyon pandan petet 2020 avek 2021 pou bann zofisyen ki'n *retire*? Mersi.

MR SPEAKER

Mersi Onorab. VP, wi.

THE VICE-PRESIDENT

AHMED AFIF

Mersi Mr Speaker. Mersi Onorab. Mon napa sa sif avek mwan. Avek ou permisyon si *CDF* i kapab partaz lenformasyon, mon a demann li pou fer li. Mersi.

MR SPEAKER

Mersi. Kolonnel ou a kapab reponn.

CHIEF OF DEFENCE FORCES
COLONEL MICHAEL
ROSETTE

Wi, mersi Mr Speaker. Mon osi mon napa sa sif konplet. Me selman i annan pou bann zofisyen ki'n deservi pete par lao 30, 40an. I vreman bann sif sibstansyel si ou le lo la, akoz lakantite letan ki zot in servi e depandan lo zot ran.

Me selman mon kapab rod sa lenformasyon, nou kapab fer pase atraver Komite Sekirite ek Defans, nou kapab donnen lo la. Mersi.

MR SPEAKER

Mersi Kolonnell. Onorab Cosgrow.

HON WALLACE COSGROW

Mersi Mr Speaker. *Welcome CDF.* Mr Speaker, an relasyon avek kestyon Onorab Uranie. *CDF* i dir ki zot donn lozman par egzamp bann dimoun - bann lakaz pou bann zofisyen Larne or solda Perseverance. Me dan ka kot petet pa ase, e si pou bann dimoun ki sorti lo zil pros, eski zot annan en *allowance of some sort* ki zot kapab donn sa bann dimoun?

Dezyenm, dan ka kot en solda, mon dir solda mon pa pou diferansye ant bann zofisyen ek bann lezot ran. En solda i ganny en *injury* petet dan son

bann letan travay, eski i annan serten konpansasyon, benefis ki zot osi gannyen pandan sa bann letan ?

E vi ki zot la mon ti a kontan profite pou rod en leklersisman, eski in annan en bagar ant 2 zofisyen *State House* resaman? Petet ekliersi lepep Seselwa. Mersi bokou Mr Speaker.

MR SPEAKER

Onorab Cosgrow ou realize poudir ou dernyen kestyon napa naryen pou fer avek sa kestyon ki la. Alors, nou a pas lo la. Mon ava envit VP pou adres kestyon.

THE VICE-PRESIDENT
AHMED AFIF

Mersi Mr Speaker. Mr Speaker, tou lede. Konsernan *allowance* e bann *injury* ki'n arive, mon ava permet avek ou permision ki *CDF* i ava reponn.

MR SPEAKER

Kolonnell.

CHIEF OF DEFENCE FORCES
COLONEL MICHAEL
ROSETTE

Mersi Mr Speaker. Mersi Onorab pou ou kestyon. An se ki konsern bann solda ki sorti Praslin, La Digue parey mon'n fer resorti, otan ki posib nou

asiste zot avek lozman ki pou *SPDF* e nou ofer zot a en pri redwi, pa parey tou lezot Solda, akoz normalman nou fer zot share e menm zot bann fournitir dan lakaz. Par egzanp zot bann pake, se nou *DPDF* ki donn zot, bann ki sorti Praslin, La Digue.

An se ki konsern *allowance*, nou'n mazin lo la. Me si nou mazin lo la nou bezwen mazin *all over the board* akoz i annan solda osi ki sorti Mahe ki annan bann menm problemm ki sa. Nou pou bezwen mazinen, i en keksoz ki nou pou bezwen kontinyen sa diskisyon pou nou kapab anmenn en solisyon pou le fitir.

An sa ki konsern bann ki ganny *injury*. Wi, si i annan ki ganny *injury* ki zot devlop serten andikap, dan sa ka i annan serten konpansasyon. Me selman i annan son prosedir ki ganny fer.

Son prosedir se ki ler nou Dokter *SPDF* in determinen ki wi i annan en *injury*. Sa *injury* i ganny *take up* avek Minister Lasante e la determinasyon i ganny fer, ki kantite andikap sa dimoun in andikap, eski i pou kontinyen travay, pa kontinyen travay.

Dek ki en poursantaz andikap in ganny determinen, sa *case* i ganny refer avek

Attorney Zeneral e la prosedir i ganny fer pou determinen konbyen sonm larzan pou pey li. E dan sa ka nou pey li *once* ki sa i ganny determinen. Mr Speaker, mersi.

MR SPEAKER

Mersi Kolonnell. Onorab Sandy Arissol.

HON SANDY ARRISOL

Mersi Mr Speaker. Bonzour ankor enn fwa. Mon ti a kontan zis demann Minis, VP ouswa Mr *CDF*, si zot kapab dir ek nou si annan en mekanizm an plas kot Lafors Defans pou ki zanmen i annan okenn konplent sorti kot en zofisye an relasyon avek son peyman, son konze. In ganny en bout, pa'n ganny en lot bout.

Eski i annan sa mekanizm kot i kapab vini pou adres sa problemm, olye anmenn kot Onorab La Digue pou fer spekilasyon dan Lasanble Nasyonal? Mersi bokou.

MR SPEAKER

Mersi Onorab. VP.

THE VICE-PRESIDENT **AHMED AFIF**

Mersi Mr Speaker, mon a demann Kolonnell avek ou permisyon. Mersi.

CHIEF OF DEFENCE FORCES
COLONEL MICHAEL
ROSETTE

Mr Speaker, mersi. Mersi Onorab. Definitivman nou annan an plas. Nou annan en seksyon dan nou *HR* ki pran bann konplent. E nou osi lo nou *website* nou annan en bout kot si okenn solda ki'n kite i pa oule vini, i kapab poste sa lo *website* e nou annan dimoun ki *monitor* nou *website* i kapab *follow-up* lo la. E nou *HR* i *open*.

E si i pa kapab osi, i refer avek *Chief of Staff* oubyen mon menm, avek *CDF* e la nou *take up* sa sityasyon, e nou refer rezourd sa bann problemm si i annan ki egziste. Mersi.

MR SPEAKER

Mersi Kolonnel. Nou pou termin le pou sa kestyon, akoz mon annan lezot kestyon ki pe atann e mwan napa bokou letan. Kolonnel mon a remersye ou pou ou partisipasyon e mon a dir ou *bonne journée* e bonn kontinyasyon.

Nou a pran en pti *pause* pou nou fer le neseser. Mersi Kolonnel. Nou a sinal nou lekip transmisyon pou fer nou en pti *pause* teknik e nou ava apel nou *staff* pou *sanitize*.

(*Technical Break*)

MR SPEAKER

Byen nou a re pran e mersi. E mon annan plezir pou dir bonzour Mr Benjamin Choppy ki Sekreter Prensipal dan Departman Lenformasyon e Teknolozi Kominikasyon, ki'n zwenn *VP* pou larestan kestyon.

Devan mwan lo mon annan 2 kestyon ki relye e mon oule fer en laranzman spesyal. Mon annan en kestyon Onorab Romain ki i lo servis *internet* e sirtou lo kou. E mon annan osi kestyon Onorab John Hoareau ki osi lo lenfrastriktir pou servis *internet*.

E an plis ki sa mon annan osi en *Question Without Notice* sorti kot Onorab Aglae ki tous lo toulede size.

Alors sa ki mon pou fer, mon pou pran sa de kestyon ki lo papye premye e mon pou pran zis bann kestyon orizinal. Apre vi ki Onorab Aglae son kestyon i prensipalman lo sa de size ki pe leve la, mon pe demann li pou note, si i annan pwen ki pa ganny eklersi, si i annan lenformasyon ki i ti pe rode par son kestyon ki pa ganny adrese i a kapab adres ki koman en siplemanter e apre sa mon aprann lezot kestyon siplemanter.

So, mon a komans premye avek Onorab Romain lo kestyon 98. Sorry, 95. Eskize.

HON GEORGE ROMAIN

Mersi Mr Speaker. Bonzour Mr Speaker. Bonzour VP avek Mr Choppy. Mon osi mon ti a kontan profite Mr Speaker pou swet tou bann ansenyan bonn fet.

Mr Speaker, mon kestyon i lir koumsa, prenon kont sityasyon *COVID* dan pei ki nesesit bokou zanfan pou swiv zot letid *online*, e osi pou bann anplwaye ki pe ganny ankouraze pou travay dan lakour, eski Vis-Prezidan i kapab dir ek sa Lasanble, ki zefor ki son Minister i annan pou fer desann pri *internet* dan pei?

Mon dezyenm kestyon, ki plan ki annan pou Sesel kapab amelyor performans *internet* an term lavites? Mersi.

MR SPEAKER

Mersi Onorab. Vis-Prezidan.

THE VICE-PRESIDENT AHMED AFIF

Mersi Bokou Mr Speaker. Mersi bokou Onorab. Mr Speaker, napa dout ki *internet* ek akse ek *data* i pou lakle dan devlopman nou pei, nou selman a kour term me pou lavenir sa pei. Sa se parski ozordi sa servis i presi esansyel dan tou domenn nou lavi. Ledikasyon, biznes,

lasante, servis Gouvernman, servis lasante, peyman *online*, rezo sosyal. Parmi bann ki nou pli servi.

Parey zot konnen, sa sekter i osi enn ki'n liberalize. Napa pri kontrol ki ganny egzerse. Nou fortman krwar ke se en marse pli konpetitiv ki pou anmenn en rediksyon dan pri e logmantasyon dan valer pou larzan.

Mon ti a kontan sa pwen partaz bann stratezi ki nou'n adopte pou fer sa arive.

Premyerman donn *licence* en trwazyenm operater pou servis *mobil* kot pri *data* i ankor tre ser.

Permet plis konpetisyon kot i konsern kolektiv enternasyonal. Savedir fason pou konekte nou, Sesel avek larestan lemonn.

Ozordi nou annan en sel kab soumaren, byento pou annan 3 kab enkli enn par en diferan operater. Sa ki la ozordi e sa pou ganny fer ver 2023. Sa pou permet plis servis ki sa ki nou apel *unlimited*. Savedir napa limit lo lakantite *data* ou servi e ki alors donn plis valer pou ou larzan.

Anmenn negosyasyon pou permet ki sa lakonpannyen ki annan en kab soumaren ozordi Sesel, i ofer tou son kliyan term e kondisyon ki preferansyel.

Anmenn sanzman dan Lezislasyon pou anpes pratik komersyal ki al kont bann lareg komers zis.

Permet ki nou annan sa ki nou apel *number portability*. Savedir si ou annan en limero *Airtel* par egzanp, ou kapab servi menm nimero menm si ou al anrezistre kot *Cable*. Sa pa egziste ozordi.

Me si i ti egziste i ti pou permet dimoun kapab pli fasilman servi en meyer operator baz e lo kwa ki zot pe ofer lo marse.

Konplet en letid syantifik ansanm avek Labank Santral ki montre klerman bann diferan servis e zot kou. Ek sa i pou permet nou ganny en pli bon persepsyon lo valer pou larzan parmi bann diferan operator.

Onorab ou dezyenm kestyon se ki plan pou Sesel amelyor performans *internet* an term lavites?

Mr Speaker, i annan plizyer fakter ki afekte lavites *internet*. Alors baze lo la vvar la 4 fason ki nou krwar pou ede amelyor performans e lavites *internet*.

Premyerman ou bezwen kapab mezir sa an relasyon avek sa ki ou'n peye. E alors operator i bezwen konnen ki tou dimoun i annan akse pou konn mezir servis ki i ganny an

relasyon avek sa ki in peye. I pa toultan egziste ozordi. Alors en regilasyon pe ganny drafte pou mezir sa ki nou apel *quality of service*. E sa pe ganny fer par Biro Attorney Zeneral an se moman e ava ganny deplwaye a ler apropriye.

Dezyenmman, sa 2 nouveau kab soumaren pou ede pou anmenn plis kolektivite avek lemonn. E alors permet plis lavites.

Trwazyenmman, sistem 5G. Li en nouveau teknolozi ki pli vit ki sa enn ki nou annan ozordi. E ozordi laplipar nou pe servi 4G.

Sa in fini ganny enplimante par en operator. En dezyenm in ganny permision pou servi li e en trwazyenm pe konsider sa opsyon. Sa letid ki pe ganny formile ansanm avek Labank Santral, pou osi ed nou vvar kote bann defayans i egziste pou nou kapab rod lezot fason pou ogmant lavites *internet*. Mersi Mr Speaker.

MR SPEAKER

Mersi Vis-Prezidan. Onorab Romain ou annan siplemanter lo ou kestyon orizinal.

MR SPEAKER

Wi Mr Speaker. Mersi Mr Speaker. VP mersi pou ou leksplikasyon byen detaye.

Mon annan 2 kestyon siplemanter *VP*.

Mr Speaker, an vi ki *internet* i en ensiste debaz partou e sirtou dan laprantisaz pou bann zanfan, eski Gouvernman pe negosye avek bann *internet service providers* pou donn bann meyer *package* pou bann zanfan lekol? Sa i enn.

E mon dernyen kestyon Mr Speaker, eski *VP* i kapab konfirmen ki sa reparasyon ki ti ganny fer lo sa kab soumaren Beau Vallon, si in ede pou amelyor efikasite *internet* dan pei? Mersi Mr Speaker.

MR SPEAKER

Mersi Onorab Romain. Vis-Prezidan.

THE VICE-PRESIDENT **AHMED AFIF**

Mersi bokou Mr Speaker. Mersi Onorab. Mr Speaker, zis mon a koz briyevman lo bann lekol. Wi, Gouvernman i parey ou, nou krwar poudir bann zanfan, etidyan i devret ganny akse avek *data* avek *internet* vit. E si i posib a en pri tre, tre abordab. Parski par ler zot dan lekol, par ler zot se zot.

Me nou, nou pe fer tou le neseser lo kot lavites - mon konnen e avek ou permision mon a demann Mr Choppy pou

donn plis leklersisman. Nou pe fer fason ki bann lekol i annan en *package* e en sistenm atraver bann operator e atraver *DICT* ki permet ki sa lavites i ariv dan bann lekol.

E nou, nou pe fer fason pou sa ariv dan tou lekol e mon krwar in arive dan preski tou lekol sertennman lo Mahe, sof enn.

Me mon a permet Mr Choppy pou donn plis detay e lo dezyenm osi mon a permet li, avek ou permision Mr Speaker. Les li donn detay lo la. Mersi.

MR SPEAKER

Mersi *VP*. Wi *PS* ou kapab pran laparol.

PS BENJAMIN CHOPPY

Mersi Speaker. Onorab wi, lo kote ledikasyon. Ledikasyon deza i pe ganny en kantite *bandwidth free of charge from* konpannyen, ki pe *supply submarine cable* konmela. Sa bann lekol i *link* atraver *DICT* pou ganny akse avek sa kapasite.

Ti annan en serten limitasyon dan bann koneksyon lokal pou sa. Nou'n *take up* avek bann operator e bann operator pe, in pratikman fini *upgrade* sa bann laliny.

So, nou espekte ki sa bann laliny i la. So, zot teknolozi, ti

annan en pe ki ti *still servi kwiv, copper, ADSL*. La rapor ki mon annan, ki pratikman tou la i lo *fiber*.

So nou espekte ki sa pou amelyor kalite *internet* dan bann lekol, menm plis.

I annan bann lezot keksoz ki kapab ganny fer ki nou'n *take up* avek Minister Ledikasyon ki nou pe esper zot pozisyon lo la.

Lot keksoz se osi tou nou pou atraver konpannyen kab soumaren, nou pe mazinen donn plis kapasite ankor pou lekol kapab servi. So sa ki nou pe fer lo nivo lekol pou sa.

Vizavi reparasyon ki ti ganny fer lo sistenm kab soumaren. Reparasyon ti al byen e napa okenn *negativ impact* lo kalite *internet* akoz kab soumaren. Napa. Sa ki mon annan mwan lo kote teknik, se ki sistenm pe mars parey i devret. Mersi.

MR SPEAKER

Mersi. Mersi Onorab. Prezan mon ava envit Onorab John Hoareau pou demann son kestyon orizinal.

HON JOHN HOAREAU

Mersi Mr Speaker. Bonzour Mr Speaker. Bonzour Minis ek ou lekip. Mon ti a voudre osi azout mon felisitasyon e mon swe

bonn fet pou bann *teachers* an vi ki mon'n fer sa profesyon pou apepre en kar syek mon lavi.

Bon, mon kestyon i lir koumsa Mr Speaker,

Avek bi pou konpran pli byen zefor ki Gouvernman pe fer pou redwir kou *internet* e amelyor *the ease of doing business*, eski Minis i kapab donn bann detay swivan.

a). Ki kantite kab ki sak operator telekomunikasyon in aste dan sa *bundle* kab fib optik e konbyen i reste ki pa'n ganny itilize?

b). Konbyen i kout sak lakonpannyen telekomunikasyon lokal pou *subscribe* par *gigabyte* avek *provider* aletranze e konbyen sa pe ganny revann avek konsonmater?

E mon trwazyenm bout kestyon Mr Speaker, i lir koumsa, ki Polisi Gouvernman pou servi o maksimonm potansyel fib optik? Mersi.

MR SPEAKER

Mersi Onorab. Vis Prezidan.

THE VICE-PRESIDENT AHMED AFIF

Mersi bokou Mr Speaker. Mersi Onorab Hoareau. Mr Speaker, operator lo premye kestyon, lo ki kantite kab ki sak operator telekomunikasyon in aste dan

sa *bundle* e konbyen i reste ki pa pe ganny itilize? Zis pou fer kler Mr Speaker, operator i pa paste kab dan sa kab. O fet dan sa kab anba lanmer i annan zis 2 kab. Enn pou transmet lenformasyon e lot pou resevwar lenformasyon.

Me mon mazinen sa ki Onorab pe demande se ki vre kapasite sa kab ki pe ganny servi ozordi. Mr Speaker, sa dan konplikasyon teknik mon kapab dir ou, si tou laspe teknik kab i ganny servi e baze lo demann ki nou vvar lo sa kab, i pe servi zis aepre 6.5 poursan son vre kapasite.

An se ki konsern dezyenm kestyon, konbyen i kout sak lakonpannyen

telekominikasyon lokal pou souskri par *gigabyte* avek bann fourniser aletranz, konbyen sa pe ganny re vann avek konsonmater?

Onorab, napa okenn operator ki souskri par *gigabyte* avek bann operator aletranz. Normalman zot aste sa ki nou apel *bandwidth*. Savedir zot pey pou lavites transmet *data*. Sa kalite lenformasyon i garde - ler mon pe koz sa kalite lenformasyon, se konbyen zot aste *bandwidth* e ki pri - i garde par bann diferan operator zot menm e ganny konsider koman lenformasyon avek en

sansibilite komersyal parmi sak operator.

Koman Gouvernman nou pa gard sa kalite lenformasyon. Me byensir nou konnen konbyen nou peye pou *data* ki nou aste. An gro, konsonmater i pey ant R200 e sa i enkli son VAT. Pou 8 *gigabyte* ziska R8625 ki enkli son VAT pou 500*gigabite* pou *fix broadband*, parey dan lakour.

Dizon sa i vin R25 par *gigabyte* avek R16 par *gigabyte*. Me pour *mobile* son pri li i pli o e li i kapab ariv ziska R200 par *gigabyte*. Ankor lo en pwennvi pirman regilatwar, sa ki mon krwar fermeman ozordi, se ki i annan bataz pou fer desann pri *data*.

Me pli enportan nou devret pa al anver en pri en pe parey bann operator i fer. Nou annan en pri pou *bandwidth*. Savedir ou pey pou lavites e non pa *data*. Se sa direksyon ki nou ti a kontan ale.

Si ou anvi plis lavites, byensir i pou kout en pe pli ser, me *data* ki ou servi i pou napa limit. Sa en direksyon ki nou pe target e nou pe travay an kolaborasyon avek bann operator pou nou kapab fer li. Byensir i pa fasil parske i en diferan fason komers. Sa i en biznes prive e tou dimoun pe rod son rannman. Me nou ti a

kontan ki finalman nou tou nou lo menm paz avek menm lobzektif.

Parski nou konnen ki ler i annan *internet* ki vit, ki abordab. Non selman pou zanfan, me pou biznes pou nou dan lakour i pou anmenn devlopman bokou, bokou pli vit. E se sa direksyon ki nou pou ale.

Se sa direksyon ki nou anvi travay avek operater e avek tou bann parti prenan pou fer sir ki i ariv o si to posib.

Trwazyenm kestyon, ki Polisi Gouvernman pou servi o maksimonm potansyel *fibre optic*. Mr Speaker, demann pou servis *fibre optic* pou depan lo ki kantite nou servi rezo *internet*. Alors nou vvar sa bann lenstans swivan i kapab ogmant potansyel *fibre optic*. E mon pou sit 5 legzanp.

Premyerman ankouraz nou zenn pou servi plis laptop dan zot letid. Dezyenmman, fer sir ki tou lekol i konekte avek en *broadband connection* e devlop lekspertiz dan teknolozi lenformasyon dan lekol.

Gouvernman, trwazyenmman, i met plis servis lo en rezo *online* atraver e *service* e ankouraz plis servi *broadband*. Katriyenmman, annan plis servis *online* an zeneral, non selman dan

Gouvernman, me dan pei ki enkli dan servis prive.

E senkyenmman, en keksoz ki mon konnen Minister Finans i koz souvan lo la, se viz ver sa ki nou ape 1 en *digital economy* kot plis tranzaksyon i fer *online*. Tousala pou ede kree plis demann, e alors maksimiz lo sa kap *fibre optic*. Mersi bokou Mr Speaker.

MR SPEAKER

Mersi Vis Prezidan. Onorab Hoareau, ou annan siplemanter.

HON JOHN HOAREAU

Mersi Mr Speaker. Mr Speaker, Minis touris pe promot *workcation* e nou konnen poudir avek sa letan *COVID* i annan bokou dimoun ki pe travay dan lakour osi. Baze lo larepons VP ki bann operater i aste *bandwidth*, mon ti a kontan demann li ki bann rezon, si i annan pou li partaz avek nou. Akoz ki bann operater pa pe aste plis *bandwidth*, so ki nou kapab ganny en pe pli vit *internet*. Mersi.

MR SPEAKER

Mersi Onorab. Vis-Prezidan.

THE VICE-PRESIDENT AHMED AFIF

Mersi bokou Mr Speaker. Mr Speaker, bann rezon parey mon ti site i vreman baze lo bann konsiderasyon komersyal. Par egzanp si en operater li i aste *bandwidth*. Parey nou dir, i aste sa avek son bann fourniser aletrance e li i pe vin re vann ou *bandwidth*.

Son lesplikasyon se ki si i vin vann ou lavites selman. Ler i pe donn ou lavites dan *internet* e dizon ki i napa en limit lo la, li i pou bezwen sarz ou plis larzan, parske ou pou servi bokou plis *data* pandan sa peryod. E alors li i pe kalkile sa pri ki li in pey sa *bandwidth* e sa pri ki li i pou pas lo ou, i kapab fer sa pri pa tro abordab pou sa konsonmater.

Parski sa dimoun i kapab dir, mon'n ganny lavites me mon pa servi li 24er mwan. Mon servi li zis 1ertan par zour. Akfer mon bezwen pey en tarif, en *speed* ki vit pandan 24er, kan mon bezwen servi li zis 2er tan par zour?

E alors se pour sa rezon ki bann konsiderasyon komersyal, zot dir be si mon ti pou vann ou *bandwidth* selman, petet i ti pou ser. Be ou pa bezwen li lazournen antye. Be alors mon vann ou plito *data* e ou a servi li pandan letan ki ou anvi. Si ou anvi servi 1ertan

bomaten, 1ertan aswar. Ou ganny ou kantite *bandwidth*.

Me finalman mon krwar Onorab, sa ki ou pe rode se valer pou ou larzan an term kantite *data* ki ou'n servi e ki *speed* ou'n gannyen. E se la kot i bezwen annan en balans, kot sa operater i bezwen kapab delivre *speed*, an menm tan i pa fer li tro ser.

Se sa balans ki toulstan difisil pou nou trouve. Me nou pe kontinyen travay avek zot. Nou pe regard bann pratik ki ganny fer dan plizyer lezot pei, e sa ki nou vvar klerman se ki, bokou dimoun pe konmela vann plito *bandwidth*. Savedir *speed internet*.

Mon dir ou poudir mon a donn ou en laliny ki annan 8 *gigabits per second*, oubyen *megabits per second* e vwala, la mon *speed* mon pe donn ou. E en lot mon a donn li 16 *megabits* per segonn, selman avek sa ki apel en *contention*. Savedir kot ou lakour si i annan 4 zot, zot a diviz li e sakenn a ganny en *speed*. Si tou le 4 pe mars an menm tan i a mars en kar son *speed*.

So, i annan plizyer opsyon ki i en pti pe konplike pou eksplike. Mon pa krwar ou pe rod en leksplikasyon konplike. Ou, ou anvi konnen poudir konsonmater i kapab ganny

speed, i kapab ganny *data* a en pri rezonnab. E se sa direksyon ki nou anvi ale. Me nou bezwen kontinyen sa diskisyon avek zot, pou fer sir ki si zot pou al zis lo *speed*, sa pri ki zot pou donnen *unlimited* i pa vreman deborde e lafen nou pa ariv sa lobzektif ki nou pe rode.

Mon espere mon'n kapab reponn sa kestyon. Mon trouv li i en pti pe difisil akoz i en kestyon teknik. Me selman nou pe travay ek operator pou fer sir ki tou dimoun i ganny lavites, i ganny ase lenformasyon pou en rezonnab. Mersi Mr Speaker.

MR SPEAKER

Mersi Vis-Prezidan. Prezan mon a demann Onorab Aglae sa i annan okenn pwen ki i ti oule lenformasyon lo ki i pa'n ganny adrese dan sa de kestyon? Onorab Aglae.

HON EGBERT AGLAE

Mersi Mr Speaker. VP, mon'n ekout ou e an vi ki mon kestyon ti annan similarite ek sa de kestyon, premyerman VP. Mon konpran konpleksite sa servis li menm li, sa biznes li menm li. Me mon krwar i enportan ki o fiy e anmezir nou evolye, nou avanse, pep i pou konpran en pe ki mannyer sa sistem i marse.

Premyerman, mon pou tous premye. Vi ki ou ti annan en langazman ler ou ti ankor en Manm Lasamble, pou ede fer desann pri sa servis premyerman, mon ti a kontan demande, eski zot in angaze premyerman, size atraver zot regilater ki *DICT*, byensir. Avek sa bann *service provider* pou nou kapab etal en *roadmap* pou dir be *ok*, ozordi pri i lo sa nivo. Ankor dan 3an, 4an, 5an nou ti a kontan pri i avri lo sa nivo? Sa i enn premye.

Dezyenmman, mon krwar dan biznes, tou biznes ou bezwen annan ban opsyon. E enn bann faktor ki petet i defavorize se lafason ki sa package pe ganny vann avek konsonmater premyerman. E parey ou'n dir, bokou pe tay lo. Nou pe servi *bandwidth* ou swa nou al lo *speed* ki *megabyte per second*.

Eski pou ariv en pwen kot konsonmater ava deside li menm li prezan li, si pou deside ant lavites ouswa en *package* ki pou dire.

Akoz ou pou annan diferan servis litilizasyon sa servis ki parfwa ou pou bezwen lavites, me i annan servis ki ou, ou pou bezwen pe fer. Menm si biznes li i pa bezwen lavites, petet i bezwen li en keksoz ki

konstan avek pri rezonnab li menm.

E dernyen se kot i konsern *ecommerce*. Nou'n vwar poudir dan *COVID*, dan letan *COVID* bokou biznes in bezwen vwar li pe servi litilizaz *ecommerce*, e i pe vin vreman, vreman popiler ozordi. Parey sistem banker, bann lezot peyman ki ou kapab fer.

Eski dan sa menm laliny zot pe angaz avek bann lezot akter ki pe *provide* sa servis, ki pe depan lo *internet* osi pou fer ki zot osi - akoz la nou pa pe koz zis konsonmater la.

Akoz biznes osi i bezwen benefisyé pou la i kapab osi transmet sa kou ki ava desann avek en pri *internet* ki desann, ki ozordi mon krwar i a vin en *win-win* pou tou lede akter. Mersi.

MR SPEAKER

Mersi Onorab. Vis-Prezidan.

THE VICE-PRESIDENT AHMED AFIF

Mersi bokou Mr Speaker. Mersi onorab Aglae. Premyerman an se ki konsern eski i annan en *roadmap* ki nou pe travay avek bann operator? Parey mon ti eksplike li boner, nou pe fer en letid ansanm avek Labank Santral, kot nou pe mye konpran ki bann pri ki annan lo

sa marse e konpar li avek sa ki eggiste lo lezot marse. Me pli enportan ankor, pibliye li.

Pibliye dan en fason ki sen kot piblik Seselwa, sa dimoun ki pa tro, tro konpran *bandwidth* e pa tro, tro konpran *data* ki diferans i annan ladan. Pou li kapab dir, be mon lo tel *package* ek tel operator e pou sa pri ki mon peye en lot operator i pli bon e mon kapab fer desizyon vitman.

Ozordi i difisil pou zot fer sa. Parske zot napa sa lenformasyon konkret lo sa speed, lo *bandwidth* ki ou pe gannyen e an term konbyen i pe kout ou pou sa servis ki ou pe gannyen. Sa i enportan pou nou fer.

E alors, nou, nou krwar pou nou fer li dan fason byen, kot nou ganny tou dimoun lo menm paz. Fason pou fer li se met tou dimoun ansanm, konpran sa sityasyon byen. Parske Labank Santral li i pe get bokou lo sa laspe finansyel. Dan sa loperasyon ki enportan. Parske ou pou ganny en operator ki pou dir ek ou be son kou i o li, sanmenm sa i pe vann ou ser li.

Marse i ptipti, i pe pey kab soumaren. Kou fourniser deor i tre o. i annan lezot kou pou met bann emeter partou lo zil, fib optik pou fer letour Mahe,

microwave pou al Praslin. Tousala bann kou ki en lot pli gran pei petet napa. Zot vin ek tou sa bann rezon.

Be nou, nou bezwen annan n konparezon pou nou fer. E se pour sa rezon nou pe pran bann dimoun ki annan leksperyans finansyel, met ansanm ek bann dimoun teknik pou nou kapab annan en konparezon reel ki montre sityasyon Sesel. E an menm tan regard loperasyon finansyel sa bann operator Sesel.

Eski zot pe fer vreman byen, eski zot lenvestisman dan kab soumaren i pe pey fre. E si wi eski sa pri ki zot pe vann nou i normal vizavi ek sa profi ki zot pe fer? Eski i annan potansyel pou fer redwir? Nou pa oule zis dir keksoz san annan bann fer dan nou lanmen.

Alors an term *roadmap*, nou anvi annan sa letid e nou pa pe koz dan en letan ki tro lwen. Nou pe koz lannen prosenn. Nou'n fini komans e nou espekte petet boner lannen prosenn nou pou'n pare avek sa. E sa pou ed nou pou konn meyer direksyon kot nou pou ale.

An term bann opsyon ki dimoun i devret kapab gannyen. Mon krwar mon dakor avek ou, enn fwa dimoun i konpran byen kwa ki *available*

lo *market*. Sa i pou donn dimoun plis zouti. E taler mon ti mansyonnen, sa ki apel *number portability*. I enportan sa.

Akoz ozordi si mwan mon avek en operator par egzanp. E mon vvar en lot operator pe donneen *package*, dizon mon pey R700 par mwan. Mon vvar en lot pe donn R600 par mwan. E mon pe ganny en servis ki preski ekivalan. Mon anvi sot laba mwan.

Me mon pa anvi perdi mon nimero akoz tou mon bann kontan in abitye, mon'n servis sa pou 5an, pou 10an. Me mon pa pou *switch* pou al laba. Akoz mon pa kapab fer mon nimero vin *portable*. Sanmenm sa *number portability*.

E sa se enn bann fason pou anmenn plis konpetisyon e se pour sa rezon mon ti fer sa remark taler ki i enportan lo *fair trading* dan Sesel nou annan *fair trading*. E dan larezyon si mon pa tronpe zis Moris ki pa permet number *portability*. Maldives i fer li, Kenya i fer li. E nou devret kapab fer li nou osi.

An term *ecommerce*, ankor enn fwa Onorab, mwan mon reve pou annan en Sesel kot tou keksoz i lo en rezo elektronik. Kot ou antre dan bis, ou pran ou *mobile*, ou *flash* ek sa drayver ou antre. Ou al

supermarket ou met keksoz dan ou pannyen, zi sou *flash* lo sa *item* in fini peye. Si ou re met li lo *shelf* i rann ou, ou larzan.

I egziste sa bann keksoz. Nou devret pa la dan sa direksyon e kot nenport servis ki ou peye, zis ou pey ek ou telefonn. Kot ou pa kapab ou a servi en kart. Me tou dimoun i annan en fasilite elektronik ki fer keksoz ariv vit. Akoz nou pa laba?

Nou pa laba ozordi akoz enn, akoz nou napa sa platform ki permet tousala arive ozordi. Pa tou dimoun dan sekter prive e menm dan Gouvernman ki annan en rezo elektronik pou permet tranzaksyon elektronik. Pa tou dimoun ki annan sa.

Nou bezwen ariv sa nivo. Dezyenmman nou napa en platform kot lo nivo finansyel. Kot bann labank zot tou zot annan en *clearing house* elektronik ki pe marse. Konmsi dan en fason satisfezan ziska ozordi.

Byensir nou annan VISA, bann lezot rezo enternasyonal. Me ti a bon annan enn isi ki ekliersi tou bann tranzaksyon vitman. Nou pe travay fortman e se pour sa rezon ankor mon mansyonn Labank Santral. Parski zot, zot pou zwe en parti, en rol enportan dan sa letid, parski en kantite tranzaksyon i

ariv lo en baz finansyel e ki enkli bann labank.

Alors se sa nou rev. Keksoz i ganny fer vit dan en fason elektronik. Me pli enportan son pri osi i devret pli abordab. Se sa fason ki nou pou ale. Tranzaksyon i pas san okenn *cash* dan lanmen. Sa osi i ede dan lalit kont blansisaz lazan. Sa i ede lo nivo taksasyon. Parski tou keksoz i pas dan en labank e an menm tan *telecom* i fer son larzan, nou tou nou ganny en servis ki vit.

Se sa nou rev, se sa nou vizyon. E mon fortman krwar ki avek sa travay ki nou pe fer nou pou arive realiz li. Mersi Mr Speaker.

MR SPEAKER

Mersi VP. Onorab Woodcock.

HON WAVEL WOODCOCK

Mersi Mr Speaker. Mwan osi mon pou profit sa lokazyon pou swet tou *teacher* bonn fet bann lazournen ansenyan. Sirtou bann *teacher* Praslin Segonder e Grand Anse Praslin Primer.

VP, vites ek kou *internet* in toultan en konsern pou plizyer lannen e i annan en konsern ki vites ki *data* i fini. Konmsi *let's say* dimoun i annan en *package* 500GB, sa 50GB i al vreman vitman e *any package* konmela

i annan konplent ki sa bann *GB* i fini vreman vitman. Eski i annan en sistem *monitoring*.

Konmsi pou fer sir vreman *package* ki bann lakonpannyen telekomunikasyon i donne i vreman sa *package* ki zot pe donne.

Konmsi si en *package* 500*GB* i vreman 500*GB*. Si 100*GB* i vreman 100*GB*. Konmsi sa ki komanter pe gannyen i vreman sa ki zot pe peye. Or, si zot annan en sistem pou *monitor*, pou fer sir ki sa bann kliyan pe ganny *value for money?*

E dezyenmman, eski Gouvernman pour ouswa konsider ankouraz plis konpetisyon lo marse lokal. Konmsi eski i annan bann lezot lakonpannyen etranze ouswa lokal ki anvi antre dan sa biznes. Akoz petet plis konpetisyon ava ede fer redwi kou *internet?* Mersi.

MR SPEAKER

Mersi Onorab. Vis Prezidan.

VICE PRESIDENT AHMED AFIF

Mersi Mr Speaker. Mersi Onorab Woodcock. Onorab sa sityasyon ki ou'n eksplike lo premye morso kestyon konsernan *data* i al vit. Mon osi mon personnelman mon'n

eksperyanse sa en lepok. E se pour sa rezon ki mon ti dir pli boner ki i enportan ki i annan en pwen referans pou tou konsonmater.

Kot i annan en sistem kler kot ler ou aste en keksoz ou kapab veye si ou pe ganny valer pou ou larzan. Par egzant si ou'n pey en pri pou ganny par egzant 10 *gigabyte*. Apre ou vwar dan 2ertan, dan en lespas 2ertan in fini. I dir ou *data* in fini servi. Ou pa konnen kot ou *data* in ale.

E se la kot nou krwar. Anfen, telefonn ozordi lo ou sistem ou kapab al lo la pou tyeke poudir ou'n servi oubyen ou pa'n servi. I pa pou donn ou detay egzakteman kwa, me selman i pou dir ou ou'n *download*.

I annan en lot konplikasyon ki dizon ou'n met ou *data* on, me ou annan lezot keksoz. Ou annan en *laptop*, ou annan en telefonn, ou annan en lot *computer* par la ki li i pe *upgrade* son *flair* san ki ou konnen. Tousala i arive souvandfwa e i pa en keksoz ki ou, ou'n deside fer me i otomatik.

Me akoz sa *package* ki ou'n aste i annan *bandwidth*, i annan lavites, ler i annan lavites, i parey en tiyo ki'n ouver e zis delo i koul vit ladan. En

gro tiyo ki'n ouver, delo pou koul vit, i al vit. E tousala se bann konplikasyon ki konsonmater ki'n aste son prodwi pa konpran. E se sa nou krwar i bezwen annan en pwen referans ki kler pou zot kapab donnen egzakteman ki mannyer sa i marse.

So an term konpetisyon Onorab, wi mon'n mansyonnen pli boner poudir i annan konpetisyon ozordi Sesel me selman nou pe rod fason pou fer marse vin pli konpetitiv ankor. Par egzant parmi bann ki annan kab soumaren ozordi, zis en lakonpannyen ki annan kab soumaren, me i pou annan en dezyenm lakonpannyen ki pou annan son prop kab soumaren e sennla ki la i ava met ankor en dezyenm kab soumaren.

Number portability, i pou anmenn plis konpetisyon, parske ou nimero ou kapab aprezan switch li avek ki operator ki ozordi ou pa kapab. E sa i donn ou konpetisyon toudswit.

I annan lezot fason konpetisyon par egzant ozordi zis 2 operator ki ofer en servis *mobile* e byento nou pou annan en trwazyenm ki pou ofer en servis *mobile*, alors ankor konpetisyon.

Si eski nou devret annan plis lakonpannyen ankor? Pou

mwan, si i posib napa okenn keksoz ki anpes sa arive, me byensir okenn lakonpannyen avan i envestir i pou bezwen kalkil osi bann lezot lenvestisman ki bezwen met an plas akoz i pou Sesel.

Par egzant si i bezwen met *tower*, si i bezwen met lenfrastriktir pou al konekte tou dimoun kot lakaz avek *fiber optic*. Sa osi se bann kou lenvestisman me mars i ptipti.

Alors ki nou, nou kapab fer koman regilater. Petet, sa i zis en nide, se nou, nou kapab dir be *ok*, ou pa bezwen tou dimoun al met zot *tower* partou. Me nou ava en fason kot dimoun i kapab partaz bann *tower*.

E alors redwir kou lenvestisman pou permet ki bann operator i antre e ofer sa servis dan en fason avek en pri abordab akoz son lenvestisman i pa en pri ki tro o.

Tousala se bann fason ki nou krwar i pou ede pou anmenn plis valer pou larzan konsonmater e mon antyerman dakor avek ou. Parey mon ti konmans avek, mon ti dir ki sel fason pou nou fer desann pri telekomunikasyon Sesel se atraver meyer konpetisyon. Mersi Mr Speaker.

MR SPEAKER

Mersi Vis Prezidan. Mon a pran kestyon Onorab Esparon.

HON REGINA ESPARON

Mersi Mr Speaker. Bonzour tou dimoun a lekout.

Mr Speaker, avan mon demann mon kestyon zis permet mwan 2 minit koman *Chairperson Caucus* bann Madman dan Lasanble pou zwenn ansanm avek lezot madanm pou severman kondann sa video ki pe sirkile lo rezo sosyal. E osi senpatiz ek lafanmir e zanmi sa madanm dan sa *video*. E demande ki Lotorite konsernen i vreman pa pran sa lensidan parey kont bann madanm a la lezer. E demann manm piblik pou aret sirkil sa *video*. Mersi. Mr Speaker.

Mon kestyon pou Vis-Prezidan, dan sa konpetisyon Vis-Prezidan, eski a lavenir Gouvernman i annan lentansyon ankouraz bann *service providers* pou annan okenn son prop kab, avek bi ogmante sa lavites parey *Airtel* pe *plan* pou fer pou annan son prop kab soumaren? Mersi Mr Speaker.

MR SPEAKER

Mersi Onorab. Vis-Prezidan.

THE VICE-PRESIDENT AHMED AFIF

Mersi bokou Mr Speaker. Mersi Onorab. Onorab zis lo ou premye pwen mon kapab dir ou pou sa dimoun ki ou'n vwar dan sa *video* ki ti pe sirkile lo rezo sosyal in fini ganny arete. I en zom 52an, in fini ganny sarze tou e Lotorite in bouz vit lo la.

E mon krwar sa i pou sertennman en keksoz ki pou vin parey en *warning* pou dimoun ki krwar zot annan dwa bat lezot e sirtou en madanm.

Mwan osi mon ti soke e mon kontan ki Lapolis in azir tre vit e zot in aret li e bann zafer legal i deza an prose. An se ki konsern bann *service providers* ki la ozordi, zis re dir mwan ou kestyon Onorab ki ou ti pe rode lo *service providers*.

MR SPEAKER

Mikro.

HON REGINA ESPARON

Mersi Mr Speaker. Mon ti zis anvi konnen, ou'n dir poudir i annan lezot *service providers* ki pe rode pou met kab optik. Mon konnen poudir *Airtel* i en lakonpannyen parski mwan avek Onorab Romain, nou'n partisip dan sa *survey* avek konsiltan dan sa demars. Si zot annan lentansyon ankouraz lezot *service providers* pou

annan kab optik dan, en fason pou ogmant lavites e *provide* en pli gran *range of service?* Mersi.

MR SPEAKER

Mersi Onorab. VP.

THE VICE-PRESIDENT AHMED AFIF

Mersi Onorab, eskize mon ti'n mank sa dernyen pti bout. Wi definitivman napa naryen ki anpes okenn *service provider* ozordi pou li met son prop kab soumaren. Parey ou konnen sa proze pou met kab soumaren ti komans an 2008, 2009 sa letan e ti difisil pou komans li. Parski i en ti en kou environ \$35 milyon sa letan e bann operator isi ti dir zot trouv sa difisil pou zot zistifye a sa tan la.

Prezan Gouvernman ti dir be ok, i a vin en partner, i a rod larzan, i a met en pe larzan. Gouvernman mon krwar i annan apepre 42 poursan ladan e lezot operator in deside pou zot aste *shares*. Zot in al dan sa biznes ki ozordi in permet ki i annan en kab soumaren ki ofer servis *internet high speed* avek Sesel.

Me savedir parmi 3 operator, 2 i deza propriyeter dan en kab soumaren. Sa trwazyenm operator li in ini fer desizyon pou al met son kab. E

mon krwar ver 2023 i pou'n fini met son kab e alors pou annan tou le 3 ki annan akse avek kab soumaren. Tou le 3 pou annan.

Annefe senn la. 'Submarine Cable Seychelles'. *Seychelles Cable System*, (pardon) li i sa lakonpannyen ki Gouvernman i deza annan par ladan. E li i deza annan en kab ki'n fini plase ziska *Tanzania* me i pe al met en dezyenm lannen prosenn. In fini komans fer preparasyon kontrakter i deza an plas pou met dezyenm kab.

Rezon i pe met dezyenm kab se pou donn ou sa opsyon. Akoz nou konnen, parey resaman ler nou ti pe zis fer en reparasyon ki'n pran 12ertan dizon. Ki kalite bann enteripsyon ki ganny fer i for lo lendistri, i for lo Sesel. Parski 12 erdtan san *internet*, nou tou nou'n abitye pe anvoy *text*, pe *WhatsApp*. Eksetera. I for.

E zot in deside, san ki Gouvernman in bezwen met larzan. Sa lakonpannyen li menm in envestir, in rod son prop finansman. I pe envestir dan son dezyenm kab. E alors sa trwazyenm operator li osi i pe envestir dan son prop kab.

Napa okenn restriksyon lo fer sa. Tou depan lo fezabilite sa bann loperasyon ki zot pe fer. So, nou, nou ankouraz otan

dimoun, met lenfra striktir. Sa ki pli enportan pou nou se lavites, valer pou larzan. Mersi Onorab.

MR SPEAKER

Mersi Vis-Prezidan. Bon mon bezwen termin la pou sa kestyon. E mon a pas kestyon 97, Onorab Gervais Henrie.

HON GERVAIS HENRIE

Mersi Mr Speaker. Bonn apre midi tou dimoun. Mr Speaker, zis avan mon pas lo mon kestyon, depi bomaten tou dimoun pe dir *Happy Teachers Day*. Mwan mon pa'n dir akoz Mont Buxton napa lekol. Lekol La Rosière an fet i dan distrik St Louise.

Me selman nou ti pe fer en pti remark nou de *Chief Whip*. Dan Lasanble sa ki nou'n kapab konte i konnen, lo kote Parti US omwen 3 dimoun ki'n deza dan lansennyman. Lo nou kote 8 i fer. Ki swa in ansennyen ouswa in al Teachers Training College e zot in fer *teaching practice*.

So, parey ou'n dir i montre lansennyman mannyer i enportan dan lavi nou pei e ki nou pep i vini. Mersi pou sa.

Kestyon 97 i lir koumsa; - Ki estimasyon Departman Kominikasyon Lenformasyon Teknolozi (*DICT*) i annan lo

1). Lakantite ka kot piblik Seselwa in ganny anbete e vole atraver rezo *Internet* pandan sa dernyen lannen e

2). Ki mezir e Polisi sa Departman pe met an plas pou asire ki sa bann lensidan i redwir konsiderableman? Mersi.

MR SPEAKER

Mersi Onorab. Vis-Prezidan.

THE VICE-PRESIDENT

AHMED AFIF

Mersi bokou Mr Speaker. Mersi Onorab Henrie. Pandan sa bann dernyen lannen avek evolisyon dan sistem teknolozi, i fer ki bokou tranzaksyon e kominikasyon i deroul atraver sistem *internet*. Sa i anmenn bokou lavantaz akoz i fer kominikasyon pli vit, pli fasil pou nou pey nou *bill* e transfer larzan. Kominik avek nou pros e zanmi atraver rezo sosyal e *WhatsApp* atraver lemonn. Fer *zoom* eksatera.

Malerezman Onorab, menm avek tou son lavantaz i osi vin avek plizyer defayans. Enn parmi se bann vol kot plizyer endividou ou Lorganizasyon in perdi gro sonm larzan apre ki zot in ganny anbete. Sa i vin atraver sa bann form swivan. Parmi plizyer lezot. Zot in ganny en

lotri. Me pou ganny larzan zot bezwen pey larzan e donn detay zot kont. Promes maryaz kot zot bezwen peye an retour pou sa dimoun aste later e lezot propriyete pou zot.

Pe anvoy en parsel ki an retour bezwen anvoy larzan pou pey *tax* lo Erport. Lof pou ganny en *loan* par bann endividé kot enn ler zot *impersonate* bann gran personnalite. Menm Prezidan, Minis, Gouverner. Ou bezwen pey en larzan pou deblok ou *loan* e zot a debloke pou ou.

Menas pou sirkil portre endesan sa dimoun ki zot partaze avan, si i pa pey li en sonm larzan. Fer zot vin viktim, krwar ki zot anmoure avek sa dimoun e devlop en relasyon kot an retour ou bezwen donn zot larzan.

Viktim i fer krwar in ganny *kidnap* e demann son prop fanmir pou pey en *ransom*. Son prop fanmir, pou zot ganny large atraver bann fon kont e nou, nou ti vwar kot kliyan i kree en lot kont e fer krwar ki zot in pey bann letablisman touristik, koman i pa le ka.

Dan tou sa bann ka sa ki nou remarke se ki sa ki nou apel *scammers* tou i demann bann sonm larzan. Zot enfliyans bann viktim pou partaz zot detay kont labank.

Fer viktim kre bann kont labank e anvoy zot kart ATM. E sa i enkli anrezistre bann *SIM card* lokal e apre anvoy zot. Zot apre zot servi sa nimero lokal apre pou rod ankor plis viktim.

Mr Speaker, fodre fer resorti dan bokou sa bann ka viktim pa raport avek Lapolis e sa i pou plizyer rezon.

Enn, zot per pangar lezot manm zot fanmir konnen ki'n ariv zot. Zot kanmi akoz zot pou vin en topik konversasyon.

Bokou i dan bann relasyon familyal e si zot raporte i pou kree bann keksoz grav dan zot relasyon ki enkli kitans ek divors. E i annan ki totalman krwar dan sa bann *scammers*, ki menm ki ou met tou levidans devan zot, zot pa oule krwar ou.

An term statistik Onorab. Par kont ki'n rapporte avek Lapolis depi Zanye 2020 ziska la dan sa peryod *COVID*, in annan 187 ka ki'n ganny anrezistre.

Mr Speaker, i annan ankor plizyer sa bann ka ki pa'n ganny rapporte, oubyen ki pa'n ganny anrezistre pou bann rezon ki mon'n donnen avan. I annan endividé ki'n perdi ziska environ R600 mil dan sa bann ka e fodre note ki dan bokou ka ler sa bann lensidan i ganny

raporte i preski ou menm enposib pou rekiper sa larzan.

Sa bann ka i osi ganny anrezistre anba lofans ‘Resewwar larzan par fo pretans.’ Akoz aktyelman nou napa Lalwa an plas pou bann krim vol atraver *internet*.

Sa ki nou kapab remarke Mr Speaker, se laplipar sa bann *scammers* malerezman i sorti dan Was Lafrik.

Pou ou dezyenm kestyon Onorab, ki mezir e Polisi sa Departman pe met an plas, pou asire ki sa bann lensidan i redwir konsiderableman.

Mr Speaker, Lapolis an kolaborasyon avek *DICT* i merit pe travay ansanm pou kapab redwir sa bann form krim. I annan plis sansibilizasyon lo tou form medya lo en baz kontinyel pou edik popilasyon lo sa kalite krim ki pe ogmante.

Bann labank i merit averti Lapolis ler zot remark bann tranzaksyon drol pandan ki pe deroule, kot endividé pe transfer ou retir gro sonm larzan plizyer fwa e pe ganny anvoye lo bann kont aletranze ou pa bann lezot Lenstitisyon banker. *DICT* e biro *Attorney Zeneral* i merit travay lo en Lalwa deswit ki pou lit kont tou sa bann kalite krim.

Annefe nou pe deza drafte sa ki nou apel en *Cyber Crime*

Bill. Bann viktim pou rapport sa bann ka pli boner e pa les zot perdi gro sonm larzan avan rapporte. E finalman fodre annan bann lantrennman spesyalize e menm kreasyon en *Unit* spesyalize pou fer en lanket dan sa bann ka ki’n ganny rapporte. Mersi Mr Speaker.

MR SPEAKER

Mersi Vis-Prezidan. Onorab Henrie siplemanter.

HON GERVAIS HENRIE

Mersi Mr Speaker. Mersi VP pou son larepons byen detaye.

Dan 187 ka depi Zanvye 2020, savedir nou pe koz an mwayenn 2 kapab semenn ki fer vreman bokou bann sityasyon koumsa dan nou pei ozordi.

Mon kestyon siplemanter, premyerman par lefet ki nou’n idantifye laplipar sa bann *scammers* i sorti da Was Lafrik, eski i annan okenn travay ki nou pe fer avek sa bann pei lo vivo diplomasi par egzanp, ki nou kapab adres sa bann konsern?

E fer endirekteman met presyon lo sa bann Gouvernman pou zot osi donn en koudmen dan sa lalit enternasyonal, kont sa sityasyon.

E dezyenmman apard endivid'i osi annan omwen en ka ki nou konnen lo rikord resaman kot Gouvernman li menm in viktim en tel sityasyon. Sa lensidan *DBS*, mon krwar. Me selman apre nou pa'n aprann ki'n arive avek. Ki mannyer in fini. So, si ou ti kapab donn nou en *update* lo la akoz i al anliny avek kestyon orizinal. Mersi Mr Speaker.

MR SPEAKER

Mersi Onorab Henrie. Vis-Prezidan.

THE VICE-PRESIDENT AHMED AFIF

Mersi Vis-Prezidan. Mr Speaker, sa remark ki mon'n fer ki malerezman bann *scammers* sorti dan Was Lafrik. Nou, lo nou kote sertennman an se ki konsern Imigrasyon, mouvman bann tel endivid'i, ozordi i ganny surveye bokou pli byen ki i ti ete detrwa lannen pase. Nou pe fer sa parske souvandfwa sa bann dimoun i pas zis *online* oubyen aletranze, me zot vizit Sesel.

Nou pe travay avek tou bann Lazans e Minister konsernen pou met sa a latansyon bann Lotorite aletranze pou fer zot konnen poudir sa bann lensidan pe

afekte nou sitwayen e i pa bon osi pou repitasyon zot pei.

So nou pe fer tou sa ki nou kapab lo sa kote. Me mon krwar enn bann keksoz pli enportan ki nou kapab fer pou nou redwir lensidan sa bann kalite aktivite, se ki nou pep i pli byen enformen e tou dimoun i bezwen pli alert ler i ganny en email oubyen en mesaz ki in fek ganny en lotri. E li i konnen i pa'n aste okenn tiket lotri.

E oubyen i ganny dir ki en dimoun in swazir li pou resevwar en gro lenvestisman, akoz i kontan li e i annan bokou konfyans dan li e li zot ti annan en 10milyon ki en dimoun in kit dan en labank, pe al ganny anvoye kot li e alors anvoy en pti larzan touzour pou komans fer bann papye roule avan sa gro larzan i arriv kot ou.

Sa bann kalite, konmsi *father Christmas* ki aparet menm avan Nwel. Konmsi fodre nou konnen poudir i annan en keksoz ki drol. Fodre nou konnen i annan en keksoz ki drol e fodre nou konnen ki i en biznes ki pe ganny fer par serten endivid'i. Bann kriminel ki pe vol larzan dimoun.

E si nou kapab edik nou pe pep pou konnen poudir pa tonm dan sa bann pyez, sirtou kot ou bezwen donn ou portre,

ou idantite, ou detay ou kont. Transfer en larzan.

Si en boug i annan en kantite larzan, akfer i pe rod ou pou transfer en larzan kot li. Dir li transfer tou larzan apre dedwir sa ki reste. Dedwir sa ki li i sipoze peye e ou a ganny tou larestan pou ou. Ofer li sa posibilite. Me selman non, mon pa pe dir zot *deal* avek okenn sa bann dimoun. Selman annou alert, sa se pli gran zouti ki nou pou annan, en popilasyon ki edike.

An se ki konsern *DBS*, mon napa lenformasyon konkret lo ki in devenir. Mon *PS* osi i dir li napa okenn lenformasyon konkret lo la. Me se en keksoz ki nou kapab rod plis lenformasyon.

Mon konnen Labank Santral ti pe *deal* ek sa sityasyon *DBS* parski i tonm dan risk finansyel. E petet mon kapab rod sa lenformasyon e gete ki'n devenir an se ki konnen sa *scam* ki'n pase kot *DBS*. Mersi bokou Mr Speaker.

MR SPEAKER

Mersi Vis-Prezidan. Nou sesyon kestyon pou ozordi i termin la. Mon remersye bann Manm pou zot kestyon. Mersi Vis-Prezidan e Mr Choppy, *PS* pou zot partisipasyon. Mon swet zot

bon depar e bonn kontinyasyon. Nou a re pran travay 2er. Mersi.

(BREAK)

MR DEPUTY SPEAKER

Bonn apre midi, tou Manm Onorab. Nou pou kontiny nou travay pou sa Mardi e nou prosen *item* lo nou *Order Paper*. I en *Statement* ki pou fer par Vis-Prezidan. Donk nou ava fer Vis-Prezidan avek son delegasyon antre silvouple.

Donk nou ava akey Vis-Prezidan Ahmed Afif ankor avek nou, pou la apre midi e i annan en *Statement* ki *VP* pou prezante. E avek li i annan en delegasyon, sa avan i pas lo son *Statement* nou ava zis pou lenformasyon piblik bann zofisyel la.

I annan Mr Frank Ally ki *Attorney General*. Mrs Muriel Morgan ki Sekreter Prensipal pou Later. E Mr Patrick Lablache ki Konsiltan dan Minister Later avek Lakaz.

Donk nou ava envit *VP* pou fer son *Statement*.

THE VICE-PRESIDENT AHMED AFIF

Mersi bokou Mr Speaker. Bonn apre midi Mr Speaker, *Leader Government Business*, tou bann

Manm Lasanble, e tou dimoun a lekout.

Premyerman mon ti a kontan remersye ou Mr Speaker. Pou permet ki mwan lo lapar Minis Later, Minis Rangasamy ki malerezman i absante ozordi, pou bann rezon medikal.

Mon kapab fer en deklarasyon lo sa *Scheme*, ki'n ganny anonse resaman pou rann serten later Gouvernman, ki ti'n ganny pran par Gouvernman dan lepase dan lentere Nasional. Me ki ziska ozordi pa ankor ganny devlope.

Sa deklarasyon i swiv lanons ki ti ganny fer par Prezidan Ramkalawan, an Me 2021. Dan en zefor pou anmenn lazistis, swivan plizyer lensidan kot later prive ti ganny pran dan bann lannen depi 1977, ziska 1993.

Dan en fason kot bokou lanmertim in ganny kree, e nou sitwayen pa satisfe avek kondisyon, ou sirkonstans dan lakel sa bann akizisyon ti ganny fer.

Lentansyon Prezidan Ramkalawan se pou, rann later ki zwenn serten kriter e ki pa ankor ganny devlope, oubyen pa ankor ganny idantife, pou en proze spesifik avek en karakter developman piblik.

Avek ou permision permet mwan Mr Speaker, pou fer en pti tournen istorik zis pou eklersi bann levensman enportan, konsernan sa size later ki ti ganny akizisyonnen.

An 1977 e 1993 plizyer morso later ti ganny pran par Gouvernman dan lentere Nasional. Swadizan pou fer bann proze devlopman. Kan sa ti arive, Gouvernman ti swa pran sa bann later, oubyen ganny en Lakor ek sa bann propriyeter lo konpansasyon.

Ti kler malerezman ki sa aksyon pran later prive, ti kree bokou lanmertim. Akoz ti annan ki ti santi zot in ganny viktimize, akoz zot pa ti trouv okenn rezon valab pou sa aksyon. Oubyen zot dir ki zot pa ti ganny lazistis, dan konpansasyon ki ti donne pou later ki ti'n ganny akizisyonnen.

Alors an 1993, kan nouvo, e trwazyenm Konstitisyon ti ganny drafte. Ti fer provizyon pou redres sa lenzistis, atraver en lankadreman legal. Kot bann ki ti ganny afekte e ki ti zwenn serten kriter, ti kapab fer aplikasyon pou demann, swa zot later an antye i ganny rann, en lesanz sa later pou en lot morso later ki ekivalan an valer. Konpansasyon monneter pou sa later baze lo pri, an 1993

oubyen menm en kombinezon konpansasyon avek later.

Ozordi Mr Speaker plis ki 28an pli tar, i kler ki menm sa mezir pa ti satisfer tou dimoun ki ti ganny afekte. Sa i evidan dan bann temwannyaz ki nou tande ki ganny fer dan sesyon *TRNUC* e ki ganny divize an direk lo radyo ek televizyon.

Mon sit detrwa legzanp akoz ki 28an pli tar, i ankor napa lazistas. Premyerman Gouvernman li menm, in pran tro bokou letan pou rezourd sa bann ka kot ansyen propriyeter, ti fer aplikasyon anba provizyon Konstitisyon.

Konstitisyon 1993, pa ti fer okenn provizyon pou adres sa bann ka, kot propriyeter ti swadizan vann zot later avek Gouvernman anba en Lakor prive.

Ti annan alegasyon ki bann remed ki ti ganny propoze pa ti zis. Akoz bann aplikan ti bezwen soumet zot Lakor anba presyon, akoz menm rezim ki ti o pouvwar.

An 2013, 20an apre sa lamanman Konstitisyonnel konsernan later, Lakour ti ordonn pey enn sa bann aplikan, en konpansasyon baze lo valer marse sa later an 2013.

Sa ti alor kree en presedans, kot bann ki ti'n deza fini ganny peye, pou zot later

baze lo valer marse 1993, ti reklamen ki zot konpansasyon osi, ti merit ganny konsidere baze lo en valer marse, parey Lakour ti'n pas zizman dan sa ka an 2013.

An 2018 alors, Gouvernman ti kree en *Land Compensation Tribunal (LCT)* swivan en rekomandasyon Lakour Dapel. Ki ti annan koman son manda, pou adres e rezourd tou bann ka, kot ansyen propriyeter pa ti ankor ganny konpansasyon anba provizyon Konstitisyon 1993.

Sa Tribunal in alor resevwar o mwen 58 ka laplikasyon, ki ti'n fini ganny konkli anba kondisyon dan Konstitisyon 1993. E ki ti pe demann en revi zot ka.

Me etandonnen ki sa Tribunal ti napa en lankadreman legal, i pa ti kapab pas zizman, sof met rekomandasyon dan 2 ka. Kot ansyen propriyeter, pa ti ankor resevwar konpansasyon anba provizyon Konstitisyon 1993. E ki ankor devan Gouvernman.

Bokou lezot ka in osi aparet dan *TRNUC* baze lo lenzistas, ki bann aplikan i trouv zot ladan.

Sete alor Mr Speaker dan sa konteks ki Prezidan Ramkalawan, ti fer sa deklarasyon an Me sa lannen.

Kot li i ti propoze, ki Gouvernman i revwar sa sityasyon e trouv en solisyon ki pa pou enpakte, ouswa met presyon lo sityasyon finansyel pei, avek sa bann kondisyon swivan.

Dan lespri ranforsi rekonsilyasyon Nasjonal parmi son pep, pou konsider zis bann ka ki enplik later endividé Seselwa, ki ankor pe reklanm lazistas dan sa bann ka akizisyon.

Later ki ti'n ganny akizisyonnen, me ki pa ankor ganny devlope. Me sa pa pou enkli, mon repeète pa pou enkli sa bann later swivan.

Later ki'n ganny idantifye pou okenn proze spesifik, tel ki lakaz devlopman kominoter ou lenfrastriktir.

Later pou lakel permisyon *Planning* in fini donnen, pour proze devlopman.

Later ki'n ganny vann ou lwe avek lakonpannyen paraetatik.

Later ki'n deza ganny lwe, par Leta avan akizisyon.

Bann Zil Elwanye.

Later ki pe ganny servi pou lagrikiltir.

Alors tou aplikant, pou bezwen siny en Lagreman ki klersi tou lobligasyon finansyel kont Gouvernman, apre ki sa bann later in ganny rann. Ki sa

bann aplikant pa pou ganny okenn konpansasyon konsernan sa menm later parmi zot demann, kot TRNUC si zot aksepte konpansasyon anba sa *Scheme*.

Dan bann kondisyon kot sa bann later in ganny lwe par Gouvernman, sa bann lokasyon a ganny peye de novo, avek sa aplikant, a kondisyon ki respekte dwa sa dimoun ki pe lwe sa later. E ki sa lokater i kapab zwir sa later anba menm kondisyon.

Later pou ganny rann dan son kondisyon egzistan. E Gouvernman pa pou anba okenn obligasyon spesyal pou donn laprouvassyoun pou okenn devlopman a lavenir lo sa later.

Ki okenn aplikant ki'n deza ganny peye pou son later, me ki pe reklanm de novo a bezwen rann okenn konpansasyon ki i ti gannyen, ki i kapab enkli en parti later selman, avan ki later i ganny rann.

En formil in deza ganny propoze. Okenn kou pou fer, pou pey *surveyor* lokal, pou fer *survey* bann later an kestyon, pou ganny fer par bann aplikant zot menm.

Alors Mr Speaker, tou aplikant pou bezwen ranpli en form, ki pou bezwen ganny

soumet pli tar le 31 Desanm 2021.

Savedir dan trwa mwan. Aplikasyon ki ganny soumet apre sa dat, pa pou ganny konsidere. Aplikasyon i kapab ganny fer par propriyeter ki'n ganny afekte, oubyen son reprezantan legal, oubyen egzekiter dan ka kot sa aplikan li menm in *décéder*, lo lapar bann zeritye.

Minister Later pou o firamezir, travay lo bann aplikasyon ki ganny soumet, i pou soumet, son rekomandasyon avek Prezidan pou son laprouvasyon, avek bi pou konplet sa legzersis avan le 31 Desanm 2022.

Sa *Land Tribunal* pou ganny aboli, e son manda pou retourn avek Minister Later. Pou kapab met en lankadreman legal lo sa prosesis, i pou neseser pou amann *State Land and River Reserves Act*. Pou donn pouvwar neseser avek Prezidan, pou rann sa bann later dapre sa bann kondisyon ki mon fek mansyonnen.

Biro *Attorney Zeneral* pou pibliy en *Bill* prosennman. E sa ava ganny soumet devan Lasanble Nasyonal.

En kopi bann form pou ganny met a dispozisyon piblik, swa lo sit web Minister, oubyen kolekte kot Minister li menm.

Vwala an gro Mr Speaker, bann gran laliny sa propozisyon par Gouvernman, pou soulaz bann ki pe reklanm lazistis, an relasyon avek akizisyon later ki ti ganny fer ant 1977 e 1993.

Mon espere mon'n kapab fer, sa dan en fason kler e mon annan plezir pou reponn okenn kestyon Manm lo sa deklarasyon, avek ou permisyon byensir Mr Speaker.

E kot i neseser ganny led avek bann teknisyen, ou profesyonnel dan bann diferan Minister ki'n ansarz sa *dossier* spesifik. Mersi bokou Mr Speaker.

MR DEPUTY SPEAKER

Mersi VP. Pou sa deklarasyon. Nou pou ouver lasal pou kestyon, pou permet bann Manm rod klarite. Me selman mon krwar nou pou bezwen al dan Staz Komite. Nou bezwen pas en Mosyon, pou nou al dan *Committee Stage*. LGB.

HON BERNARD GEORGES

Mersi Mr Speaker. Bonn apre midi Vis-Prezidan, *Attorney General*, Mr Lablache e Mrs *en charge Planning Authority*. Non!

MR DEPUTY SPEAKER

PS pou Later.

HON BERNARD GEORGES

Oh! PS pou Later. Oh sorry.
 Eskiz mwan. Bonn apre midi zot. Mr Speaker anba *Order 38*, nou *Standing Orders*. Mon pe *move* ki sa Lasanble i rezourd, pou konstitye son lekor dan en Komite Lasanble an antye, pour permet ki bann Manm i kapab demann kestyion avek Manm *panel*. E ki Manm *panel* i kapab reponn sa bann kestyion. Mersi.

MR DEPUTY SPEAKER

Mersi Onorab Georges. Okenn ki segonde? Onorab Arissol.

HON SANDY ARISSOL

Mersi Mr Speaker. Bonn apre midi *VP* avek ou delegasyon. Mr Speaker lo en Mosyon, lo en size sitan enportan parey later. Mon krwar i ava enportan pou donn sans tou mon bann Manm e tou lezot Manm demann kestyion.

Alor pou sa mon pou segonn Mosyon propoze par Onorab Georges. Mersi.

MR DEPUTY SPEAKER

Mersi Onorab Arissol. Donk Mosyon in ganny segonde, nou ava pran en vot lo sa size. Bann Manm ki an faver? Mersi, okenn Manm ki kont? Donk Mosyon pou nou konstitye Lasanble dan, dan Staz Komite, pour demann kestyion lo sa *Scheme* ki *VP* in fek anonse. 19 Manm in vot an faver. 6 Manm in

abstenir, okenn Manm pa'n vot kont. Donk Mosyon i pase.

Serzan i ava, *move Mace silvouple*. Ok. Donk nou dan staz Komite aprezan, nou pou ouver lasal pou kestyion.

Antretan ki mon pran bann non, bann Manm kit zot lanmen anler mon ava envit Onorab Michel Roucou, pou al lo *mic silvouple*. Onorab demann ou kestyion.

HON MICHEL ROUCOU

Bonn apre midi Mr Chair. Bonn apre midi *VP* avek tou bann manm ki lo *panel*. Bonn apre midi, spesyal pou bann zabitan Mont Fleuri. *VP* mwan mon kestyion i al koumsa.

Si ou kapab dir nou apepre konbyen, *case* si ou annan sa lenformasyon. Apepre konbyen *case* parey ki ou'n nonmen ki annan pou zot *deal* avek?

E apre osi, dan mon distrik osi, i pa'n ganny eparnye avek bann tel akizisyon parey ou'n nonmen. Parey zis enn mon kapab nonmen. Ansyen Minis Mathew Servina, ki son bann zanfan, mon mazinen in sey zwenn avek Mr Lablache pou rod en pe leklersisman ki'n arive avek later zot papa.

E si ou kapab donn nou en pe detay lo la? Silvouple. Mersi.

MR DEPUTY SPEAKER

Mersi Onorab *panel VP.*

**THE VICE-PRESIDENT
AHMED AFIF**

Mersi Mr Speaker. Si mon ti kapab zis komanse, pou reponn ou premye parti kestyon.

I annan, nou ekspekte environ en 150 ka, ki kapab prezante. An term detay lo sa bann ka spesifik, mon pa konnen si, nou pou al lo bann ka spesifik. Mon pa rekomande ki nou al koz lo bann ka spesifik, ekspekte pou koz lo petet bann diferan lenstans ki'n arive.

Bann konmsi, natir sa bann keksoz ki'n arive. Me pa al dan bann ka spesifik.

Alors vwala 150 ka ki'n arive, i dan diferan distrik. Mon pa konnen si, petet lo *panel*. Swa Mr Lablache, swa PS Morgan i annan detay bann distrik e konbyen ka dan sak distrik.

Si nou napa sa pou lemoman, sifi poudir ki nou annan apepre 150 ka ki nou ekspekte, i kapab vin devan nou. Mersi Mr Chair.

MR DEPUTY SPEAKER

Mersi Vis-Prezidan. Onorab Roucou, ou annan en klarifikasyon?

HON MICHEL ROUCOU

VP zis parey mon'n nonmen mon dan mon dezyenm kestyon. Parey i annan bann fanmir, parey lafanmir Mathew Servina. Ansyen Minis, ki zot propriete osi ti ganny pran, i annan serten letan kot zot osi, i osi i ti ganny demande pou li kit son lakaz ki anler Hermitage, ki i pa'n ganny okenn leklersisman lo la. Sa i deza annan en lakaz lo la, ki'n fini ganny vann.

Apre i annan en lot propriete pli ba Hermitage ki la osi, tou apre zis apre son lanmor, zis son fanmir ler in al rode, zot vwar poudir in transfer lo Gouvernman. Oule mon donn nou sa nimero later VP? Mon a donn ou apre.

MR DEPUTY SPEAKER

Mersi Onorab. VP.

**THE VICE-PRESIDENT
AHMED AFIF**

Mersi Mr Chair. Mr Chair, mon napa parey mon'n dir lalis tou bann ka la ozordi. Nou ti pe plito koz lo son prensip e bann detay.

E, selman sa ka ki ou pe dir ek mwan, si in vin en later ki, dan sa letan ti ganny pran akizisyonnen e i lo non Gouvernman. E i napa en devlopman ki'n ganny fer parey

in ti'n ganny dir sa letan, *then* i pou tonm dan, dan kad sa *Scheme* ki nou pe koze.

Me selman, nou pe koz plito bann later ki pa ankor ganny devlope. Si i deza annan lenfrastriktir lo la sa i en ka, ki tonm mon mazinen an deor sa ki nou, nou pe koze ozordi.

Me si i annan en lenzistis, mon pa poudir ou non. Me selman i pa pou tonm anba *Scheme* later ki pa ankor devlope. Mersi Mr Chair.

MR DEPUTY SPEAKER

Mersi Vis-Prezidan. Mon ava pas laparol aprezan avek Onorab Doyace Porice.

HON DOYACE PORICE

Mersi Deputy. Bonn apre midi Vis-Prezidan avek ou lekip. Mon osi mon pou profit sa lokazyon pou mwan, swet bann *teachers* ek bann *staff* lekol en bonn fet.

Pour ki Bondye i a touzour donn zot kouraz, e determinasyon pou edik nou zanfan.

Mr Deputy, Praslin pa'n ganny eparnye par sa bann later ki nou pe koz lo la. Si pou nonmen, i tro bokou. Me mon annan enn ki mon anvi koz lo la. Se sa enn ki ti ganny pran pou fer batiman *Horizon Complex*.

Bi par deryer pran sa later e fer sa batiman se pou anmenn, dapre konpran se pou anmenn, pou bann Minister ou Gouvernman li menm annan bann facilite lofis, pou ede pou zot pa al pey sitan bokou *rental*.

Me ki mon'n al fer? Mon'n al fer en resers sasa batiman li menm, i pou en lakonpannyen ki apel *Twenty-First Century*.

Dapre bann lofis, bann reprezantan lofis ladan, i fer mwan konpran ki zot ti pey en *rental* R29mil avan, e apre sa *discount* ki zot in gannyen zot pe pey R24mil lofis. E sa i enkli ASP osi, ki dan sa lofis.

I vreman sagrinan ki ler ou konpran lekel sa konpannyen ki sa, ki lo *Twenty-First Century*, dapre mon resers se pou *United Seychelles, sorry*.

Nou koz bokou lo nou bann paran, zanfan ki napa. Me solman i malere, ki en parti politik pe pran larzan, pe met dan zot kont pou zot.

En kestyon mon ti a kontan demande, eski nou Gouvernman, nou Gouvernman ki la o pouvwar. I okouran sa *case*? I okouran sa, sa, sa batiman i lo sa, lo sa lakonpannyen? Ki zot pe fer pou sa?

E mon ti a kontan konnen. Si larzan *tax payers money* ki'n

fer sa batiman? Vi ki sa later zot ti zis pran.

Si wi. Eski Gouvernman i pare pou fer en lenvestigasyon lo la, pou kapab repran e ed nou bann Minister e nou bann dimoun dan nou Gouvernman, pou ganny en plas ki en pe pli bon marse, pou zot servi, vi ki dan zot Bidze i toulstan annan bokou *rental?* Mersi.

MR DEPUTY SPEAKER

Mersi Onorab. Mon, avan mon pas laparol avek Vis-Prezidan. Lefet ki ou'n donn tou sa lenformasyon, ou annan son *plot number* sa, kot ou pe dir sa batiman i ete?

HON DOYACE PORICE

Non. Mon napa son *plot number*, solman mon kapab dir ou ti pou ki sa landrwa.

MR DEPUTY SPEAKER

Ok. Be nou a les VPreponn alor. Mersi.

THE VICE-PRESIDENT AHMED AFIF

Mersi bokou Mr Chair. Mersi Onorab pou kestyon. Parey mon'n eksplike dan sa deklarasyon ozordi, sa deklarasyon i pe, i pe koz lo bann later ki anba Gouvernman, ki ti'n ganny

akizisyonnen, e ki pa ankor ganny devlope.

Gouvernman in deside konsantre lo sa bann, akoz parey mon ti dir lo komansman, nou kapab rezourd sa, san met okenn presyon finansyel lo Gouvernman.

Akoz ou pe pran zis en later ki pa ankor devlope, ki ou napa en komitman lo la. E ki zis ou pran ou rann sa dimoun e ou anmenn lazistis. Ou pa pe depans larzan pou anmenn lazistis, neseserman.

Sa ka ki ou'n mansyonnen, i enn ki mon mazinen, mon pa tro konn tou son detay. Kot en later, dapre sa ki ou dir i ti en later prive, Gouvernman in pran, apre in evantyelman trouv li dan lanmen en parti politik.

E dapre, selon sa ki ou'n dir i pe ganny reveni atraver sa. Si sa i le ka, i annan de keksoz. Enn ki i sagrinan ki in ariv koumsa, parske si nou ti pran. Si Gouvernman ti pran avek en bi devlopman e i pa'n fer li, i sagrinan.

Me dezyenmman i pa pou tonm dan ka sa ki nou, nou pe koz lo la. E sa si annan okenn lazistis ki pou ganny fer, i pa pou ganny fer atraver sa *Scheme* ki la, parske i pa en later ki pa'n devlope.

Me byensir si ou annan okenn lezot lenformasyon pli spesifik, mon asire Minister Later i kapab regard sa *case*, pou regarde kwa ki devret ganny fer pou annan lazistis.

Mon pa konnen si sa dimoun ki ti annan son later in ganny peye en sonm, ki ti rezonnab.

Me sertennman sa negosyasyon i pa pou tonm dan kad sa *Scheme* ki la devan nou. Mersi Mr Chair.

MR DEPUTY SPEAKER

Mersi Vis-Prezidan. Mon ava donn laparol Onorab Terence Mondon.

HON TERENCE MONDON

Mersi Mr Speaker. Mon kestyon. Dan ka ki Gouvernman pou bezwen rann en morso later, ki i pa'n servi. E si mon'n konpran byen VP in dir ki, tou bann fre asosye avek sa tranzaksyon pou bezwen ganny fer par sa aplikan.

Mon anvi konnen ki rezondet pour sa fason fer? E ki opsyon, bann aplikan i annan si zot napa sa mwayen pour fer sa bann tranzaksyon, parey pou *survey*, pou tir sa morso ki i pa'n ganny devlope? Mersi Mr Speaker.

MR DEPUTY SPEAKER

Mersi Onorab Mondon. *Panel*. Vis-Prezidan.

THE VICE-PRESIDENT AHMED AFIF

Mersi Mr Chair. Mr Chair sa ki mon ti dir taler konsernan *survey*. Mon ti koz lo kou *survey*. Si *survey* pe ganny fer par en *private surveyor*, sa nou pe dir ki sa kou *survey* i a ganny fer par sa dimoun.

Souvandfwa, petet en dimoun i pou demann i pou *claim* poudir son later, balizaz i diferan e alor i anvi fer en lazisteman lo son *claim*.

Me Gouvernman osi i annan son *surveyor* li. Lentansyon se si nou annan nou *surveyor*, nou deza annan en *survey* sa later, nou fer li, lo nou fre. Be si li i ensiste ki bezwen, dan lentere letan eksetera i bezwen fer li pli vit ki sa e i anvi fer li. Byensir sa nou dir, be sa vin lo ou fre.

Se sel rezon ki, nou ti met sa *Clause*, pa pou fer li vin pli difisil. Me parski nou osi nou annan en tim *surveyor*. Me si sa dimoun i ensiste ki sa i ganny fer prive avek en *surveyor* prive. *Then* i kapab si i pare pou li pey sa fre *then* i *ok* avek nou. Mersi Mr Chair.

MR DEPUTY SPEAKER

Mersi viz Prezidan. Mon a pas laparol avek Onorab Aglae.

HON EGBERT AGLAE

Mersi Mr Speaker. Minis bonn apre midi ek delegasyon. Minis premyerman mon ti a kontan en leklersisman, anvi ki sa bann later ki ti ganny akizisyonnen ki ou pe fer mansyon, ki pa ankor devlope.

Eski si, i annan parske anba *Land Acquisition Act* 96. Lartik 26 nou Konstitisyon i fer rekomandasyon pou en dimoun vin devan, met en *claim* ki pou pas Ankour.

E si i annan bann *case*, ki deza tonm dan sa bann kategori ki ou'n mansyonnen. Eski zot *case* pou tonbe, zot pou al direkteman anba sa *Scheme* pou fer sa bann *claim*? Sa i enn.

Dezyenmman bann later petet ki, mon kapab dir ladministrasyon oparavan, si in deza, Gouvernman in deza annan en plan ki'n ganny soumet pou fer serten devlopman. Me solman ki pa ankor materyalize, ki dan *pipeline* proze li menm li.

Eski zot pou ganny konsidere koman en fe akonpli, ouswa, ou swa zot pou ganny *made redundant*. Savedir proze pou kennel deswit la. Pou napa ki pe al ganny fer lo sa later la.

Dernyen li menm li, petet ou a ekliersi mwan la. I annan bann lenstans ki, nou pou vwar petet propriete i kapab ganny *subdivide* osi, in kapab in ganny *subdivide*, ki ler sa, sa konplen an son orizinalite ki ti pou annan en *parcel number* avan.

Me ler i *subdivide* in sanze, ouswa i annan en konstriksyon, ouswa en devlopman in ganny fer lo porsyon sa later li menm li. Ki mannyer sa pou marse dan li menm li? Mersi.

MR DEPUTY SPEAKER

Mersi Onorab. Vis-Prezidan.

THE VICE-PRESIDENT AHMED AFIF

Mersi Mr, Mr Chair. Mr Chair mon pou reponn enn parmi sa trwa kestyon. E sa enn la kot i konsern bann proze ki'n deza ganny, in deza annan en plan. E alors eski i pou tonbe akoz sa later pou ganny rann.

Onorab dan bann kondisyon ki nou ti koz lo la, ki dan sa *Scheme* se ki i pa pou kapab enkli en later ozordi. E mwan pe soz sa bann parol egzakt. En later ki'n ganny idantifye pou okenn proze spesifik tel ki;- lakaz, devlopman kominoter ou lenfraz striktir, oubyen later pou

lakel permisyon *Planning* in fini donnен pou proze devlopman.

Sa bann later pa pou kapab ganny enkli parmi sa bann. Alor mon'n reponn sa enn la. An sa ki konsern lo kote legal, Konstitisyon e si sa bann *claim* osi i, mon a permet ki *Attorney Zeneral* avek ou permisyon Mr Chair.

E sertennman sa trwazyenm kestyon petet lo kote lekip *MLUH* i ava reponn. Alor avek ou permisyon mon ti a demann AG pou reponn premye kestyon.

MR DEPUTY SPEAKER

Sertennman. Go ahead AG.

THE ATTORNEY GENERAL FRANK ALLY

Mersi Mr Chairman. Bon Onorab, sa, sa *Scheme* i en *Scheme* ki pe *deal* avek zis bann later ki ti ganny *compulsory acquire*. Savedir ti ganny konfiske par Gouvernman anba *Acquisition of Land Act 1977*.

I pa tonm, bann later ki'n ganny *compulsory acquire*, anba *Acquisition of Land in The Public Interest Act* ki ti pase an '96 i pa pou tonm anba la.

E sa ki ekstansyon ki'n ganny fer anba sa *Scheme*, se ki parey Vis-Prezidan in dir, In annan bann dimoun, ki zot ti vann zot later avek

Gouvernman pandan sa peryod 1977-1993.

In en kontansyon sa bann dimoun a tou moman ki si zot ti ganny sa swa pa vann sa later, zot pa ti pou vann sa later.

E ki'n arive, se ki akoz ti annan en menas, *whether expressly oubyen enplisitman* ki si zot pa vann zot later avek Gouvernman ki ti'n fer en lof pou aste zot later, zot later ti pou ganny *acquire* par Gouvernman, par anba *Land Acquisition Act 1977*.

Alor pou zot, zot *claim* ki zot in vann zot later en pe anba *sous contrainte* si nou kapab dir, *ok under protest*.

E sa *Scheme* i pou, donn sa bann dimoun sa loportinite si zot, pou zot anmenn laprev devan e si Gouvernman i satisfe. E zot later ki Gouvernman in aste avek zot en bon bout pa ankor ganny devlope, ouswa dan son antye, oubyen an parti, *then* zot kapab tonm anba sa *Scheme*.

E la Gouvernman i a konsidere, si zot later i tonm anba *undeveloped land*. E la i a process zot aplikasyon. Mersi. Mon krwar mon'n reponn ou kestyon. Mersi.

MR DEPUTY SPEAKER

Mersi Attorney General. Mrs Morgan.

PS FOR LANDS MURIEL MORGAN

Mersi Mr Speaker. Mersi Onorab pou kestyon. Lo kote *subdivision of property*, so preski tou bann propriete, ki nou deza okouran, ki pe antre dan *Scheme*, nou annan zot *original parcel numbers*.

Si in arive, ki in annan *subdivision* ki'n ganny fer, nou kapab retras li to the *original parcel number*. E ler sa dimoun pe fer son *claim*, i fer li son *claim* dapre *the whole parcel and not a subdivision* ki spesifik. Mersi.

MR DEPUTY SPEAKER

Mersi Mrs Morgan. Nou pou pas laparol aprezan avek Onorab Monthy.

HON PHILIP MONTHY

Mersi Mr Deputy. Bonn apre midi VP avek ou delegasyon. E en *Happy Teachers Day* pou tou, *teacher* dan Sesel spesifikman bann *teacher* Cascade.

VP ler ou'n fer ou *Statement* ou'n exclude bann, zil ok?

E nou konnen ki annan serten endividé ki ti proprieter bann zil ki'n perdi sa dan lepase. So eski sa i vedir zot pa pou benefisyé, zot pa ganny

nanryen dan sa, dan sa *Scheme* ki ou pe prezante?

E apre mon dezyenm kestyon, evidaman ti pou lo later ki en parti politik in pran. Akoz mon konnen dan Cascade mon annan de *plot*, ki tonm lo sa kategori. So VP in dir i pa lo sa *Scheme* la, so mon a rezerv sa pou en lot zour. Mersi.

MR DEPUTY SPEAKER

Mersi Onorab Monthy. *Panel Panel* in sezi son kestyon Onorab Monthy.

**THE VICE-PRESIDENT
AHMED AFIF**

Mersi Mr Chair. Mr Chair enn bann, enn bann rezon bann zil in ganny eksklir se parske bokou sa bann later ti'n fini ganny vann avek bann dimoun prive.

Alor i pa tonm dan kad en later ki i avek Gouvernman ozordi. Ki prezan i deza dan en size akizisyon. Se enn bann rezon.

An sa ki konsern later Cascade, Mon napa ka detay spesifik lo Cascade. Me selman si mon asire ou fer nou ganny bann detay spesifik lo la. Nou, nou, kapab rod plis lenformasyon pou gete si sa bann later, zisteman i tonm dan kad sa bann ki pou dan *Scheme* ozordi. Mersi Mr Chair.

MR DEPUTY SPEAKER

Mersi pou sa Vis-Prezidan. Nou ava pas laparol avek Onorab Woodcock.

HON WAVEL WOODCOCK

Mersi Mr Speaker. Mon kestyon i kot i konsern sa travay ki pe ganny antreprann pou, retransfer sa bann later. Pou retransfer sa bann later, ki ganny *acquire* a plizyer repriz malapropo avek, avek bann dimoun ki sa later i apartir, i apartenir a zot.

VP si ou kapab donn nou en pti pe lenformasyon lo, sa travay ki pou ganny antreprann. Lekel vreman ki pou, ki pou fer sa travay pou retourn sa bann later avek son bann, son bann propriyeter.

Akoz mon pe demann sa, eski en Komite pou ganny etablir? Ouswa eski i pou direkteman anba Minister? Ki Departman ki pou antreprann sa?

Akoz mon pe demann sa VP, akoz ler mon pe get lo *panel*, i annan Mr Patrick Lablache ki lo *panel* devan, ki li ti *Principal Secretary for Land Planning and Management*, anba Minister Devlopman Nasyonal an 1986 e 1989.

E sa letan ti anba Parti Inik, kan plizyer bann later ti

ganny *acquire*. In osi *Advisor to Ministry of Land Use and Habitat*, (MLUH) an 1998 onward. In vin PS ankor Septanm 2004 e la ozordi i en Advisor dan Minister.

Akoz ki mon pe demann sa? E ozordi i annan plizyer dimoun ki pe anmenn zot ka devan TRNUC, kot i konsern zot later ki ti ganny *acquire*, sa letan kan Mr Patrick Lablache ti PS.

Alor mon kestyon i eski i pa pou en, eski i pou osi *involve* dan sa tranzaksyon - dan sa travay? Eski i pa pou en konfli lantere pou en dimoun ki ti la sa letan, ti PS ler sa bann tranzaksyon ti ganny fer.

Ki ozordi i annan plizyer zot pe anmenn konplent devan TRNUC. Si i pou *involve* dan sa tranzaksyon, dan sa prosedir pou retourn later sa bann dimoun ki ti ganny *acquire* dan sa bann letan, sirtou anba Parti Inik?

Mon dezyenm kestyon. VP i annan bokou bann later ki'n ganny *acquire* annefe. E plizyer sa bann later ki'n ganny *acquire* apre in ganny transfer anba en parti politik.

Ozordi nou pe tann 46 bout later, me selman mon krwar nou bezwen al fer en letid pli a profon. 46 bout later i annan bann later ki ti ganny

transfer pou R1. I annan bann later ki pa neseserman vreman ganny devlope a plen.

Eski dan sa konsiderasyon ki pe ganny fer, eski sa bann later plizyer sa bann bout later osi, pou ganny retournen avek son bann propriyeter orizinal? Mersi Mr Speaker.

MR DEPUTY SPEAKER

Mersi Onorab Woodcock. Vis-Prezidan.

THE VICE-PRESIDENT AHMED AFIF

Mersi bokou Mr Chair. Mr Chair an term lafason travay, pou ganny fer, dan Minister li menm pou enplimant sa *Scheme* ki'n ganny anонse.

Minister pa pou travay zis lo li menm. I pou annan en tim enterministeryel, ki pou annan byensir bokou bann dimoun Minister li menm ki konn sa bann ka later ki pa ankor ganny devlope.

E ki zwenn sa bann kriter ki mon'n koz lo la. E zot, enn fwa zot in fer, zot, zot *assessment* sa bann diferan ka, ki'n vini. Zot pour fer zot rapor, e zot pou fer zot rekomandasyon pli tar 31 Desanm 2022, kot sa bann rekomandasyon pou al kot Prezidan pou son laprouvassyom.

Alor okenn *staff*-e byensir ozordi ou pou annan *staff* ki'n, ki'n la dan lepase, i ankor la ozordi. Nou pa vin la pou nou akiz personn. Tou dimoun in travay, tou dimoun ti annan en responsabilite.

E sa ki mon kapab asir ou Onorab, se ki travay pou ganny fer dan en fason drwat, dan en fason lozik, baze lo bann fe ki pou ganny met devan tou sa bann dimoun lo sa Komite.

E finalman sa pou ganny met dan en rapor e nou espere ki ver lafen lannen prosenn, nou a kapab trouv bann desizyon ki pou anmenn lazistis pou tou sa bann dimoun ki pou vin devan.

An sa ki konsern later, ki ki'n ganny donne, ki'n ganny pran apre in ganny vann, avek bann lezot dimoun pou diferan rezon, parey mon ti eksplike oparavan, si sa later i pa lo Gouvernman la ozordi i pa tonm dan kad sa *Scheme*.

Alors i annan lenzistis ki'n arrive, mon pa pou argimant lo la. Me nou ozordi nou pe koz lo en *Scheme* later ki ankor lo Gouvernman, ki pa ankor ganny devlope, e ki nou santi in ler pou nou rann sa dimoun.

E koumsa i pa vin en presyon lo Gouvernman, e i pa met okenn presyon finansyel

sirtou lo Gouvernman. Mersi Mr Chair.

MR DEPUTY SPEAKER

Mersi Vis-Prezidan. Mon ava prezan apel Onorab Richard Labrosse.

HON RICHARD LABROSSE

Mersi Mr Speaker. Bonn apre midi ankor enn fwa Vis-Prezidan ek ou delegasyon. AG mon ti annan en kestyon ki ler mon ti pe ekout. Mon ti a kontan kekfwa AG i donn en pe klarifikasyon lo la.

Dan nou Lalwa ki nou annan ozordi la, ouswa kekfwa bann ki nou ti annan oparavan, konsernan *acquisition of land*, ki Lalwa, konmsi ki Lalwa i *advice* lo la sirtou ler i konsern bann parti politik?

Akoz rezon ki mon pe demann sa, nou pa anvi demen ankor ki bann repetisyon, bann problemm ki nou'n tandé dan lepase. Sirtou Sesel *actually* nou annan en problem later ki vreman limite. Ki bokou dimoun i lo lalis pou plizyer lannen.

Mon ti a kontan si AG ti kapab donn mwan en pti keksoz an bref, ki Lalwa i dir konsernan bann parti politik, sirtou ki kapab aste bann propriete parey later. Bann *multi* konmsi, partou. Si ou ti

kapab dir dan tou le 4 kwen Sesel. Mersi.

MR DEPUTY SPEAKER

Mersi Onorab. *Panel*. Vis-Prezidan.

THE VICE-PRESIDENT**AHMED AFIF**

Mon ti a. Avek, ou permision demann AG pou reponn sa direkteman.

MR DEPUTY SPEAKER

Sertennman. *Go ahead AG*.

THE ATTORNEY GENERAL**FRANK ALLY**

Mersi Mr Chairman. Mr Chairman. En parti politik parey nou konnen i en personnalite moral - savedir i en personnalite legal.

I annan en personnalite legal. E i kapab aste propriete, i kapab proprieter, propriete, i kapab antre dan bann Kontra.

Mon krwar ou kestyon petet ki ou ti pe sey demann mwan Onorab, *Honorable Member* pou Plaisance, se ki si en parti politik i kapab aste en later, ki petet Gouvernman in *compulsorily acquire*?

Bon an prensip, si en later in ganny *compulsory acquire*, in ganny *acquire* pou en rezon, dan lentere piblik e *for a public purpose*.

So definitivman i pa pou en later ki i pou kalifye pou en parti politik aste. Me nou bezwen konpran poudir in kapab annan bann sityasyon kot i annan later ki'n ganny *compulsorily acquire*. E evantyelman dan letan *One-Party System* parti o pouvwar in sa lepok in evantyelman aste.

Parey nou konnen si nou pou fer en pe istorik, fondasyon Leta, sa lepok pti en pti pe atraver en parti politik akoz ti annan en Parti Inik.

Mon pa pou al dan, dan tou sa teori, me selman mon krwar sa i evidan. E enn bann later ki, petet zis pou, pou lenformasyon, sete Mize SPUP kot biro ansyen Biro Avoka Mr Rene ti ete avek Biro Parti SPUP. E sa propriyete ti ganny *compulsory acquired*.

Me evantyelman i ti ganny vann. E ler i ti ganny vann, i ti be diferans se ki i ti ganny vann apre 1993. E i ti en, e Lakour apre ki son ansyen propriyeter ki anfet mon ti reprezante Ankour, Lakour ti ordonnen ki sa later i ganny retournen avek sa ansyen propriyeter.

So in annan zis pou en pti pe, ilistre en pti pe sa. I kapab i annan lezot. Me sa i bann *case* ki bann dimoun in pou'n fer en *claim* anba *Schedule 7 Part III*, of Konstitisyon. Ki Vis-Prezidan

i ti koz lo la letan Konstitisyon trwazyenm Republik ti pe ganny drafte.

E sa konsansis ki tou bann parti, ti arriv lo la pour ki Gouvernman i return, i donn konpansasyon swa par pey larzan, swa par return later, oubyen swa par donn en bout later ki koresponn lo valer sa later ki ti ganny *compulsory acquired*. Mersi.

MR DEPUTY SPEAKER

Mersi AG. Mon ava pas laparol aprezan ek Onorab Cosgrow.

HON WALLACE COSGROW

Mersi. Mersi Mr Speaker. Bonn apre midi Mr Speaker, bonn apre midi tou dimoun lo *panel*.

Mr Speaker, ozordi apre midi mon konpran tre byen ki sa *Scheme* ki Vis-Prezidan in vin prezante i pe dir nou.

Mon mazinen ki en kantite nou, dan Lasanble Nasyonal, ouswa an deor Lasanble Nasyonal nou ozordi, nou annan nou lakaz, ouswa en propriyete ki swa, ki petet in ganny fer lo en bout later ki oparavan ti'n ganny *acquire* par Gouvernman. Bokou nou, bokou Seselwa.

E mon rapel en msye dan *TRNUC*, si mon rapel byen i ti dir, i ti annan en bout later depi Beau Vallon ziska anba

montanny *Trois Frère*. E tou dimoun ki pe ekoute zot kapab konpran ki kantite devlopman in annan depi Beau Vallon ziske anba montanny *Trois Frères*.

Kantite Seselwa, ki'n nobou benefisyé, pou zot kapab annan en morso later, pour zot *build* zot lakaz e menm *subdivide* pou donn zot zanfan.

Mon kestyon i komans koumsa Mr Speaker, akoz mon ti a kontan demann *VP*. Ki kantite later dan sa *Scheme*, an term ektar, an term siperfisi ki zot anvizaze retourn avek bann dimoun ki ti, ki ti *own* sa bann later, *or petet zot heirs*, si annan ki'n *décéder*?

Ki kantite later ki reste, ki pou reste dan stok later Gouvernman, ler sa legzersis in fini?

E eski sa kantite later ki pou reste, letan Gouvernman pe mazin plan pou devlopman sosyoekonomik pei. Savedir nou pe koz lakaz, lopital, lekol, landrwa pou fer biznes, laferm landrwa kot dimoun i kapab plante.

Ki kantite later pou reste pou Gouvernman kapab devlope e donn pep Seselwa, donn bokou bann zenn ozordi ki anvi en bout later *land bank*, bokou dimoun ki anvi, en, en petet en lozman atraver, servis

lozman ki Gouvernman i donnent.

So ki kantite later. Eski nou vwar poudir *going forward* dan le fitir, pa pou kree serten problem, pou pep Seselwa li menm an zeneral? Mersi Mr Speaker.

MR DEPUTY SPEAKER

Mersi Onorab. Vis-Prezidan.

THE VICE-PRESIDENT AHMED AFIF

Mersi bokou Mr Chair. Mersi Onorab pou ou kestyon. Ou premye kestyon lo ki kantite later ki nou pe koz lo la.

Onorab onnetman mon napa en sif, la devan mwan akoz i pou depan lo konbyen dimoun ki vin devan ki met son, *claim* pou later ki pa ankor ganny devlope e ki la, lo non Gouvernman. I pou depan lo la, me petet lo tim kote teknik, si zot annan plis lenformasyon zot a donnent.

Dezyenm kestyon eski sa i vedir ki nou pou perdi later ki nou ti pe al fer devlopman lo la? Larepons i kler, dan mon *Statement* en pe parey mon ti reponn Onorab Aglae. Larepons se non.

Parski si nou annan, later ki nou'n fini, parey nou dir *earmark*, nou'n fini, met de kote pou serten proze devlopman, i

pa tonm dan sa *Scheme*, parske Gouvernman in fini mark sa later, ki pa ankor ganny devlope. Me in ganny marke pou al ganny devlope pou proze lakaz, devlopman kominoter oubyen lenfrastruktir.

Alor oubyen, menm in fini ganny permisyon *Planning* pou al devlope. Alor Gouvernman i deza annan en plan devlopman. E akoz i annan en plan devlopman in deza, mark serten landrwa pou devlopman.

E alor sa i reste sa. So nou napa, okenn dout poudir nou pou perdi bann plan devlopman ki deza, ki deza in fini, in fini fer. Mon pa konnen si Mr Chair avek ou permisyon si tim teknik *MLH* i kapab donn lezot, leksplikasyon lo later, konbyen i annan.

MR DEPUTY SPEAKER

Mr Lablache i annan en klarifikasyon, ouswa Mrs Morgan. Enn ant zot de.

CONSULTANT PATRICK LABLACHE

Bonzour Mr Chair. Bonzour *Leader of Government Business*. Bonzour tou Onorab. Zis pou azoute petet, sa ki Vis-Prezidan in dir, nou nou'n get en pti lo bann kategori later, parske i tre difisil poudir ki kantite later ki pou, reste pou reste

Gouvernman. E ki kantite later ki pou ganny retournen avek dimoun, i annan plizyer kriter.

Par egzanp i annan later osi, ki pa reste nanryen i reste zis bann, bann pti bout, pti bout ki pa vreman kapab fer nanryen avek. *Ok?* Be selman Gouvernman nou pe dir par egzanp semen ou pa kapab retourn semen, ou pa kapab donn dimoun en morso semen ki deservi tou dimoun dan en *housing estate* par egzanp.

Ou pa pou retourn bann lenfrastruktir, bann litilite piblik *PUC* par egzanp, ou pa pou retourn en *sewage treatment work*, ou pa pou retourn bann landrwa rekreasional kot dimoun i dan benefis, dan lentre piblik dan sa *housing estate*. Sa bann dimoun i benefisyavek en landrwa pou zot zwe.

So en *playing field* par egzanp ki benefisy en kominote, non ou pa kapab retourn sa.

E parey Vis-Prezidan in dir, nou pou konn sa, nou pou annan en lide lo, nou konnen apepre en 130,140 dimoun petet *maximum* 150, ki pou kapab fer sa *claim*. Pou zot demann en par zot later, ouswa i annan later osi, ki Gouvernman pa'n touse ditou.

Espesyalman later ki dan *National Park* par egzant. Nou pou vwar ki i annan de trwa ki ankor la ki ankor, i ankor vyerz.

E sa mon panse ki i pou fasil pou return sa dimoun sa. *Ok?* Me i annan later ki, en kantite, en gran parti in devlope.

Si i pa ankor devlope savedir ki i pa kapab ganny devlope dan en fason soutenab ou ekonomik. So nou al lakantite ki nou kapab ale.

Me zis pou azoute ankor ki i annan bann proze par egzant *land bank*, ki ti'n fini ganny idantife o firamezir. Me sa nou pe, Gouvernman pou garde sa bann proze. E lide se ki nou pou pibliy sa bann lokasyon, sa bann landrwa son egzakt *location*, avan lafen lannen, avan le 31 Desanm 2021. Mersi Mr Chair.

MR DEPUTY SPEAKER

Mersi Mr Lablache. Onorab Cosgrow ou annan klarifikasyon?

HON WALLACE COSGROW

Yes, Mr Speaker. Mon annan en pti klarifikasyon avek en pti kestyion. En dernyen, en pti kestyion pou azoute.

Mon klarifikasyon se ki *Development plan i set* pou en serten letan li. Nou, nou pou ale

apre, nou tou ki la nou pou ale apre en serten letan. Later pou pran nou, nou pou vin an *poussière*.

Lefe i reste ki nou bezwen mazin, nou bezwen mazin bann zenerasyon ki pe vini apre nou, nou pti zanfan, nou zanfan. Lot *Development plan* ki pou ganny fer.

So mwan pou mwan sa zafer *development plan* pou mwan i mon pa tro aksepte Mr Speaker, me selman i larepons ki VP in donn mwan.

Mon dernyen pti kestyion VP. Eski ou pe dir mwan zot in fer en *Scheme*, zot in fer en *Scheme* lo sa lanpler, san konnen egzakteman konbyen later zot pe al tournen tourn kot son bann *former owners*?

Akoz zot in dir zot pa konnen kantite later siperfisi. Mersi bokou.

MR DEPUTY SPEAKER

Mersi Onorab. *Panel, VP.*

THE VICE-PRESIDENT AHMED AFIF

Mersi Mr Chair. Mon ti a, mon ti a zis dir poudir, *Development Plan* wi *Development Plan* i ganny fer pou en peryod letan. E Gouvernman in fini *earmark* son bann later ki, ki i pou anvi servi pandan sa bann prosen 5an, oubyen prosen 10an.

Me petet pou reponn ou pli spesifikman mon a, permet *PS* pou Later ki petet, i pli azour avek *development plan*. E i kapab dir ou ki zot bann plan, pou zot fer sir ki nou annan en devlopman lonterm, pa zis pandan sa prosen 5an.

E answit, lo kote dezyenm lo kote ki kantite later i annan. Onorab, nou konnen kantite later i annan. Me selman, nou pa konnen si tou dimoun pou vin, pou vin pran en *claim*.

E si zot tou zot enterese vin rann sa later sa, sa bann kestyon i reste bann varyab ki reste avek nou. E ki nou pou konnen o firamezir ki dimoun i vin devan pou vin, pou vin met sa bann keksoz.

Parske i pa osi senp ki ou krwar poudir sak later i annan en dimoun par deryer li e i osi senp ki sa.

I annan ki pa'n zanmen pran kontak. Me i kapab pran kontak, i annan ki'n mor ou pa konnen lekel zot bann zeritye. E petet enn ladan ki pou vini, pou vin demande.

Alor ou pa kapab dir tousala pou vini, ou pa kapab met en sif lo la. Me selman o firamezir ki nou ale. Mon pa konnen kot ou pe ale, nou, nou pou la.

Be nou ava gard zot okouran, nou ava gard zot

okouran ki pe pase pandan sa prosen 12mwan sertennman. Nou pou la pandan sa prosen 12 mwan, avek lagras.

E nou ava gard zot okouran ki pe pase. E pour fer sir ki tou dimoun i konn egzakteman ki pe pase an sa ki konsern sa *Scheme*. Me avek ou permisyon Mr Chair, mon a pas laparol avek *PS* Later. Mersi.

MR DEPUTY SPEAKER

Mersi *VP*. Mrs Morgan.

PS FOR LANDS MURIEL MORGAN

Mersi Mr Chair. Mersi Onorab pou en kestyon. So ler nou pe koz, lo an term plan devlopman lonterm pou nou bann fitir zenerasyon, i enportan pou nou note ki Gouvernman pa ganny later *only through* bann akizisyon ki'n *previously* ganny fer.

I annan detrwa prosedir ki nou fer pou nou kapab *acquire through different means and method in which parts of some is, negosyasyon osi*, pour ki nou ganny plis later pou nou kapab distribye.

Akoz i enportan pou nou gard antet osi, ki menm si nou ti deside gard tou sa later ki la, Gouvernman in deside poudir i anvi rann, i pa vedir poudir nou

ti pe garanti later pour en zenerasyon fitir a 100poursan.

E nou louvraz pou nou fer sir, ki nou toultan nou pe travay lo bann mwayen pou nou fer monte nou stok ki nou annan, pour ki nou kapab deservi zenerasyon fitir. Mersi.

MR DEPUTY SPEAKER

Mersi Mrs Morgan. Mon ava donn laparol Onorab Labonte.

HON ANDY LABONTE

Mersi Mr Chair. Bonn apre midi *VP* avek delegasyon. Mr Chair permet mwan pou mwan osi swet bonn fet tou bann ansennyan enkli, Lekol La Rosiere, Mont Fleuri, Belonie, English River. Akoz mon lekol, mon bann zanfan i lekol en pe partou. E ensi byen ki bann ansennyan ki'n deza pran zot retret akoz zot osi zot in ede dan en fason ou en lot.

Bon Mr Speaker, mon kestyon ki mon pou demande. Vi ki Onorab Cosgrow in fer en *statement* ase enportan, ki nou'n vin an *poussière*, nou pou retour an *poussière*.

Me i enportan pou nou note osi ki Moise malgre i ti vwar later promiz, i pa ti antre ladan.

So mon kestyon *VP* i vin plizoumwen, parey ou'n koz sa *Scheme*, i vre sa *Scheme* i

enportan. E nou vreman apresye ki ou'n vin avek en tel *Scheme*.

Me plizer ou repons ki ou'n donnent *VP*, petet mon koz en pe pou bann pti malere, si oule. Akoz i annan bokou bann pti malere la deor ki, mon pa konnen si ou pe mazin pou vin avek en lot *Scheme* ki pou get zot.

I vre poudir Minister Responsab pou Later i pa la pou lemoman, petet ou kapab reponn nou, donn nou en pe leklersisman. Akoz i annan bokou pti malere ki santi zot later in ganny pran, swa ki'n fini komans fer en semen, oubyen petet en keksoz lo la.

Me ler zot al kot biro pou zot anmenn zot, zot, zot ka devan. *Right now*, i pe arive pou zot pe ganny trete swa zot voras, swa zot pa entelizan. Ki zot santi poudir zot drwa pe ganny vyole e petet mon pa konnen si *PS Morgan* ti kapab reponn, reponn mwan sa kestyon.

Apre dezyenm kestyon. Ankor enn fwa, dizon poudir later ti ganny pran pou benefis kominote.

Me selman apre nou vvar poudir malgre in ganny pran pou benefis kominote. Me selman apre, en parti politik li in pran sa later konmsi pou li.

La parey mon koz lo V8336, avek V8337, ki ti ganny pran pou fer Sant Kominoter pou Distrik La Rivière Anglaise.

Ozordi Distrik La Rivière Anglaise napa en Sant Kominoter akoz Parti Lepep in pran, sa later. So petet lo sa de si i annan bann *Scheme* ki pou vini pou adres sa bann sityasyon parey? Mersi.

MR DEPUTY SPEAKER

Mersi Onorab. Vis-Prezidan.

THE VICE-PRESIDENT AHMED AFIF

Mersi bokou Mr Chair. Mersi Onorab pou sa de kestyon. Mon pa okouran, okenn later parey ou dir pou bann pti malere, ki ki'n ganny pran dan okenn fason malapropo.

Me sertennman mo a permet avek ou permisyon ki lekip Mrs Morgan ki *PS* i ava kapab, petet si i annan detay lo la.

An sa ki konsern V8336, V8337 ki ou'n fer referans lo la. Ankor annan fwa si in fini transfer lo en lot antite, en parti politik par egzanp. Byensir i pa pou tonm dan sa *Scheme*.

Me mon konpran, ou pwen ki ou pe fer sorti, ki i pa'n si in ganny akizisyonnen pou en devlopman, *then* parey AG in eksplike taler, i pa devret, i pa

ti devret zwenn kriter pou kapab donn en parti politik.

Me ankor enn fwa, sa i en lot deba. I pa tonm dan sa *Scheme* ki la. Me mon konpran ou pwen antyerman. Onorab.

E avek ou permisyon Mr Chair si petet *PS* Morgan i kapab reponn premye parti kestyon.

MR DEPUTY SPEAKER

Sertennman. Mrs Morgan.

PS FOR LANDS MURIEL MORGAN

Mersi Mr Chair. Mersi Onorab. So mwan depi ler mon'n antre dan lofis i napa okenn aplikan, ki'n vin kot mwan ki ganny konsidere parey nou tou nou pe dir bann malere, ki zot later in ganny pran malapropo pou fer okenn lenfrastriktir *as far as I am concerned*.

Mon *however*, mon okouran ki i annan serten dimoun ki pe *claim* viktimizasyon. Akoz zot in ganny bann later ki napa semen ki ariv lo sa bann later.

Me zot fer li dan en lespri kot zot ti konsyan, ler zot ti pe siny sa Lagreman konmkwa ki i napa semen pou ariv kot sa bann later.

Now, whilst ki dimoun pe santi konmkwa zot pa pe ganny trete dan en fason ki byen, akoz

zot pa pe ganny sa larepons ki zot, zot anvi, i osi enportan pour ki piblik i realize ki zot bezwen tret bann serviter piblik, dan en fason ki byen.

Pa esey fer ki en keksoz ki i mal, kot nou napa rezon, akoz nou napa rezon, nou kriy viktimizasyon avek *forceful acquisition* lo Gouvernman *in itself*.

Akoz sa ki mon kapab enform ou osi, mon konn vreman byen sa *case*, ki ou pe koz lo la. Sa dimoun in al devan *TRNUC* e mwan mon'n eksplik sa madanm, mon dir li si ou pare, mon osi mon ava vin devan *TRNUC*, mon ava donn mon versyon de fe. Mersi bokou Mr Chair.

MR DEPUTY SPEAKER

Mersi Mrs Morgan. Onorab Labonte ou le klarifikasyon lo sa pwen.

HON ANDY LABONTE

Yes. En pti klarifikasyon. Mersi PS pou ou larepons. So mon pou azout en pti gin, avek sa ki Onorab Woodcock in dir.

I byen ki Mr Lablache i la, akoz in la de lepase i konn tre byen petet sa bann keksoz ki'n arive. So i ava kapab dan en pli bon pozisyon pou kapab ede pour nou kapab retourn sa bann later.

Me PS pou ou, petet ou pa pe konpran mwan vreman, dan ki sans mon pe demann ou sa kestyon. Akoz la mon pe koz ler nou pran later en endividé, nou fer semen lo la.

Apre nou dir sa endividé poudir son later i tro pti, or i voras. Parey ou pe dir ou okouran. Me petet i annan serten lenformasyon mon pa konnen petet, si ou pa *well versed* avek. Me petet i en *case* ki direkteman mon kapab donn ou plis lenformasyon lo la.

MR DEPUTY SPEAKER

Mersi Onorab. Nou ava pas laparol avek Onorab Samynadin.

HON KELLY SAMYNADIN

Mersi Mr Chair. Bonn apre midi. Vis-Prezidan. Mr Chair permet mwan, akoz mon pa pou kapab pa dir, mon konnen nou'n ase tandé depi bomaten.

Me selman koman en ansenyen par profesyon, mon santi i mon devwar pou mwan osi *extend* mon felisitasyon, pou tou bann ansennyan ki pe debrouye, ki pe leve toulezour pou ed nou bann zanfan pou vin bann meyer sitwayen dan lasosyete.

Mon premye kestyon Vis-Prezidan. Dan bann sirkonstans kot later ki

Gouvernman oparavan in pran, ki pa'n ganny devlope e ki i annan dimoun dan lepase, ki'n vini in vin etabli lo la. E Gouvernman in les zot reste lo sa later.

Mon konnen poudir dan diferan distrik i annan bann sityasyon koumsa ki'n arive. E dan le ka kot propriyeter sa later i deside *claim* son later, ki pou arive? Ki Gouvernman pou deside fer, avek sa bann dimoun ki lankadreman ki pou annan pou zot?

Apre dezyenmman mon ti a kontan konnen si sa *Scheme* pou annan okenn lenpak, si pou afekte oubyen enpakte lo finalite *Truth and National Reconciliation Commission?* Mersi.

MR DEPUTY SPEAKER

Mersi Onorab. Vis-Prezidan.

THE VICE-PRESIDENT AHMED AFIF

Mersi bokou Mr Chairman. Mersi Onorab Samynadin pour sa, sa kestyon. Lekip ki la i dir ek mwan poudir, i probab me zot krwar i pou annan tre pe ka. Kot ou pou annan en later ki ti'n size en akizisyon, pa ankor devlope, me ki ou annan en dimoun ki lo la san permision, me selman i pe zis reste la.

Lenpresyon mon gannyen se ki ou pou donn priyorite pou en dimoun annan en landrwa reste. Sa i pou, i pou toulstan en keksoz ki ou pou sey fer, parske de tout fason ou bezwen met li en landrwa.

Byensir i annan sa kestyon legal, vi ki i pa'n formaliz son prezans lo sa later, in pa'n aste eksatera. Me selman nou pa krwar, parmi sa bann ka, nou pou annan, nou pou annan bokou sa bann koumsa.

Kot i konsern *TRNUC*, parey mon'n dir dan mon, deklarasyon pli boner, Si sa dimoun, sa aplikan anba sa *Scheme* i trouv en solisyon, i aksepte e i ganny son later ki revin kot li.

Enn bann kondisyon ki pou ganny met devan li, se i bezwen tir son ka devan *TRNUC*. Pou la senp rezon ki ou pa kapab ganny en konpansasyon de fwa.

Alor sa se enn bann kondisyon ki nou'n met devan. Mersi. Avek ou permision Mr Chair AG ti le azout lo la.

MR DEPUTY SPEAKER

Sertennman AG.

THE ATTORNEY GENERAL FRANK ALLY

Mersi Mr Chairman. Mr Chairman mon e Onorab Samynadin. Mon krwar i enportan sa ki VP pe dir se ki i en konplent an relasyon avek sa later.

So si en dimoun in fer en konplent ki annan en vyolasyon, ler ki sa later in ganny *either compulsory acquire*. Ouswa in bezwen vann, in vwar li kontrent pou vann sa later.

Sa konplent ki nou pe dir, akoz TRNUC demen i pou ekout sa *case, let's say*. E i pou fer rekomandasyon, *let's say* i fer rekomandasyon i dir Gouvernman rann li sa later.

So this is were, as en contrepartie, nou propoze ki i withdraw son case. Oubyen si TRNUC i fer rekomandasyon avek Gouvernman pou rann li son later, oubyen pey li en konpansasyon dan plas rann li later, sa Lagreman, ki or konpromi ki i fer avek Gouvernman anba sa Scheme, i ava ekivalan en *settlement full and final of son claim, or son konplent TRNUC*.

Mon krwar sa i tre enportan, nou pa. Gouvernman pa pe dir bann dimoun ki annan en, konplent devan TRNUC pou tir zot konplent, zot kapab, zot lib pou zot kontinyen en zot konplent.

Me zot bezwen petet la rod konsey legal, pou konnen ki pou valer legal en rekomandasyon. Ki pou lobligasyon Gouvernman, vizavi en rekomandasyon TRNUC.

Oubyen eski i al anba sa Scheme e i kapab ariv lo en konpromi avek Gouvernman lo la ki pou bokou pli efektiv, kot Gouvernman i kapab agree pou rann li swa antye oubyen en parti son later. Mersi.

MR DEPUTY SPEAKER

Mersi AG. Nou ava donn laparol Onorab Letourdie.

HON JANY LETOURDIE

Mersi Mr Chair. Bonn apre midi tou dimoun. Personnelman mwan ozordi le 5 Oktob. Mon konsider sa koman en keksoz tre pozitiv, ki pe arive la avek sa Scheme.

Akoz omwen i ankor en pa, en keksoz byen ki Gouvernman dizour pe fer. Omwen pou sey soulaz, soufrans bann dimoun ki'n ganny perskite pandan bokou letan.

Mr Chair VP, ou'n dir i annan aepre 150 ka ki zot prezimen oubyen ki'n vin kot zot. E petet mon mazinen eski zot annan en nide dan sak distrik, petet ki kantite i annan dan sak distrik.

E si zot annan lenformasyon petet, ti a byen petet pou ganny partaze, sirtou pou bann MNAs Elekte. Mon mazinen zot ti pou kontan.

Pou bann propriyeter ki'n fini *décéder*, ou'n dir ki zot bann zeritye i kapab vin devan pou fer sa *claim*.

Me eski zot pe kit sa ouver, eski pou annan en dele letan? Akoz dizon par egzanp i annan 10morso ki personn pa ankor vin devan. Eski zot pou kit li ouver, ziske ler zeritye i vini.

E si napa personn ki Gouvernman i fer avek sa later? Eski nou al an *poussière* nou retourn an *poussière* avek sa later?

MR DEPUTY SPEAKER

Mersi Onorab. Vis-Prezidan.

THE VICE-PRESIDENT AHMED AFIF

Mersi. Mersi Onorab pour sa kestyon. Premye kestyon lenformasyon par distrik. Nou annan lenformasyon diferan later, me selman nou napa la, pou donn ou sa detay la ozordi. Me nou, nou a fer ou ganny sa lenformasyon sertennman.

E ou lot kestyon ti konsern bann zeritye. Sa ki mon kapab dir ek ou, se ki parey mon'n dir dan sa deklarasyon.

Sa ki pou vin reklam later ki pa ankor devlope, i ankor lo non Gouvernman zot ganny depi la ziska le 31 Desanm 2021.

Sa prosen 3mwan pou zot vin dir ki poudir, zot swa en zeritye, swa pou zot propriyeter sa later. E ki zot a byensir, an dizan sa zot bezwen vin avek tou bann dokiman relevan. Pou montre poudir vre ou ki ti propriyeter, ou ti aste, oubyen ou fanmir sa dimoun *décéder*, Ou egzekiter.

E ou annan drwa pou fer sa, sa *claim* ki ou pe vin met devan Gouvernman. So si ou kapab fer sa avan le 31 Desanm 2021, sa ki nou pe dir anba sa *Scheme*, ou ka i ava ganny, i ava ganny vvar.

E pandan sa prosen 12 mwan ki devan nou. Gouvernman i a etidye, i a fer bann rekomandasyon, i a form parti sa rapor ki pou al kot Prezidan pli tar le 31 Desanm 2022.

So wi. Sa ki krwar i annan en *claim*, vini pandan sa prosen 3mwan. Mersi Mr Chair. Si personn pa vin, pa vin kot sa, pa vin fer *claim* i reste lo non Gouvernman.

MR DEPUTY SPEAKER

Mersi Vis-Prezidan. Nou a pas laparol avek Onorab Adelaide.

HON FRANCOIS ADELAIDE

Bonn apre midi Minis ek ou delegasyon. Minis petet mon pti, *VP* avek ou delegasyon. Eskiz mwan.

Petet mon pti klarifikasyon *VP* i pou vin lo kote. Par egzanp, mon'n tann zot pe dir be *ok*, bann landrwa ki annan bann lenfrastriktir, sa i pou kontinyen reste. Dimoun pa pou kapab *claim*.

Me mon pe mazin en lot senaryo la. I napa lenfrastriktir, koman mon ler nou pe koz akse avek lans, nou pou annan sa 25met *high watermark*.

E petet sa, sa i pou sa endividé. E eski Gouvernman in konsider sa pour ki sa bout lespas, vi ki nou pe ankouraz bann dimoun pou zot *enjoy* sa bann pti bout o bor lans, pour ki Gouvernman i konsidere avan ler zot petet mon pa konnen. Mersi.

MR DEPUTY SPEAKER

Mersi Onorab. *Panel*.

**THE VICE-PRESIDENT
AHMED AFIF**

Mersi Mr Chair. Mr Chair si Gouvernman i trouv li neseser e tou bann papye i annord ki sa later i bezwen ganny retournen anver sa propriyeter, akoz i pa'n devlope.

Me selman problem ki ou pe dir se i pou vin, sa dimoun prive prezant pou annan en landrwa kot i kapab blok akse avek lans.

Nou deza annan bann Lalwa ki egziste anba *Planning*. Ki fors nenport ki dimoun, enkli Gouvernman, pou fer sir ki akse avek lans i en keksoz ki ou bezwen donnen.

E byensir si dimoun i ganny akse, normalman *up to the high watermark*, sa i reste, sa i en keksoz ki ou pa kapab tire, ki dan lanmer Gouvernman, ki dan prive.

E parey mon'n dir, si sa later in ganny rann, i pa vedir ki sa akse, ki legalman nenport dimoun i devret donnen, i pou ale.

Me petet *Attorney General* i kapab donn ou en pe plis leksplikasyon lo pwennvi legal.

MR DEPUTY SPEAKER

AG.

**THE ATTORNEY GENERAL
FRANK ALLY**

Mersi Mr Chairman. Onorab Adelaide pour, zis pou reponn ou kestyon petet, se ki byento pou annan en Prozedlwa ki ti - anfet en Prozedlwa ki ti deza devan Lasable avan. Me selman i pa ti arriv son lafen. Se *Physical Planning Bill, 2021* ki

avan lafen sa mwan i pou ganny prezante devan Lasanble. E li i pou *secure*. I pou en *follow-up* provizyon dan *Code Civil Sesel*, ki dir ou poudir lans ziska son *highwater mark* i domenn piblik.

E alor pou fer fason ki bann propriyeter, oubyen ler en dimoun pe devlop en later, si i annan nesesite i pou bezwen donn akse piblik, *from a public highway, from* semen piblik avek lans.

E parey ou pe dir, petet en pwen ki ou pe sey dir se ki, si par egzant i annan en bout later, ki pou en propriyeter, e petet si Gouvernman, dan pe retourn sa later, i kapab konsider *excise* en bout petet ki o bor lans e pa rann tou sa later.

Mon krwar sa i en konsiderasyon ki Gouvernman pou pran. Par egzant si i annan en landrwa pou demen sa dimoun pa vin, *claim*, oubyen vin fer konplent, poudir wi ou'n rann mwan mon bout later. Me selman i en lans kot dimoun i frekant bokou.

So mon krwar sa i pou - nou bezwen, nou bezwen kit dan konsiderasyon Gouvernman ler i pe rann sa later. E ler i pe donn bann *coordinates* pou li kapab pran kont sa.

E, e fer fason ki piblik i kapab kontinyen ganny akse avek en serten later. Mon krwar sa i pou kapab tonm en pti pe dan bann eksepsyon ki nou kree anba sa *Scheme*. Mersi.

MR DEPUTY SPEAKER

Mersi AG. Prosen entervenan mon a kriy Onorab Waven William.

HON WAVEN WILLIAM

Mersi Mr Speaker. Bonn apre midi Vis-Prezidan avek ou lekip. Mon ti a kontan demann avek Vis-Prezidan, par lefe ki tou sa bann morso later anba sa *Scheme* i tonm dan en distrik. Mon anvi konnen ki ler zot pran bann desizyon, si pou donnen, bout ki pou retenir;-

Eski zot pou annan en, osi en konsiltasyon ouswa dyalog avek Lotorite Distrik? Par lefe ki nou konnen dan tou distrik ozordi, i annan bann plizyer bann proze ki'n ganny earmark. Eski sa konsiltasyon pou ganny fer?

E dezyenmman, Vis-Prezidan eski zot ti kapab - mon asire tou bann MNAs ti a kontan ganny en kopi sa lalis ki kontyen bann non, bann distrik. Eski nou osi, nou a kapab ganny en kopi? Mersi.

MR DEPUTY SPEAKER

Mersi Onorab. *Panel Vis-Prezidan.*

THE VICE-PRESIDENT AHMED AFIF

Mersi bokou Mr Chair. De kestyon. Sa enn premye, eski pou annan en diskisyon ki pou enkli tou bann parti prenan enkli distrik, avan sa bann desizyon i ganny fer? De keksoz, enn zis pour dir ki, desizyon ki pou ganny fer pou finalman al kot Prezidan.

Me byensir pou annan en Komite ki pou diskit tou sa bann, bann rekomandasyon. E lo sa Komite nou pou annan parey mon'n dir i pou enterministeryel, savedir i pou annan diferan Minister.

E mon mazinen dan sa ka ki ou pe fer referans lo la i pou Gouvernman Lokal. Akoz la ou kapab enkli *DA* par egzanp. *MNA* mon mazinen sa osi pou en eleman enportan dan konsiltasyon, ansanm avek lezot Minister Later li menm, *Survey eksetera*.

So wi nou, nou lentansyon se pran bann bon desizyon. E pou ganny bon desizyon i pli bon annan meyer konsiltasyon. An sa ki konsern lalis, nou napa okenn problem pour partaz sa avek zot.

Zis ki nou napa - nou pa'n vin avek la ozordi. Me selman

nou kapab fer zot gannyen. Mersi Mr Chair.

MR DEPUTY SPEAKER

Mersi Vis-Prezidan. Prosen entervenan Onorab Bistoquet.

HON ROSIE BISTOQUET

Mersi Mr Speaker. Bonn apre midi Mr Speaker. Bonn apre midi Vis-Prezidan avek ou delegasyon.

Parey tou mon bann kanmarad, mon osi mon pou bezwen fet, bonn fer en bonn fet bann *teachers* espesyalman Miss Raymonde avek Miss Mirena ek son tim Pointe Larue.

Sa ki mon ti anvi demande enn, se ki mon krwar sa i en bon desizyon. Mon'n ganny bann teks, bokou bann dimoun dan distrik. Diferan distrik dan diferan Departman travay osi.

Zot dir sa i en bon desizyon ki Gouvernman in pran, pou rann bann dimoun zot later. Me selman mon a, zot ti'n dir mwan malgre, bann pti, pti, pti bout. En lot keksoz Bondye i dir dan son 10 Konmandman vole i pa bon. Demande, i pa en pese, menm si ou pa gannyen.

Sa ki mon ti anvi demann *VP* se ki, dapre sa *Act* i annan, anba sa -. I annan en *Policy* ki zot in devlope.

Kot i annan sa *absentee of landlord* ki zot later - Ki Gouvernman ti pran later sa bann dimoun, san zot konsantman laplipar ditan.

Prezan sa ki mon'n ganny demande laplipar dan sa bann teks, se eksplik zot akoz, sa *absentee of landlord*, apre akoz zot later ti ganny pran anba la? Mersi.

MR DEPUTY SPEAKER

Mersi Onorab. Vis-Prezidan.

THE VICE-PRESIDENT AHMED AFIF

Mersi Mr Chair. Avek ou permisyon mon a demann *Attorney General* pou al lo sa pwen, sirtou ki en pe i legal. Mersi.

MR DEPUTY SPEAKER

AG.

THE ATTORNEY GENERAL FRANK ALLY

Mersi Mr Chairman. Mersi Onorab Bistoquet. Onorab Bistoquet nou annan en Lalwa ki apel *Curatelle Act*.

E anba Lalwa *Curatelle* si en dimoun i absan dan pei, son propriyete i ganny *subject to* sa ki nou apel en *Vesting Order* e i ganny *vested* dan sa ki nou apel en *Curator*. Sa lepok nou ti apel li en *Curator of vacant estate*.

Ozordi avek nouveau *Curatelle Act 2021*, nou apel li *Curator*. E li *Curator* i *manage* sa later. I kapab vann sa later, i kapab fer lezot keksoz avek sa later.

Me si en dimoun evantyelman, i vini, i nepli *absent*, i vin Sesel, oubyen si en siksesyon vakan, savedir en siksesyon en dimoun ki'n mor ki napa zeritye, la i kapab vin fer sa ki nou apel en *Divesting Order*. I *apply* avek Lakour e i dir, be gete ou ti- E sa i en prosedir ki ganny fer Ankour.

So i en Lalwa date from time immemorial. I egziste dan tou pei lemonn. E i napa gran, i pa en keksoz ki sokan. So i sa dimoun i still annan en drwa. Si i pa ganny son later, i kapab ganny valer son later, depandan ki, ki *Curator* in fer ek sa later. E si *Curator* par egzamp in dispose of sa later.

Bon i annan en lot prosedir ki ti ganny fer anba en Lalwa ki nou apel *Adjudication of Titles Decree*. Sa i ti en Lalwa ki ti ganny, pase letan ki pou nou kapab pran tou later ki ti lo vye sistem ki nou apel vye sistem.

Savedir anrezistre anba *Mortgage and Registration Act*, pou nou met li an - E anrezistre li anba en Lalwa ki nou apel *Land Registration Act*. *Land*

Registration Act i osi i en Lalwa ki ti ganny pase an 1968, avek bi pou nou moderniz nou sistem lanrezistreman later.

Ti baze, lo *Land Registration Act* Langleter 1925. Kot Langleter ti partaz sa avek en pti pe bokou son bann koloni.

E nou, nou ti fer bann lamannman, parey tou lezot koloni e anba *Adjudication of Titles Decree* sa ti en fason kot en prosedir kot bann dimoun - mon mazinen zot bezwen rapel dan bann lannen '70 ek '80 ki ti demann ou pou vin deklar ou later.

E la ou vin avek ou bann dokiman, ou deklar ou later ou e prezan later i ganny met lo vye sistenm. *Sorry* lo nouvo sistenm, i tire lo vye sistenm i met lo nouvo sistenm.

In annan bann ka kot bann dimoun pa'n vin *claim* zot later. E evantyelman ler zot pa'n vin *claim* zot later, sa later in kapab, dapre sa Lalwa i ganny anrezistre lo Gouvernman.

E in annan bann ka kot Gouvernman in kapab *deal* avek sa later. Evantyelman akoz in vin dan *ownership* Gouvernman, *by virtue of* sa sa Lalwa. I kapab ki sa bann later i ankor la. E si en dimoun, i anvi *claim*, si i kapab montre

poudir i annan Tit, i kapab *claim*.

Me selman Gouvernman i kapab *raise* bann defans ki in fini vin proprieter avek letan. Sa ki nou apel Preskripsyon Akizitiv. So sa i bann mekanizm Lalwa, ki ganny fer.

Me parkont i kapab in annan bann dimoun ki zot later in ganny *compulsory acquire* o moman ki zot ti aletranze. Me sa i bann loportinite, zot ti annan sa loportinite si zot pa'n fer li anba *Land Acquisition Act 1977*, pou zot *claim* e ganny konpansasyon.

Akoz menm *claim*, pou ganny ou konpansasyon ou bezwen annan *time limit* pou ou fer.

Anba *Acquisition of Land in the Public Interest Act* ki ti pase an 1996, li osi i annan *time limit*.

I annan dimoun ki'n perdi, sa drwa pou zot *claim* konpansasyon akoz zot in vin an retar. Zot pa'n vin dan sa dele letan ki Lalwa in permet pou zot fer sa *claim* oubyen pou zot al Ankour. E *challenge* konstitisyonalite sa *Compulsory Acquisition*.

So dan ka kot i annan en dimoun pandan *One-Party System*, savedir pandan letan '77-'93 zot absan dan pei e ki zot later in ganny pran. Zot, zot

tonm anba *Schedule 7 Part III*, anba Konstitisyon kot zot ti kapab fer en *claim*.

Me si zot in fer en *claim*, pandan sa 12mwan from Zilyet '93, zot osi kapab tonm anba sa *Scheme* si zot later ti, ki ti ganny *compulsory acquire* i pa ankor ganny devlope.

So sa bann mekanizm i la, pou zot kapab fer sa. Mersi.

MR DEPUTY SPEAKER

Mersi AG. I reste mwan selman de entervenan lo mon lalis. So ki nou pou fer nou ava.

Omwen i annan en Manm dan lasal ki ti'n lev lanmen mon pa'n vwar li. I endike la *or forever hold your peace*. Napa. Ok i annan zis sa, zis sa de. So nou ava pran e nou ava koumsa termin nou sesyon travay pou ozordi en pe pli boner ki labitid. Mon a pas laparol avek Onorab Sandy Arissol.

HON SANDY ARISSOL

Mersi Mr Speaker. Bonn apre midi Mr Speaker. Bonn apre midi VP, avek ou nouveau delegasyon.

Mr Speaker mon ti a kontan dir premyerman poudir ozordi i en zour, inoubliyab. E parske le 5 Oktob 2021, Lepep Seselwa, sirtou bann ki zot later ti ganny pran par en ansyen rezim SPUP/SPPF/Parti Lepep.

Zot ti pran later bann dimoun e ozordi Seselwa in vot pou en sanzman. E ozordi le 5 Oktob bann dimoun ki zot later ti ganny pran malapropo avek zot, pou ganny rann zot later, bann later ki pa'n devlope.

Alor lo la mon ti a kontan felisit Vis-Prezidan, avek Prezidan, avek Gouvernman LDS, avek tou bann teknisyen ki pe inisyé sa. Felisitasyon pou sa bon travay.

E mon ti a kontan remersye Lepep Seselwa ...

(APPLAUSE)

HON SANDY ARISSOL

... pou sa sanzman ki zot in fer pour ki bann later ki'n ganny pran malapropo, i ganny rann avek zot.

Mr Speaker ozordi le 5 Oktob. E pa blye le 3 Oktob osi, pou nou i en zour e en dat ki nou pa zanmen blye. Se la kot nou, nou ti ganny sans rasanble, kot drwa lenformasyon e osi drwa rasanbleman ki Onorab Aglae, pa tro, tro kontan letan nou koz lo la.

Mr Speaker selman mon en pe dezapwente avek *statement* ki'n ganny fer par Onorab Wallace Cosgrow, ansyen Minis dan Gouvernman

ki ti ede pran later bann
dimoun malaprop!

(Interruption)

HON SANDY ARISSOL

Gouvernman, ki ti. Ou ti form par. Gouvernman ki ou ti form par ladan!

(Interruption)

HON SANDY ARISSOL

Mon redir Mr Speaker, mon retract.

(Interruption)

MR DEPUTY SPEAKER

Order! Les Onorab Arissol kontinyen.

HON SANDY ARISSOL

Mon-mon rekapitile.

(Interruption)

HON SANDY ARISSOL

Mon a rekapitile. Onorab Wallace Cosgrow Mr Speaker, ti en Minis dan Gouvernman ki ti la pou 43an, ki'n pran later bann dimoun malaprop. I bon la?

(Interruption)

HON SANDY ARISSOL

I ok la! Good. Prezan Mr Speaker sa menm Wallace Cosgrow i vini i dir ek nou i ok Onorab. I vini i dir ek nou poudir i ok, parske i annan en kantite dimoun in ganny en morso later, kantite dimoun in ganny lakaz.

Be i pa kapab ok, pou pran byen en dimoun malapropo, partaze avek lezot e li sa dimoun i ganny forse an egzil! I pa byen sa! E mon pa dakor mwan lo mon kote.

Be mon kontan... (demann ou kestyon, lev ou lanmen)

Me mon kontan Mr Speaker ozordi zot lo zot kote, zot in reste trankil laba. Zot pa'n ganny kouraz parey Onorab Audrey pou li demann en kestyon. Me selman toulstan i rod lord dan Roche Caiman, apre li i kasyet parey nou dir!

Mr Speaker i ok wi. Mr Speaker mon krwar ozordi mon kontan, mon apresye bann kestyon ki'n ganny demande. E mon kontan bann dimoun ki pe ekout nou deor. Parske sa i pou montre poudir wi, zot ti vote en sanzman. E lala ozordi, sa sanzman pe arive.

Me i enportan pou nou remind ankor Mr Speaker, parey Onorab Rosie in dir. Pa zis bann gro, gro kare parey Onorab Cosgrow in dir nou ki ti

ganny pran. I annan osi bann ptipti bout ki'n ganny pran. E zot in apel pou zot.

Napa problem. Onorab Wallace Cosgrow Mr Speaker letan in demann son kestyon, letan Onorab Cosgrow Mr Speaker in demann son kestyon an relasyon avek later, mwan mon ti a kontan zisteman demann Minis, *in regards to* - letan bann dimoun pou ganny rann zot later Minis, VP;-

Eski sa lalis pou ganny pibliye? Konmsi pou nou tou konnen poudir be lala, dan sa 150 dimoun, wi i annan 100 ki'n vini, me 50 pa ankor vini.

En fason, ki si mwan mon konnen poudir Onorab Cosgrow i enn bann dimoun ki zot in pran son later e zot pa ankor rann li. Mon a kapab donn li en pti *call Australie*, kot zot anvoy li egzile, pou mwan dir li vini, later pe donne, vin pran pou ou. Eski pou annan sa Minis? Mon premye kestyon.

Dezyenm kestyon ki mon ti a kontan demann avek Gouvernman, avek VP ki reprezent Gouvernman, eski Gouvernman pe mazin osi, apard bann later ki'n ganny pran malapropo.

Eski Gouvernman an vi ki PS later i la, Gouvernman pe mazin osi antre dan sa ki nou apel bann later *land bank*. Kot i

annan plizyer zofisyen
Gouvernman, bann zanmi,
bann dalon, bann
korespondans ki'n ganny
plizyer morso later *land bank*,
zis i la dan distrik Bel Ombre.

Par egzanp mon annan en bon pe Bel Ombre. Zis i la. Ler ou ale i dir ek ou. Be sa pou Mr entel sa, sa pou madanm entel.

Be selman lo mon lalis, Bel Ombre mon annan en kantite dimoun pe esper bout later *land bank* depi *vitam aeternam* i pa ankor gannyen.

Eski pou annan osi sa *remaniement* letan nou'n fini avek bann later, ki'n ganny pran par Gouvernman ki Onorab Cosgrow ti form par ladan?

Mr Speaker mon lot, e mon dernyen kestyon mon ti a kontan demann VP, se an relasyon avek bann later SPUP/ SPPF, la ki zot ti pran, apre zot in demarke apel pou zot.

E Bel Ombre mon annan en vye pti lakaz, en vye biro pe pouri laba dan bor semen. I en *eyesore* pou mwan. Tol pe rouye, laport pe tonbe. Konmsi kot nou kapab Bel Ombre ganny en zoli pti landrwa, nou a kraz sa vye pti lakaz US.

Parske i pa zot later, i pa zot later tou fason, Gouvernman a gannyen pou nou fer en zoli *playground* pou

nou bann zanfan Bel Ombre. Eski sa i ava arrive dan tou bann distrik.

Koumsa bann dimoun, bann later ki Gouvernman Onorab Cosgrow in pran, nou a kapab retourne li avek Lepep Seselwa. Pou zot santi zot *happy e ere!* Mersi bokou Mr Speaker.

MR DEPUTY SPEAKER

Mersi Onorab. *Panel.*

THE VICE-PRESIDENT

AHMED AFIF

Mersi Mr Chair. Mr Chair premyerman mon ti a kontan dir ek Onorab Arissol, parey li, mon osi mon partaz en lazwa ler mon santi ki, nou pe, pran en Polisi e nou pe fer en *Scheme* evantyelman i pou transformen atraver Lalwa. Kot nou pe anmenn plis lazistis.

Mon krwar pep Seselwa pe rod plis lazistis. Nou pe rod rekonsilyasyon, e sa *Scheme* i en premye pa dan sa direksyon.

E parey ou, mon partaz sa lazwa e mon konnen bokou deor ki santi zot in perdi zot dinyite, zot in perdi zot bann byen. Zot a trouve poudir nou, nou pe travay pou tou Seselwa. Parske Sesel i pou tou son zanfan.

Lo kote lalis ki pou ganny evantyelman rekomande e

aprouve par Gouvernman. Onorab, mwan parey ou ankor, mon krwar ki nou en Gouvernman ki transparan. Nou en Gouvernman ki krwar, dan fer dimoun konn tou sa ki nou fer.

E dan sa ka, mon krwar i devret en keksoz ki ganny pibliye, ki vwala bann later ki Gouvernman in *acquire*, pandan en serten letan. E vwala, kondisyon anba ki sa bann later pe ganny retournen.

E mon krwar piblik pou enterese pou li konnen. E sa sertennman, mon krwar nou devret, nou devret fer li piblik.

An sa ki konsern *land bank*, mon sel keksoz mon kapab dir ek ou, mon konpran sa fristrasyon ki ou annan. Kot, i annan lenzistik selon sa ki ou pe dir.

Parske ou annan bann dimoun ki, possibleman in ganny later, ki i pa ti merite. E tandis - e i pa pe servi sa later osi. Me tandis ki annan lezot dan ou distrik parey ou pe dir, ki pe depann, ki pe espere pou li ganny en later. E sa i pa byen.

Me selman i pa tonm dan kad sa *Scheme* ki nou pe koz lo la. Selman mon kapab asir ou ki sertennman, i en preokipasyon Gouvernman. E nou anvi - (ankor sa, i en

kestyon lazistis osi) nou anvi fer sir ki tou Seselwa ki pe espere.

Otan pli vit ki nou kapab fer li arive ganny son later nou pou fer li. E byensir tousala i dan en lankadreman legal. Si sa dimoun in ganny vann, swa later dan *land bank*, me pa'n met en kondisyon lo li. Lo ki lavites i kapab, ki kapab fer, konbyen letan i kapab reste san devlope.

Nou bezwen respe kondisyon ki la. Me sertennman nou pou met presyon, ki tou dimoun i devlop son later, pa zis kit la.

Lo kote later ki ou ti pe dir, ki biro, ki'n deza donn en parti politik ankor enn fwa, i pa pou tonm dan sa *Scheme*.

Me selman, mon dakor avek ou ki si in annan en lenzistis i mal. E i ti a swetab parey ou pe dir ki sa bann tel later, i ganny met a dispozisyon piblik.

E si i annan okenn parti politik ki pe, ki lo sa bann later ki kapab ede dan sa prosesis pou fer nou, kominote benefisyé, Mon ti ava ankouraz zot pou zot fer li osi. Mersi Mr Chair.

MR DEPUTY SPEAKER

Mersi Vis-Prezidan. Mon vwar Onorab Arissol i annan en klarifikasyon?

HON SANDY ARISSOL

Mr Speaker en pti klarifikasiyon, *in regards to* - letan ou'n donn sa dele letan, VP. En keksoz ki mon kapab dir ek ou. I annan sa fame later Monnaie ki nou ti tande lo medya, ti menm annan *interview*, later Monnaie La Digue.

Kot bann fanmir pe rod zot later zisteman, lo sa size ki nou pe koze. Selman si mon pa tronpe, mon krwar i Ankour, swa in fini. Nou pa ankor tann lo la.

Eski savedir si en dimoun i annan en *case* Ankour, in santi poudir Gouvernman in donn sa dele letan. Eski sa dimoun li, i preferab i tir son *case* Ankour, akoz i santi poudir kekfwa si i al kot Gouvernman, i pou al en pti pe pli vit. Oubyen zot kontinyen, ou krwar zot kontinyen avek zot fer, zot annan zot *case* Ankour e keksoz i kontinyen mars parey?

Anvi ki ou'n donn sa dele letan, ou kapab donn mwan en pti keksoz lo la *VP*?

Pou bann Monnaie La Digue ki pe ekout nou. Mersi.

MR DEPUTY SPEAKER

Vis-Prezidan. Mersi Onorab.

THE VICE-PRESIDENT
AHMED AFIF

Mersi Mr Chair. Mersi Onorab. Onorab mon krwar si en keksoz i deza devan en Lakour parey ou menm ou'n sizere. I pa pou kapab antre dan sa *Scheme*, parske i deza devan en Lakour.

Me desizyon se, si sa dimoun pou tire eski Gouvernman i pare pou li, regard sa ka de novo. Mon mazinen wi. Parske, parske i depan lo sirkonstans. Mon napa detay spesifik lo ka Monnaie.

Me selman an prensip, si zot tire Ankour, nou parey, parey mon'n dir oparavan, nou sel bi se anmenn lazistis. E pou fer dimoun, pa pou fer dimoun espere pou en kantite letan. Si i annan en lenzistis ki'n pase, atraver sa nou kapab refer li ganny son byen, ki vreman pour li. Nou pou fer li pli vit posib.

MR DEPUTY SPEAKER

Mersi. *Panel*. I annan...

THE VICE-PRESIDENT
AHMED AFIF

Mr, si ou kapab permet AG azout en bout ladan. Mersi.

MR DEPUTY SPEAKER

Absoliman. AG.

THE ATTORNEY GENERAL
FRANK ALLY

Mersi Mr Chair. Mr Chair mon krwar si later bann Monnaie or *claim* ki bann Monnaie i annan La Digue, i tonm *within the purview of* sa *Scheme*, then zot kapab fer en laplikasyon.

Me si i pa tonm *within the purview of* sa *Scheme*, zot pa pou kapab fer en laplikasyon. Akoz sa, sa *Scheme* i *only*, i selman bann konsern bann later ki Gouvernman in *compulsorily acquire from* son propriyeter. Pandan sa peryod '77-'93, oubyen parey nou'n dir Gouvernman in aste e ki bann dimoun i *claim* ki zot ti vann *sous contrainte*.

Sa. So si i pa tonm ladan i pa pou- Mersi.

MR DEPUTY SPEAKER

Mersi. *Panel*. Mon zis not Onorab Sophola. Ou pa ti le azout en keksoz konsernan sa, enn ka spesifik. Akoz kekfwa ou ti MNA avan La Digue, kekfwa ou kapab eklersi nou, lo sa pwen?

HON NOLINE SOPHOLA

Mersi Mr Speaker. Mr Speaker zis mon anvi dir konfli lentere. Mersi Mr Speaker.

MR DEPUTY SPEAKER

Mersi. Ok. Dernyen entervenan pou sa sesyon, mon ava envit.

(Interruption)

MR DEPUTY SPEAKER

Nou ava ganny en pe lord silvouple. Mersi. Onorab Georges.

HON BERNARD GEORGES

Mersi Mr Chair. Mr Chair premyerman mon ti a kontan demann leskiz avek PS Morgan. Pou lefet ki mon pa'n rekonnert li pli boner.

Ozordi nou konpran akoz bann dimoun ki al, *rob labank* i met en mask dan zot figir, akoz zot. I difisil annan de fwa pou rekonnert en dimoun ler zot ler zot deryer en mask.

Mr Speaker ansanm avek Vis-Prezidan, Onorab Sandy Arissol e tou dimoun lo sa kote latab, mon dan en gran lazwa apre midi, pou bann rezon ki zot in evoke.

Me mon osi dan en latristes, e mon annan en regre. E sa regre se ki Onorab Flory Larue pa dan Lasanble apre midi. Akoz si Onorab Flory Larue ti la mon krwar, nou ti pou'n ganny nou en apre midi, ankor pli enteresan ki sa enn ki nou'n pas ladan. Avek en lalis, en lalis later ki'n ganny pran malapropro.

Mr Chair, mon lazwa i vin pa selman akoz sa ki nou pe fer ozordi. Me i vin sirtou akoz, depi komansman en Mr Lablache ki la ozordi i konnen, mon'n *involved* avek sa bann case pran later pandan bokou, bokou, bokou, bokou lannen menm.

E mon kapab, mon ti a kontan krwar ki enn bann rezon ki *Schedule 7 Part 3* dan Konstitisyon in ganny mete, se akoz enn de nou, nou ti al koz en pe for dan Komisyon Konstitisyonnel an 1992.

Bref, ozordi nou la e apre *foot dragging*, e fo promes ki Gouvernman *SPPF*, Lepep ek US in perpetye depi 199, kot zot in promet ki zot pou rann later e zot pa'n fer, otan ki zot ti'n devret fer.

Menm nou ti a dir, zot pa'n fer preski nanryen ki dimoun in bezwen, al Ankour. Kot Lakour in donn lord, kot en *Land Tribunal* in bezwen ganny etablir, kot dimoun in bezwen al devan *TRNUC*.

Ozordi nou vvar ki annan en Gouvernman ki pa'n fer okenn sa bann keksoz. Me ki ozordi, li i pe vin anmenn lazistis avek soulazman pou bann dimoun ki'n espere pandan tou sa kantite letan.

Alor Mr Speaker, atraver ou mon a demann avek Vis-

Prezidan pou anmenn nou swe kot Gouvernman e nou rekonesans ki finalman zot in annan kouraz pou fer sa ki Gouvernman presedan pa'n anvi fer.

(APPLAUSE)

HON BERNARD GEORGES

Mr Speaker mon bezwen osi rekonnet ki apre midi dan sa, dan sa Lasamble, i annan en pe fo lekivalans ki'n ganny fer lo kote Lopozisyon.

Lakizisyon later dan fason ki in ganny fer avek son rezulta, personn pa kapab dir ti en bon keksoz. Akoz i pa ti en bon keksoz. Ti annan en fason fer, me Gouvernman *US* in prefere, *SPPF* sa lepok in prefere pa fer li dan en bon fason.

Ou pa pran Mr Speaker 100arpan later akoz ou anvi devlop de ladan. Si ou ti bezwen pou rezon nesesite piblik ou ti a pran sa de. E ozordi se sa ki nou vvar.

E en, Manm apre midi in dir, ki akoz ti annan dimoun ki ti annan later depi Beau Vallon ziska *Trois Frères* ki Mr Lablache i la ozordi, i ava demandi nou - mwan mon pa konn okenn dimoun ki ti en propriyeter en bout later ki sorti Beau Vallon e ki mont ziska *Trois Frères*.

Akoz ti annan, akoz ti annan serten dimoun ki ti annan en kantite later, e ki ti annan serten dimoun ki ti napa, i byen ki ou'n pran avek sa ki ti annan pou ou donn avek sa ki napa! Sa se en fo lekivalans Mr Speaker!

E si nou al dan sa direksyon, nou pou bite koman en pep. Sa enn ki annan son later, si ou bezwen pou en litilite piblik, ou kapab pran si i pa anvi vann. Nou pa kapab pran, zis akoz i annan later, e donn avek en dimoun ki zis akoz i napa!

Se pa koumsa, sa lekivalans. E la, e sa mon krwar, sa Lasamble i devret kondann sa. Akoz si nou pa fer li la ozordi, nou pou ganny kondannen pou repet menm fot ki nou'n fer dan lepase.

Dezyenmman Mr Speaker, mon pa krwar ki Lopozisyon ozordi i annan okenn lesion pou vin fer nou, lo sistenm later isi Sesel.

En sertennman Lopozisyon pa kapab vin dir nou e dir avek *VP*, avek sa *panel* ki la devan, zot pa kapab antre dan en *Scheme* koumsa akoz zot pa'n, zot napa bann detay ki kantite ki pou annan.

E mon, rezon e mon dir sa Mr Speaker, se ki sa Gouvernman pe fer la ozordi.

Zot pa pe fer en keksoz ki nouvo, sa i dan Konstitisyon depi 1993.

E tou sa bann Gouvernman US ki ti la depi 1993, ti'n kapab fer sa ki Gouvernman pe fer ozordi. Me zot in swazir pou zot pa fer li. Alor silvouple pa vin donn nou leson la apre midi!

Mr Speaker, mon rekonnnet ki sa *Scheme* ki Vis-Prezidan pe vin anmenn devan nou ozordi. I pa en *Scheme* parfe. E li menm li in aksepte.

Sel keksoz ki sa *Scheme* pou fer, se pou rann bann dimoun later ki pa'n ganny devlope. E menm la, i annan serten leksepsyon lagrikiltir eksatera, eksatera. E nou konpran. Gouvernman a sa moman i bezwen donn lazistis e anmenn rekonsilyasyon san ki i kout li larzan. Akoz i napa larzan pou depanse dan en tel *Scheme*.

Me nou bezwen rekonnnet sepandan, ki pou annan serten dimoun deor, ki pa pou ganny rekonpanse. E alor Mr Speaker mon bann kestyon pou *panel*, se sa de kestyon swivan.

Ki pou arive avek bann ki pa pe tonm dan sa *Scheme*, swa akoz zot later in ganny devlope, ouswa zot in ganny pey en konpansasyon?

Mon a donn zot en legzanp pour kapab ilistre sa pwen ki mon pe demande. E la nou bezwen osi dir ki, Gouvernman SPPF ti dan *mauvaise foi*, depi 1993.

Akoz malgre ki i ti donn en langazman ki i pou retourne later ki dimoun in fer en *claim* lo la, nou'n vwar zot *still* pe vann later, ki zot ti sipoze pe rann akoz dimoun, ti'n fer en *claim* lo la. Me bref.

Si en dimoun i annan en later, ki annan en lakaz lo la, e ki sa later ek sa lakaz in ganny *acquire* pou R80mil par Gouvernman. E Gouvernman apre i donn sa en dimoun, ki revann li par laswit, pou plizyer milyon. E mon dir vre plizyer milyon Roupi.

Kote nou pou al anmenn lazistis e rekonsilyasyon pour sa dimoun, ki li son later i annan - I malere ki i pa en later vag, ki pa'n ganny devlope, me i en later ki'n ganny devlope. Kote i pou ale li? Eski i pou reste ek *TRNUC*? Eski i pou reste avek *Land Tribunal*? Lekel ki pou anmenn li lazistis?

Nou konpran ki i pa tonm dan sa *Scheme*, me kote i pou ale li pou li ganny lazistis demen? Eski pou annan en lot *Scheme*, en pe pli tar, ler pei i kapab *afford*? Oubyen eski nou pou atann *Land Tribunal*

oubyen *TRNUC* rann en zizman e donn Gouvernman en lopinyon lo sa?

E dezyenmman, ler later in ganny pran, i pa'n ganny devlope i pe ganny rann. E i annan en konpansasyon ki ganny peye si mon konpran byen. Sa dimoun ava ganny demande. Repran later, rann sa konpansasyon.

Me si i annan en bout ladan, ki'n ganny pran e ki'n ganny vann, oubyen ki'n ganny pran par Gouvernman e ki'n ganny devlope.

Mon mazinen ki i pou ganny dir, me nou a rann ou en pe larzan akoz ou pe ganny. Ou ava rann nou en pe larzan akoz ou pe, ou pe ganny en pe ou later, ou pa pe ganny tou.

Eski Gouvernman pa pe mazinen ki, dan sa ka etandonnen bann valer respektif - akoz la nou pe koz dan bann later, dan bann 10,20,30,50 arpan ki zot ti pou aste pou R200mil.

E ozordi en *plot* 1000met kare ou pa pou ganny li pou R200mil dan sa later. Eski Gouvernman pe mazinen kekfwa, ki dan sa bann ka, pa demann en retour konpansasyon. E dir ki sa i ava al koman en ekivalan pour sa bout later ki ou pe perdi.

Oubyen lefet ki pandan tou sa letan, ou'n perdi ou later, ou pa'n kapab devlop li, ou pa'n kapab vann, ou pa'n kapab *invest*, ou pa'n kapab fer en keksoz avek.

Vwala Mr Speaker sa se mon de kestyon, pour Minis ozordi. Mon remersi ou.

MR DEPUTY SPEAKER

Mersi Onorab Georges. *Panel, Vis-Prezidan.*

THE VICE-PRESIDENT AHMED AFIF

Mersi bokou Mr Chair. Mersi bokou Onorab Georges. E premyerman mon ti a kontan remersi ou, pou lefet ki lafason ki ou pe regard sa *Scheme*.

Parey ou, nou pe fer sa pirman pour fer sir ki tou dimoun ki ozordi pa satisfie avek sa ki'n pase avek later - later i en size tre, trez enportan pou tou dimoun.

E si i annan lenzistis ki'n pase dan lepase, ozordi nou espere e parey ou'n dir - nou pa pou kapab redres tou keksoz en sel kou. Me otan ki nou vwar en lenstans kot nou kapab fer sa, nou pou fer li.

E mon remersi ou pou ou sipor, e pour vwar ki nou osi nou pe travay an bonnfwa, avek tou sa volonte pou fer keksoz

ariv pli vit posib, pou tou dimoun.

Lo ou de kestyon. Lo bann dimoun ki pa tonm dan sa lankadreman, sa *Scheme* ki nou pe koz lo la.

Mon krwar zot pou bezwen kontiny bann, bann zefor ki zot in fer par egzanp dan *TRNUC*. Kot zot santi poudir, parske i annan en devlopman lo sa landrwa kot zot pe, zot pe reklanmen zot pa'n ganny lazistas. E zot a bezwen kontiny sa zefor dan sa bann landrwa.

An sa ki konsern sa Tribinal li menm. Tribinal li pe ganny aboli, avek sa amannman. E alors sa pouvwar pou retourn ek Minister li menm.

Alor sa diskisyon i a bezwen, fer direkteman avek Minister Later. E mon kapab asir ou Onorab, ki Gouvernman pou regard keksoz dan en fason obzektif, kot politik pa pou antre dan sa zwe. E sel keksoz nou pe rode, se fer dimoun ganny zot drwa, e respe zot drwa. Se sel keksoz ki nou pou rode.

Dan sa dezyenm parti ou kestyon, kot ou pe dir, i kapab annan en lenstans kot ou annan en later, in annan en Lakor, swivan '93 ek '94, kot en sonm in ganny peye. Me en bout ladan in ganny devlope par

Gouvernman e i reste en lot bout.

Alor ki nou'n, ki nou'n deside fer se, nou a dir ek li poudir, wi ou pou bezwen rann, parske ou ti'n deza ganny en konpansasyon.

Me ou a, ou a rann li depandan lo proporsyon ki pa ankor ganny devlope. E baze lo sa pri. Alor dizon ki R100mil ti konbyen, oubyen R200mil ti lavaler peyman ki li i ti'n gannyen ek Gouvernman sa letan.

E zis 20pourasan ladan, finalman in ganny devlope. E i reste sa 80pourasan. Alor nou pa pou pran lentere lo tou sa letan, ki sa larzan in reste avek li. Nou a senpleman dir ek li dan en fason senp, be ou a rann 80pourasan sa larzan ki Gouvernman ti pey ou.

E alors nou a rann ou sa later. En formil tre senp san lentere, san pran konsiderasyon pri later marse la ozordi. Zis nou, nou, nou fer li koumsa. Koumsa i ava al vit. E bann sonm petet, si zot santi bann sonm pa ti o, alor i pa pou en gran sonm pou zot *refund*.

Alor mwan mon krwar sa i kapab en solisyon. I kapab mars tre byen. Me tousala pou ganny mete dan lankadreman Lalwa. Ki pou ganny formile byento. Mersi Mr Chair.

MR DEPUTY SPEAKER

Mersi Vis-Prezidan. Onorab Georges ou annan en klarifikasyon?

HON BERNARD GEORGES

Mersi Mr. Mersi Mr Chair. Mr Chair mon remersye Vis-Prezidan e mon soulaze par son repons.

Mon konnen sa kestyon in ganny reponn. Me mon anvi zis fer sir, sa *Scheme* pou kouver bann dimoun ki'n ganny *compulsorily acquired* par en *Notice of Acquisition* anba *Lands Acquisition Act*.

Me osi bann ki'n vann zot later, anba presyon *as it were*. Sa ki mwan mon apel, en lakizisyon degize. In degize dan en lavant, me annefe *it was an acquisition*. Akoz si ou pa ti vann, i ti pou ganny *acquired*. Mersi.

MR DEPUTY SPEAKER

Mersi. Vis-Prezidan.

THE VICE-PRESIDENT
AHMED AFIF

Mersi Mr Chair. Mon konfirman egzakteman sa ki Onorab in dir. Mersi.

MR DEPUTY SPEAKER

E mon krwar i enportan nou represiz sa peryod letan, pou

asire ki napa bann demann ki tonm an deor. Vis-Prezidan.

THE VICE-PRESIDENT
AHMED AFIF

Mersi Mr Chair. Mr Chair sa ki nou'n dir se ki apartir la, ver le 01 Oktob, kan i ti ganny anonse ziska le 31 Desanm 2021. Savedir sa, sa peryod 3mwan ki la devan nou ki bann dimoun ki santi, ki zot in - zot annan later ki Gouvernman ti pran avek zot, ki ankor la pa ankor devlope.

E zot ti a kontan fer aplikasyon pou ganny rann sa later, se zot ki kapab vin devan pandan sa, sa prosen 3mwan. E menm si zot ti'n deza, vann avek Gouvernman an '93-'94. Me ki zot santi sa ti ganny fer anba presyon zot osi zot kapab vini.

E zot a rann swa sa morso antye, an term konpansasyon monneter, oubyen morso ladan. E Gouvernman a rann zot, zot later.

Me selman nou bezwen fer kler ki sa i bezwen ganny fer ant la e le 31 Desanm 2021. Sa bann ka i a ganny prezante devan en Komite Enterministeryel.

Kot pou annan plizyer bann Minister ek bann parti konsernen, ki pou vvar merit

sa bann prezantasyon ki'n met devan zot.

E answit sa zot a fer en rapor ki zot a prezant avek Prezidan. Zis pou presiz ankor, ki sa bann later ki nou pe koz lo la ki'n ganny akizisyonnne par Gouvernman. Nou pe koz ant peryod 1977-1993. Se sa bann akizisyon dan sa letan. Mersi bokou Mr Chair.

MR DEPUTY SPEAKER

Mersi pou sa presizyon Vis-Prezidan. Donk nou'n arriv a lafen nou sesyon demann kestyon lo sa *Statement* ki Vis-Prezidan in fer, lo *Scheme* pou retourn bann later ki ti ganny *acquired* par Gouvernman.

Donk mon ava demann Serzan pou retourn nou dan Staz Lasanble silvouple.

Nou pe osi apros lafen nou sesyon travay pou sa apre midi. E nou ava remersye Vis-Prezidan Mr Ahmed Afif, Attorney Zeneral Mr Frank Ally, Sekreter Prensipal pou Later Mrs Muriel Morgan e Konsiltan dan Minister Later avek lakaz Mr Patrick Lablache pour sa apre midi, pase avek nou.

Nou pou retran travay demen bomaten 9er. E pour lenformasyon piblik e osi bann Manm, demen nou pou prensipalman, diskit 2

Prozedlwa *Bill* Nimero 42 e 44 ki lo nou program travay pou demen. Donk nou ava rezwenn demen bomaten 9er.

(ADJOURNMENT)